

西齋集

西齋集序

西齋集者吾友元日之遺言也

先人

萬言

也當

官以

畫之

詩獨不然乎自昔宋初學者

雖以歐陽公之賢猶舍杜而

文固無可論亦宜其以

海圖書

下

索書號碼

登記號碼

012880

西齋集序

西齋集者吾友元朗之遺詩也元朗以貌諸孤承先人之緒修其家學詩名盛於一時而戊辰對策萬言超然獨異予時讀其文於廷中曰此必元朗也當魁天下已而竟弗得後予在戶曹元朗為郎官以其暇日得與論詩予嘗謂元朗古人有言聲畫之美者無如文文之精者無如詩夫文以載道詩獨不然乎自昔宋初學者祧少陵而宗李義山雖以歐陽公之賢猶舍杜而學韓歐陽公詩不逮文固無可論然亦豈非以韓詩之為尤近於道歟



近世詩人多學白香山香山之詩視義山為優然
當時之人已有議之者而杜牧之為特甚則其弗
幾乎道者不為時所重而傳之後世得無流弊也
不其難歟二子予之鄉人也予不敢諱言之昔有
吳中巨公自負攬文章之柄一日謂予人不學杜
詩斯可矣予心識其言之非而未有以應也今吾
子生長吳中才俊之區能不狃於鄉人之見取其
近於道者去其不近於道者此子之詩所以見重
於時也元朗以予言之不謬故時時與予論詩今
元朗已矣此予之所為悼歎過時而不能自己也

先是予在內閣元朗以曹郎考選科道官

上顧問廷敬此衆人中有知者否廷敬奏言吳暲有
文詩名最盛是日試奏議元朗果第一授給事中
進都給事中亡何以酒會細故落職

上惜其才命修書及分書得書畫譜予在內廷復
得典勘其文同時被命者侍郎孫君樹峰中丞
宋君堅齋學士王君麓臺給諫王君耳谿皆雅重
元朗雖以諸公蒐羅編撰之勤而元朗尤晝考夕
稽難脂繼晷殫精積瘁為書百卷將呈進而遭太
夫人大故以歸歸而卒以孝死嗚呼使假之以年

西齋集 卷之二
其進於道而有爲於世當必有大過於今者蓋天之生材亦難矣松棟栢梁不待百年而斤斧尋焉或芝蘭當戶鋤而去之天之意豈其若此歟豈其人之爲之歟此固非予之所能知也元朗卒之明年季弟少融將輯其遺詩而問序於予是以追憶與元朗平昔論文之言叙其仕進出處之大畧如此若元朗之詩之卓然名世而必傳於後者此則天下之公論也故不復詳著云澤州陳廷敬撰

西齋集原序

觀夫班氏兩都世傳漢史蘇生千里家續唐風余從祖梅村先生抗步三君起衰七子激揚文苑沾丐詞林張茂先人倫冠冕任彥昇儒雅宗師中朝麗冊手筆如椽南斗高名心香未燼啓康樂之鳳毛挺子安之珠樹叔氏元朗靈襟卓秀英氣無雙應聲答賦七齡儼若成人走馬裁詩一語驚其長老當穎上稱龍之日已周南遺草之年葛帔流離菡書勤苦山公幸在延祖振其孱孤王粲多才中郎呼爲小友捧蘭臺之鉛槧涕淚長俱調玉局之

西齋集 卷序
一
宮商風裁宛似方其牢落滄洲疎狂白袷春鶯秋
月類結沈放之緣水驛山邱不乏悲涼之本酒沾
芳翰醉墨橫飛燭燼風簾清詞早就卜居以古錦
名溪寄館復彩虹臨幌三吳高會六代荒宮景陽
井畔象管新聲西塞山前驪珠絕唱已而壯遊入
雒弱冠渡江張平子盛挹清華顏延年互推藻瞻
長安落葉秋卷閒敲易水懷人悲歌間答朱華點
筆吟依西府之蓮澹墨題名笑折東堂之桂于時
靈臺甲帳寫禁籞之繁華周鼓唐碑悉鴻都之典
麗館荒碣石故國叢愁驛夢慈恩山郵斷札鮮不

鏗錡備韻欬唾生香盧駱効其前驅應劉為之却
步至若浮玉神區翠峰別墅八志成編遠給尚方
筆札三條舉例頻抽秘閣圖書迴祖禹之史才發
聖俞之雅藻帷褰明月製翦秋雲几席湖山賓徒
魚鳥崔劉結唱淒涼白傅之門沈范生憐清省何
郎之句又若錦標歸里吟社尋盟謝朓明霞風流
兩詠江淹碧草別恨三年流連杜曲之篇散誕庾
園之賦雙桐表逕萬柳名莊逸格珊瑚爛熳斜陽
短什春風紅豆蕭騷子夜哀音彬彬乎該質文兼
雅怨矣間從規摹標格叩擊源流鎔鑄三唐牢籠

西齋集 原序
兩宋西崑登工部之堂東坡嗣昌黎之席海立山
飛龍翔虎躍它若宮體綺靡香奩纖豔長吉鬼幽
玉川怪譎不堪屈作衙官當其僕御也邇從閒居
之次芟刈叢殘標題甲乙離為若干卷命曰西齋
集昔在吳兢三朝良史萬卷家藏名勒高齋書傳
總目叔氏漁畋六藝漱潤羣芳陋韋莊之短編軼
孫樵之別錄希風往詰畢志斯文茲集所載譬猶
瑤圃積珍微窺片玉清商九變偶聽希聲示大雅
之權輿極名流之鼓吹翊之先大父成都公偕司
成公望協三何情諧二陸南樓花萼文史縱橫西

益鶻啼篇章沉痛世本謝庭之誼少聯阮氏之遊
揮盞則人笑狂生握麈亦家多名士雁沉河朔不
斷紅箋花落江南同憐青鬢與檢聯珠之集僭論
夢草之編操翰逡巡臨文感慨十秋荏苒樂彥輔
證此微言一字咨嗟王仲寶兼斯雅量小山承蓋
願隨江表同盟巨壑朝宗待印詞壇宿老云爾康
熙癸酉清和姪翊謹述

西齋集目錄

卷一 詩四十首

鹿樵感舊六十韻

吳中吟五首 有序

貧富婚

官祠

脊令怨

江令故宅

南朝雜詩十六首

和振西贈王將軍紫厓

談笑客

歌舞妓

青溪小姑祠

秦淮燈船歌四絕句

西齋集
目錄
題陳琳墓

黃河

順天八觀 有序

石鼓歌

黃金臺

憫忠寺寶塔頌唐蘇靈芝書

白堦

金魚池金之魚藻池

東嶽廟像元劉正奉塑

南海子

豐臺

禮部觀樂歌 有序

卷二 詩六十七首

觀蘇文忠公表忠觀碑真蹟歌

碧山堂鬪酒詩三十首 有序

萬壽酒

內醞

蒲萄酒

荔支酒

紫陽酒

太和春

墨露

賀蘭酒

養榮酒

乳酒

桑落酒

玉酒

秋露白

金莖露

羊羔酒

蓮葉露

房山酒

薊酒

滄酒

漚酒

易酒

甕頭春

潞酒

羅家黃

菊酒

橘酒

豆酒

苦蒿酒

章邱酒

涑酒

僻間讀姜西溟籠蟋蟀詩輒依本韻

席上贈張穉昭八首

蹴踘和座主東海公韻

廣陵禹生王會圖歌有序

詠腐四首呈座主楊翰林

題禹尚基卜居圖卷三首

斷硯歌和西溟四首題鄒氏采蓴圖四首

西齋四首

閒居約客為投壺之戲漫書四絕句

過王太常東郊四首

崑山石歌有序

卷三 詩七十五首

和東海尚書公山居三首并序

浮香堂夜話二首

西齋集
書局閑坐寫懷疊前韻二首

陪東海公汎舟龍頭山觀荷四首

湖上送沈昭嗣同年歸杭州

慰查夏重下第

陪東海公同書局諸同年登莫釐峰二首

余舉第二子信至將東歸呂山瀏同年贈詩

二章即次其韻

題夏重放鴨圖四首

讀中州集周迂齋著詩同唐實君同年各賦

十四韻

贈織屨翁四首有序酬夏重夜坐有懷

效范文穆城西道中詩十二首有序

伍相廟 昏口

香山 橫塘

越城 石湖

楞伽山 越來溪

翠峰寺 柳毅井

武山 雞山

大雪用東坡聚星堂雪韻有序

辛未二月八日循東山脚至豐圻看梅同遊

西齋集 目錄 四
顧抱山詩先成遂用其韻

登抱山所居小閣見衆花爛然一老獨坐輒
用前韻贈之

是夕枕上不寐復用前韻簡實君山瀏
山瀏肺疾四用前韻

東山雜題十絕句

水閣遣懷呈書局諸同年二首

石湖歸舟遇大風雨野宿湖口望城西諸山
漫書五絕句

題宋處士龍洲道人劉改之墓

送實君之京師

辛未十二月二十日謁東海尚書公於里第
尚書銜 恩感舊涕泗盈尊侍坐徘徊愴
然成句凡十二首

卷四 詩七十五首

書丙寅桃花詩卷後六首 有序

檢亡弟中麗手錄詩卷二首

觀棋有感六絕句

虞山翁司空奉座主東海公從山北破山寺
登劔門觀拂水紀事二首

西齋集 目錄
題汲古閣四首

送毛魯公之揚州六絕句

送余不遠歸將樂二首

雪後讀唐書偶題紙尾六絕句

西湖雜感十六首

舟泊吳江垂虹橋用蘇韻二首

遊西山歸馬上雜書兩日所見十絕句

靜明園

玉泉寺浴

碧雲寺

退翁亭

金朝松

循澗路尋圓通廣泉諸寺

卧佛寺娑羅樹

晚宿香山寺來青軒

歸宿洪光南院二首

題玉泉寺壁贈輪公二首

端表堂歌呈大名觀察陳公

有序

遊大名雜題絕句十首

有序

別西山

楊忠烈公祠堂

滹沱河

漳水

邯鄲二首

戲簡俞元城

五禮碑

西郊觀河北婦人走馬戲

留別同遊諸君

卷五 詩六十首

送陶子師同年之官昌化

東海公挽辭四首

送陸士迪同年之官新建

題徐太僕遺像

題韓學士寒碧齋

過何屺瞻

吳門送唐實君同年王次谷表兄同入京師

二首

醉後題牡丹

有序

城南歸泛舟後園小池

別山詩八首呈里中一二知己

潤州二首

四月十日過江野宿揚州用前韻二首

淮上復用前韻寄西厓二首

過淮寄少融弟二首

沂州屋壁見查夏重昆弟與翁康飴同年倡

和小詩戲書三絕於後

送胡嘉言歸竟陵四首

食蟹次實君韻

題項霜田讀書秋樹根圖

題王野航同年竹深荷淨圖即用杜句為韻

賦得六言十首

王給事麓臺為余作倪黃小景圖成報以長

歌二百八十字

九日高江村苑西 賜第即事四首

芝巖詩有序 送項霜田歸錢塘四首

戲和朝雲詩有序

乙亥除夕前一日西溟文饒西厓友鹿偶過

實君考功小飲明日友鹿即事戲成一篇

示余因次其韻

卷六 詩七十三首

丙子正月十一日西厓編修席上同用昌黎

醉贈張秘書韻

十三日實君考功齋小飲同用東坡岐亭韻

同西厓再用前韻送王雄飛之陽山

元夕同用樂天明月春風三五夜為韻分得

春字

題高江村所藏丁南羽洛神圖後四絕句

送王文在同年之官鄴都

送錢朗行同年之官茂名兼簡令貽

送錢石城之官洛陽六首

湄亭詩二十八韻為趙文饒作

書崑山相國感蝗賦後二絕句

寄陶子師

聞沈昭嗣辭監利令歸杭州

秋夜讀白詩寄西厓八絕句有序

醉歌贈畢將軍

彭直上同年五十生子余為誦東坡我亦從

來識英物試教啼看定何如之句直上屬

和其韻

消寒唱和詩十九首有序

雪韭二十四韻

鴉二首

題狄向濤嘯亭工楷妝梅二十韻

航船二首用東坡文骰子二首和揚孫

石毬

剔墨燈二首

鼓燈二首

鬪雞燈二首

葡萄燈二首

花場

第三女晬日戲呈座客二首

題春帆梅信圖後十四韻送向濤歸溧陽

題觀察陳公石湖圖三首

效元白代書體寄西厓一百韻

送張漢瞻歸省嘉定

過碧山堂杏花下與西溟感歎舊遊凄然成

詠

廣濟寺海棠用東坡定惠院韻

閏三月十四日宋工部堅齋招同萬柳堂送

春二首

題史耕巖學士下直讀書圖

夏夜與劉西谷同年論詩有贈三首

次韻答西谷

豆花圖二絕句東野航

酬西谷戲贈

長歌贈王山人石谷

題曹渭符采菊圖

寄題許不棄奇逸堂

卷七 詩八十一首

初除戶部呈一二僚友

城南八絕句和西厓

遊旃檀寺三十韻

從楊次也乞周兼美人畫

送令貽之官銅仁四首

九月六日于禮部章雲招同黃自先孔東塘

劉元歎三僚友小集分賦得元字

燒香曲題野航所藏美女熏香圖

詠黃刑部自先庭中秋柳二絕句

移居答野航見寄韻

再用前韻東戴評事占攷

張寄亭同年席上詠石花魚得職字

和元微之醉詩十二首

先醉

獨醉

宿醉

懼醉

羨醉

憶醉

平病醉

擬醉

喜勸醉

任醉

同醉

狂醉

紙衾和次也韻
大理石屏歌

和野航金水橋咏水禽四絕句

元祐黨籍碑歌

次陳侍讀白桃花本韻二首

寄懷西華令徐去矜同年

苦熱寄西厓二首

題王山人石谷騎牛還山圖

西齋集
山人以所寫竹趣圖見贈題四絕句報之
九日同西溟野航西厓蕉飲登慈仁寺毘盧
閣用亭臯木葉下爲韻各賦五首

詠野航齋前所蓄白鷺雛

題喬無功蒹葭書屋圖與西厓夏重同用東

坡寄傲軒韻

與西谷誦夏重竹林僧舍用昌黎短燈檠歌

韻之作因各次一篇

喜西厓改官給事中

午亭山村圖歌爲澤州尚書陳公賦

題顧進士有常雙喜圖

送西谷視鹺津門

毛生子開歸黔中用昌黎雪後寄崔二十六

丞斯立韻東令貽

酬陳子文員外見寄之作

題新城王尚書荷鋤圖

咏燈花二首

次韻蕉飲東西厓

楊郎中種白蓼花一本於戶部廳事前幽意

可愛秋來凋落感賦長句

題朱悔人詠王尚書齋居草木詩後

高堰行寄戶部侍郎德州田公

移居和白傳與元八卜鄰韻東松坪二首

題趙松雪畫淵明撫松圖

酬子文寄題西齋屋壁之作二首

唐玉笛歌

十一月二十五日送雲岡歸松江用東坡別

王子立韻

代錢衡送別再用前韻

雪夜和馮留士韻

卷八 詩五十九首

新正同松坪柴木蕉飲西厓詠盆中三首

松

竹

梅

藥酒

紙帳用東坡韻

題西厓所藏元王孤雲畫九成宮圖

和人詠筆牀

題汪悔齋太常觀海圖遺像二首

七夕澤州陳公召飲邸第即事二首

登澤州公宅晚晴臺限晚字

遊城西南三首

呂仙祠

黑龍潭

陶然亭

同夏重詠白杜鵑花

贈東海公孫于朝兼簡師魯

水匱歌

有序

壬午十二月二十九日

召入

保和殿

賜

御書

臣曠

得唐祖詠詩闌前花覆地

竹外鳥窺人十字即事紀

恩有作

詠白丁香二首次子文韻

題徐虞門都諫宣沙視牧圖

三月九日過子文隱綠齋看花小飲次韻

送翁康飴同年督學廣東二首

題子文夢墨樓

寄題龔敬立意止齋即送其歸婁東

送杜讓水之官處州次子文韻

蹇驢

王少傅文靖公挽辭

從兄條聞訓導望江詩以慰之

詠庭中老樹次趙恒山韻

追和令貽戊寅詩四首

沂州旅夜見寄

三月三日遊城南

西齋集
戊寅正月至京師作

題西齋詩卷後

題蕉飲使滇集後四絕句和西厓

和令貽十月四日 乾清門引 見

和令貽十月七日 召入 乾清門 御試

冰魚 鐵脚

題夏重初白菴圖

恒山冬夜不寐以二詩見示輒用韻和之聊

廣其意

癸未除夕

次韻西厓正月二日遊憫忠寺過潛夫別墅

送徐去矜知永康州

重送一首

正月十一日查夏重蔣揚孫二翰林侍直

暢春苑枉顧宣武寓居輒贈四首

花朝同令貽寅谷蕉飲詠西厓齋中梅花水

仙二首

二月十三日 賜朝鮮安南二國鞍馬銀帛

於午門外余與子文曹長見其二國使臣

畫地作詩因命小吏授紙筆令書詩亦清

雋可喜歸次其韻

附安南鴻臚卿何宗穆詩

戲代朝鮮使臣答安南贈詩仍用原韻

卷九 詩七十九首

和令貽三月一日得 旨銓注諫職

次韻西厓留題王敏行取園

初入諫院呈諸垣長

石門少宰兄宅同宗人聚飲相與縱論吳中

山水余因極道洞庭西山風物之美投老

思歸慨然神往明日率成一篇邀少宰同

作

酬令貽同省見贈之作

和恒山贈履上人 諫院獨坐

送劉戶部禹峰出守真定二首

四月八日和西厓 四月九日雨中侍直

送許不棄之官陳留二首

送張韋存同年出守杭州

寄石泉令朱悔人次夏重韻

次韻令貽贈西厓都諫兼簡師魯

送子文出守石阡 道院納涼和夏重

甲申七夕席上限瓜字

和令貽晨入諫院 晚出右掖和同省諸公

七月二十六日同詠燭得真字

重表姪支彤九夜過老樹軒與恒山感歎舊

遊賓客都已散去惟恒山獨存次韻二首

陶母歌二絕句示駿文柱中兄弟 有引

和令貽省中聞鵲聲有感

十月二十八日 召翰林院編修 臣奕清禮

科給事中 臣銓同 臣暉入 暢春苑即事

恭紀

二十九日再紀

題錢朝采折枝畫四絕句

南郊致齋之夕與西厓都諫同宿道院有作

奉和澤州相國 賜貂紀 恩之作

歲暮省中書事二首

十二月二十八日拜 賜 御書歸行 太

和殿西見牆外梅花一枝嫣然獨秀感而

有作二首

除夕和西厓用少陵飛騰暮景斜為韻五首

正月六日喜雪

十六日澤州相國蒙 恩 賜宴私第招集
點翰堂即席屬賦

西山

次韻夏重下直偶過令貽西亭

閒居雜詠六首和周遽菴都諫

澤州公扈從南行舟次潞河寄詩留別敬次

來韻

栖隱堂詩四首次西厓韻兼簡夏重

喜少融弟至京師 賀令貽洗兒歌十首

四月二十三日晚出右安門留宿王文靖公

芍藥花墅六首

振西姪至話舊二首

對鏡

卷十 詩五十九首

一官

五月二十日寓止夢綠草堂諸君携酒過慰

即用夢綠二字分賦二首

送王雲衢之官新津

七月二日有感二首

自嘲二首用前韻

西齋集
目録
次和西厓送別令貽二首

西厓復用前韻見貽酬答二首

謝澤州相國贈馬 哭野航

題澤州公河上集後五首

滄浪亭歌用歐陽公韻寄宋中丞

聖安寺觀蔣樹存繡谷圖題四絕句

下直後簡兩殿諸公二首

八月十二夜憶家有作

題宋翰林山言學詩圖二首

與西谷

乙酉九月十五日 上從 行宮避暑回 臣

曝 同武英翰林諸臣迎拜於新屯道左放

斥餘生自分長離 法從猥蒙 異數再

覩 天顏因念自立 朝以來首尾八載

感陳跡叙 新恩得詩凡十有二首謹於

二十日伏 暢春苑小東門外恭 上

寒孟和澤州公出城感懷韻

甲申十月曾蒙 恩 召入 暢春苑東書

房有即事紀 恩之作休官後已分絕跡

今十月二十日復 中旨被召悲感舊事

追用前韻

冬夜寓宿僧寺與麓臺學士夜話

題顧南原所畫東坡像

陳潛齋學士席上詠菜

送陳秋田之官荔浦

春旱

霖霖二首和龔叔度

題家藏二草堂畫

王叔明黃鶴草堂

董思白盧鴻草堂

松花石硯歌

贈書局三同舍戲用東坡體三首

顧南原

蔣樹存

徐亮直

酬子文洞庭湖見寄二首

西齋集

西齋集目錄終

西齋集卷第一

太倉吳 暲元朗著

男 霖獻可編校



詩四十首

甲子乙丑注來金陵丙寅入都作

鹿樵感舊六十韻

長春坊底路西角俯江湄宋玉誅茅宅陶公采菊

籬街欺烏柏樹門老碧梧枝草木哀遺澤風流數

昔時甲科收物望弱冠得華資玉殿喧名字金閨

豔履綦陸機題賦麗蘇軾起文衰

先公授編修制詞云陸機詞賦

早年獨冠江東蘇軾文章一日喧傳天下

報主憂萋菲登朝疾喔伊太

真偷國柄德祖結忠規黨籍推南部軍書念北陲
詞臣猶抗疏元老尚懷私彌遠藏心禍張湯貫面
欺幸臣方轉橫復社正危疑楚國文投沅梁園詔
渡淇朝堂安燕雀御史擊狐狸北寺詞將及西臺
獄未治雞籠新絳帳雀扇舊銅池才子龍門聚生
徒玉塵隨羽觴花月會彩筆鷓鴣辭南學傳新語
東山劫舊棋何蕃遣衛索黃琬泣湘纍國事看崩
解時艱閔諭訛顛危憐死友撞壞指纖兒賜告青
宮傳歸來白接羅四郊銅馬亂一哭鼎湖離江左
朝廷小淮南節鉞罷西園諧近價東第選名姬神

武冠方挂新亭運已移通天殘甲帳落月夢彤墀
故國澄心紙行宮玉樹詩永和春草寂西苑暮笳
吹蘆葦單衣隱煙霞小築卑周南開 聖代河北
建新基願治宵衣切旁求側席宜俄聞鵠板召刺
促鶴書披固請楊彪病還勞魏倩知許衡朱服重
裴頠石經遺帳殿鴻都講丞嘗太學祠哀章辭鳳
闕舊隱守魚坻老吏歸虞集宗工走裕之人沾任
君筆家乞蔡邕碑圖史烏皮几賓遊白玉卮徑穿
王儉府社赴遠公期戎馬黃巾紀春秋白筆持

有綏冠紀畧十二
卷記明季流賊事

沈家齋閣詠庾氏小園詞疏澗

先公

流花緩迴船載酒遲荷香通密坐柳色冒方陂荏苒文章盡飄零故舊萎鄭公餘帶草董相敝書帷祖德同靈運家風媿衮師壞牀春不至廢壘燕無窺小巷思旋馬閒扉聽鷓鴣庭荒雲易受梅瘦月難支鹿砦平如案屏山近若墳橋封千戶竹畦長一園葵藤結將傾石花留未敗安山邱誰灑淚葛帔獨攢眉沉酒徒遭笑清狂豈用醫未堪傳典籍何計作門楣歎息思前事蕭條不可追

吳中吟五首 并序

伏居閭里偶於二三時事有所傷感因做

白太傅秦中吟體聊攄已見直賦其事即命曰吳中吟

貧富婚

人生有家室相結在門楣男女重金錢不敢論容姿男家居大官婦家擁高貲相貧互相愛妃匹曾何疑祇有一時目各無日後思誰料不十年門戶分盛衰主人泉下死納采無常儀新婦初嫁至恍惚猶嬌癡日紅牀不起堂前拜姑遲姑恐失婦心典鬻百計楮婦怨猶未終悲極不自持出口責父兄何故獨棄委吾家豪侈族設宴陳金卮耳獸絲

西齋集 卷之一
竹聲口獸梁肉脂目中不識此安用相苦爲老姑
慘不言向壁雙淚垂昔娶欲自安今娶朝夕危但
思婦娶婦更娶誰家兒

談笑客

朱門奔走徒妙伎各自爭中有談笑客善窺主人
情衣冠飾儒雅舉止類優伶置之隅座間能令貴
者傾狎筵與博場交驩如弟兄自矜事人巧歌笑
徒盈盈口角鼓雌黃唇吻搖重輕喜怒不自由常
作無情聲主人筵上物一一比瑤瓊池臺三蓬島
盤饌五侯鯖冷齒時安排巧舌次第呈主人深信
之語語爲至誠得寵夢寐喜受恩妻子榮遂使閭
井間南北相邀迎無知恣譏笑白日驕儒生

官祠

松檜蒼然直迤邐虎丘路纍纍山下祠相離不數
武樓閣高連延薨標亘迴互問是何神廟皆云大
官作勲名石上留形像生前塑朱闌護影堂庭砌
植雙樹前後如傳舍不耻習爲素歲久疾其名聞
者猶恐懼回憶未髣髴居官跡可數屬吏戒廉潔
百姓重役賦何爲置祠廟乃使青山汙我聞練川
令守節上官怒借事令去官送者淚如雨至今六

西齋集 卷之一
載後誰以木主祔嗟哉此自愚富貴草頭露十年
爲平地荆榛竄荒圃不見忠孝祠尚被府兵住

歌舞妓

歌不歌竹枝秋雨空凋落舞不舞柘枝春風易寂
莫目斷年少年朱門悵寥廓憶昔十年前東鄰教
弦索傳頭魏良輔結束黃番綽花霧夾路重暗春
通畫閣定子曉妝成臺上傳張樂蠻鼓一聲發鳳
笙相間錯嬌喉騁明珠羅袖東風却盈盈掌上人
舉步香塵作疑霞光更疑似柳腰如削人間歡幾
何風流去猶昨主人死泉壤用盡黃金橐無心理

廢箏空樓屬魚鑰貴客徵明珠收之置錦幕重檢
舊羅衣更爲他人著

脊令怨

堂下紫荊樹花開並雙束堂上脊令鳥朝飛並雙
宿鳥來花上啼似向花前祝終願兄弟羣長得如
此木大雛引吭鳴小雛衆相逐一朝堂下花零落
西風速小雛大於力日出穿人屋架攫作勢猛紅
腐爭梁穀小者飽自矜大者不滿腹以此粒粟間
起鬪成怨讟傷心堂上謀暗欲啄其肉秋原青草
枯破巢不可復重來紫荊下花花尚相屬自痛不

及花同氣無戮辱回頭顧舊羣昔聚今孤獨

江令故宅

三畝南朝詞客家門前風色鎖煙花波連竹樹傷
心碧春到蒼苔落日斜奏伎宴中忘永夕修心賦
裏恨天涯攝山一自無恩幸流水年年哭麗華

青溪小姑娘祠

玉殿香塵掩鳳帷蔣山家宴暮歸祠少年敢彈中
庭鳥舊恨虛傳樂府詩神館空存滋蘚綠靈旗無
定拂花枝風流江揔東鄰住莫道遺容盡不知

南朝雜詩十六首

金粉江山四建臺南朝天子只多才文章自是傷
心本歌舞從來破國媒

葛燈麻拂攬神州連理堂前失帝邱可惜石頭袁
粲死隔江猶唱白浮鳩

褰帷望幸飾華裾密作鹹漿灑地餘不是徘徊君
意在閣門那得誤羊車

八座三蟬風則中芒鞋雀扇對春風山陰面首鬚
髯客錯認吳興小褚公

江左文章志不虛優龍劣豹綺羅餘人間誰似蕭
思話腰鼓新拋解讀書

趙鬼西京誦開庭飛仙帳下畫丹青三千秘閣都
灰燼奪得珠宮九子鈴

綠屨光搖白鷺縷潘妃壚畔步蓮開紗籠夜半張
宮市天子曾爲屠肉來

楊婆婆斷曲依稀阜茨橋西柳絮飛刀救人間諸
鬼夢茹家花藥阮家衣

御刀張索要人名貨主都將炙手爭獨有吳興沈
昭畧一生不善事公卿

琴曲圍碁送國亡名家子弟百無強玉環好賜新
亭客馬稍風流憶柳郎

春草齊宮鎖禁門妓師清宴舊承恩座中沈令還
相識淚向君王不敢言

詩筆哀辭鬪絕塵三孃才調足清新烏衣馬糞諸
年少不及劉家七十人

隋帝親將戰艦陳八姬十客散芳塵此番不是空
圖畫玉甃前頭見此人

狎客新拈彩筆輕牀頭密啓閉軍聲分明恨煞韓
擒虎十幅花箋擘未成

玉樹摧殘商女悲江山水調恨當時麗華新斬宣
華寵不記亡陳爲阿誰

西齋集 卷之一
桃葉歌中三閣荒蔣山妖鳥喚斜陽南朝半壁傷
心畫應付丹青顧野王

秦淮燈船歌四絕句

玉鉤燈火漾雕簷畫漿雙雙觸比鷓六代繁華煙
水夢青溪十里是珠簾

火光獵獵北風寒曾向周郎鬪艦看紫氣黃旗零

落盡江東留得小長安

孫權于武昌新裝大船
名為長安見三國志

南國佳人巧笑輕華燈細剪號長生石城艇子新
裝了載得閑愁遂步行

大航西去白門斜還識秦淮舊酒家料得小姑遊

夜月釵頭也點石榴花

和振西贈王將軍紫厓

九尺鬚眉七十身眼中遺老更何人將軍競病詩
無敵弟子丹青筆有神談笑尚能開霹靂太平不
復畫麒麟酒酣拔劍聽君語為感窮途意自親

題陳琳墓

文章繁富建安中幕府翩翩接席同萬草軍書雙
記室一生恩遇兩英雄南皮遊賞知音絕河朔才
名下馬工獨笑移書曾辱祖頭風還可愈曹公

黃河

天爲門戶地爲襟滾滾黃沙白馬沈赤岸忽開疑
火氣濁流無底似人心乾坤怒色消難盡百萬雷
聲走至今未必靈槎識銀漢仙源何事不容尋

順天八觀 并序

東坡鳳翔八觀詩蓋謂司馬遷李白以禹
穴七澤之觀登涉千里歎其時之士大夫
有朝夕往來之地而不暇觀也順天爲京
師都會多遼金舊蹟元至正中迺賢易之
與宇文太史危太常梁九思黃殷士朱夢
炎四明道士王虛齋等七人聯轡出遊賦

城南詠古詩十六章而還迄今四百餘年
遺音不繼余留客京師徘徊郊市俯仰陳
蹟非若士大夫必需休沐下直車蓋觴咏
而出遊者故其爲觀少易登臨餘暇綴述
歌詩以石鼓屬靖康北徙之後置在太學
仍冠諸篇首其下摭采舊聞輒依八觀詩
例撮其繫興亡之大者署爲八篇庶他日
附易之後塵以傳之好事焉

石鼓歌

天子詔下舉充貢諸生濟濟來四方我生江東二

十五登名太學趨廟堂大成門內見石鼓手摩欲
讀心旁皇天地歷劫存至寶平分劍氣欺星芒蘚
苔皴剝爛瓊樹風雨嚙蝕殘圭璋堯碑禹碣同漫
漶六經九鼎時淪亡李斯凋謝蔡邕死蛟蛇竒字
誰能詳韓蘇精靈為磨洗遂使三代留文章嘉祐
四百六十字細文淺刻猶成行憶昔天興出灌莽
一徙鳳翔再大梁宣和天子好珍玩稽古小閣列
御牀十鼓不許置講舍龍文鳥跡黃金裝靖康寶
物盡北徙唐碑定武失路旁玉女窗扉鳳凰柱華
蟲脫落彫琳琅鼎彝三館散精彩書畫四庫殘縹

緗橐駝羶包致千里此鼓偶幸存倉黃王宣撫家
剔金飾委棄區脫埋垣墻中原一錠購十紙故家
墨妙誇收藏元朝祭酒尚儒術大車數乘輦上庠
雕壇五尺安妥帖紅闌十丈相遮防皇慶至今五
百載衝天夜半生神光嗚呼此鼓閱世變骨立千
載無滄桑共和春蒐軼柱史貞觀打本起侍郎西
京舊事痛沈沒東觀餘論悲蒼涼歐陽集古浪考
索石林書跋空低昂薺堂先生強解事白水西狩
殊荒唐金匱玉檢不傳世天使此鼓垂無疆舊從
拓紙夢見之詎意今日副所望徘徊廟門不忍去

石鼓石鼓何焯煌

黃金臺

西風誰灑淚野哭昭王墓死馬與生士千金同一
顧嗟哉荒臺平此意無可語悠悠霸圖歇興亡既
云屢豈知百代後樹改五陵路車馬白日昏鶴蓋
四方聚歌笑費珠玉朱門無握吐可憐青雲人金
盡亦不去空餘郭隗坊故鬼啼秋雨

憫忠寺寶塔頌唐蘇靈芝書

有唐天寶載天子盛開邊諸將弄兵柄四海生烽
煙祿山僭東都思明更大燕穹廬緩馬腹勅勒摩

鳶肩翠華睨龍尾紅帕修戎旃軍中胡旋舞殿上
勸進箋私蓄華清女漫藏禁府錢蘇生寶塏頌字
類磨厓鐫參軍紀功德御史稱哲賢依稀媯川王
漫漶至德年我來古蕭寺落葉秋風前捫碑再三
讀筆勢猶翩翩往事安足歎滄海相變遷何人香
火社留此金石堅歸來踏荒草興盡心茫然不知
蒼煙中哀忠誰墓田

唐有哀
忠墓

白塏

蒼茫白塏跡上溯遼壽昌石闌飛寶蓋珠網懸雲
裳直從木葉山分此牟尼光流傳元世祖發視銅

西齋集 卷之一
瓶香舍利耀金粟釋迦含玉漿宣示至元寶跣守
二龍王大府尚雕飾霜瓦殘鴛鴦華鬢挂簷柱玉
杵垂旌幢咒鉢佛圖澄黃帽踞胡牀春城爛遊賞
王孫停驂驪十五燕趙女月板雕輪狂斜日墮兒
紅舉袖歌徜徉一鈴獨自語誰辨替戾岡

金魚池金之魚藻池

崇文門西城婉孌斜日龍葱沙草茁明昌大定舊
風流擊球射柳元和殿妝臺傳問李宸妃青紗隔
障宮鶯囀瓊花樹底刺蘭蒿太液芙蓉歌一片佳
節金源重端午瑤池走馬奔如電玉驄夜入宣華

門同樂春波印彩扇金纏槍竿簇飲飛玉鳳簾鉤
照宮宴一自龍髯斷不還宗社邱墟陵谷變幽蘭
軒上夢幽州已報元師臨蔡汴故國空存魚藻池
野老春風淚如霰

東嶽廟像元劉正奉塑

元史方技傳劉
元薊之寶坻人

山河繡戶龍袞動誰其塑者劉正奉岱宗英爽悶
立都炳靈盛服百僚總雕梁鼠不敢銜鬚玉座土
猶記髹孔秘閣圖追魏徵像冠劔森羅列鞞琫遠
媿吳生畫林甫朱墨宮牆假恩寵四相干官鶴鷺
行冕旒旌旆紅雲滃羽箭弓刀褒鄂姿碧殿陰沈

毛髮竦我聞至元天子購竒工西天秘密中宮重
杜宇居庸叫作塵仁聖魏峩廟猶拱玉柱銀牀雲
物興東望乾封氣龍從

南海子

長安輕塵飛十丈九陌相逢媿顏狀城南春水光
如海到此心神忽清曠玉樹樓臺江左風金隄楊
柳靈和樣畫浪輕煙濺鷓鴣似聞水調從中唱當
年行樂竟何有荒煙碧草空惆悵大紅門影出旌
旗黃埃店外分弓韞龍沙秋盡獵熊歸雪爪星眸
好飛放射鷗風卷白鼉裘詐馬筵開黑貂帳至今

七十二泉清曾照名王尚無恙只憐二十四園花
零落春風御溝上

豐臺

南問草橋路走馬豐宜門芍藥遍野圃錦繡流朝
暎平隄亞淺水酷似江南村吾讀謝公詩西直當
階翻感傷王黃州故事留掖垣淒涼昔夢歇揚州
招花魂寧知都城南三逕春風暄清香四鄰遞金
縷千枝繁相公連理廳朱萼盈邱樊問之燕老人
藝殖傳子孫甘泉汲終歲冬藏宿火溫小車載九
陌東閣飄芳尊豪家買花主屢換如奔轅相傳元

公卿此地多名園瀟漫不知處落日悲荒墩

禮部觀樂歌 并序

丙寅冬至前一日禮部葬式尚書左右侍郎南向坐有公卿服紫貂者二人東向坐堂之下金鼓雜作少馬陳百戲於庭執紅編竹器狀如小箕而左右向者數人騎而被甲載兵手旌旄弓矢之屬者八人戴赤色假面披黑羊裘橫刀而前者五六人進退止齊如戰陳然已而騎者勝橫刀者敗執戟獻醜如受俘然既退復有綵色戎衣

持一險竿而趨者一人隨而騰身跳踔往來如飛者數人訊之堂吏曰此高麗筋斗法也又有二童子各首戴瓊盆口銜一小竹枝上下俯仰以竹叩盆鏗然可聽凡其所爲悅心駭目之狀不可勝紀頃之本部梨園弟子上堂奏伎彷彿似元人院本之類曲終二人揜袖起舞動搖頓挫皆按節拍與堂右一人歌嗚嗚之聲相應視之則服紫貂而東向者也予既得從都人之後往觀斯樂退迺作詩紀之庶後之君子有

所傳信焉

黃花十月罷冬狩天門萬乘爭飛揚朱鞬側目海
青倦鷹人夜閉天鷲房大庖充盈從臣醉紫駝出
釜燒黃羊由茲三冬例脩讌玉階奔走儀曹郎數
人執旄導且立中權後勁參顏行三聲鬻粟撻鼓
動松山千騎驕騰驤颯如陷陳蔽原野歡如獲醜
獻廟廊虎臣稽首秬旨賜綠沈赤葆交旗槍須臾
參差手技入高麗筋斗各鬪強錦鞞絳帔往來便
翻身如電搖朱光花鬋頭戴口銜竹翻覆不墜聲
鏗鏘清商別部更前奏曲終爲樂歌泱泱公卿搢

袖起且舞銀貂垂手紛低昂回旋頓挫巧伸縮睥
睨驚座鬚眉張君不見太平天子盛明德合歡舞
樂登于堂以雅以南不僭籥朱離韎任都陳將何
如今日四海一優曇花下披雲章春官檔子拜手
紀治世之樂誰相方

西齋集卷第二

詩六十七首

丁卯戊辰在京師已巳家居作

觀蘇文忠公表忠觀碑真跡歌

錢王忠孝有吳越玉帶球馬真英傑乾符百戰八
都兵誓江東夏羅平滅衣錦軍中父老歡仰天歌
笑冠纓絕象犀珠玉甲十萬四王三世傳門閥有
宋真人出汴州南金大具修臣節納土朝廷貢篚
筐百年流涕存骸骨諫議上書比竇融表忠賜觀
丞嘗列文忠大書徐浩體端莊流麗刻於石豈意
熙寧存墨本貌妍璧美蛟龍結中興遠跨元結頌

昇仙下視薛稷碣古香滿紙寫英雄觀者如牆但
橋舌東坡曉書得書意百代流傳如畫鐵悼亡蕭
寺夜翻經小書貝葉留禪悅人間萬事總飄零玉
繩落落羲娥缺公為王夫人施書圓覺經一部今世祇存其半尚書好古
秘墨妙冠山高堂見遺跡風雨飛來妙因院筆陣
直與河山埒

碧山堂鬪酒詩三十首 并序

丁卯正月十七日禮部侍郎東海徐公召
弟都御史公及邸中賓從飲于城西之碧
山堂出所蓄名醞三十種為鬪酒之會凡

酒一種貯一小榼命御者遍觴座客告曰
某酒座客以次相屬戶大者至滿爵餘或
一勺而已明日都御史公為疏酒名各譜
一小詩繫之余諷繹之餘點筆繼作良以
不負此嘉會爾

萬壽酒

翠滿南山春滿壺帝臺漿賜日平晡天長佳節陳
金鏡好補幽風十月圖

內醞

銀鐙東閣畫屏開天上金尊漱澁杯傳語人間珍

重飲慈寧法酒日邊來

蒲萄酒

河東美醞配乾和八色春
醅馬乳多憂把綠尊同
沈約漢江遙借鴨頭波

荔支酒

王家春釀擅風流重碧輕紅掃
客愁誰似東樓花
月夜詩成子美在戎州

紫陽酒

朱尚書家釀

春泉過竹滴牀初馮壁松醪
那得如莫道郎官清
似水玉山先倒老尚書

太和春

一夜東風蕩客心萬家春色散芳襟
漢宮新釀無
愁酒錯比當年魯展禽

墨露

暗雨芭蕉曉色寒綠天菴下草書闌
誰將張旭頭
邊水灑向金人手內盤

賀蘭酒

碧海蝦杯萬里經烏蠻春酒濁如涇
漫教三勒誇
漿法烘透玻璃紅玉瓶

養榮酒

破除萬事醉鄉間一卷黃庭鐵石頑穿腸腐腸非
麴蘖人間留此制紅顏

乳酒

蠻玉醍醐泛玉花猩脣燕髀競繁華石鍾漫說三
千兩桐馬西來出漢家

桑落酒

鶴觴旅語索郎秋花下提壺共拍浮陌上羅敷空
悵望不知三宿戀風流

玉酒

衛郎風骨自神清麴市春愁倒碧觥瓊席祇宜織

手捧玉兒壚畔玉山傾

秋露白

西風如雨月如沙衰草團團滿徑賒夢到吳山人
不見一江秋水淡蘆花

金莖露

金人掌上露光餘罷獵期門獻賦初水殿春風殘
夢裏一杯誰賜渴相如

羊羔酒

學士風流詠雪花漫烹活火鬪團茶紅綃煖帳聞
低唱不是陶家是党家

蓮葉露

香在汙泥不染中
書旗青苧滿西風
玉池一夜龜巢月
滴滴紅珠滿碧筒

房山酒

西風吟望夕陽山
賈島菴前花掩關
誰解文章憐主簿
空傳酒價在人間

薊酒

黃崖秋水釀竒芬
雄武城頭一甕雲
灑淚盤山邊酒暮
燕人愛說戚將軍

滄酒

青帘孫媪尚當壚
不識高陽舊酒徒
寂寞漢王臺上月
蔡家曾此飲麻姑

漚酒

佳味無人與細論
搗香篩辣滿清尊
還鄉河水明于鏡
無復春流帶雨渾

易酒

白比衣冠清似筑
滑稽滿腹貯愁多
只今蕭瑟西風味
散出荆高一曲歌

甕頭春

南山牀下靜槽聲
畢卓鄰家釀已成
笑脫葛巾閒

自漉天門冬熟醉先生

潞酒

碧城絳雪落兵厨指點銀瓶興不孤却笑黎亭數
錢女浪將顏色比真珠

羅家黃

一色宮雅黯淡秋羅家無限額黃愁東鄰過酒如
相問新樣鶯兒出德州

菊酒

黃金瑣碎折幽枝獨酌同州官醞時芳氣六宮新

上壽尊中收拾小東籬

漢宮九月九日飲
菊花酒令人長壽

橘酒

洞庭春色味全殊觸手寒香天下無何事杜康遺
廟裏千頭也長李衡奴

豆酒

二頃公田種秫遲釜中欲泣更何爲且來東閣煩
娛客莫向南山去落萁

苦蒿酒

窮愁只可醉深杯芳醴何曾棄不材爲報蓬蒿張
仲蔚門前尚有麴車來

章邱酒

書帶堂前夢酒卮女郎山下賦新詩
繡江風月新荷會一盞遙酬元裕之

涑酒

山下流泉射碧衫送人清夢到江南
春風誰變金闕水一醉城東側帽簷

壁間讀姜西溟籠蟋蟀詩輒依本韻

官街小市翠籠擎閒和秋蟬斷續聲
楚國王孫愁似客天涯織女尚多情
西堂夢逐涼風盡北戶身同病葉輕
何事蜉蝣難作侶浪從牀下署空名
席上贈張穉昭八首

相府蓮歌樂府春清尊檀板話窮塵
誰傳天寶曲涼曲柳市當年舊玉人

金管雙吹亞笛牀吳兒歌串集華堂
只應紅燭崔昭宅羅拜當筵李八郎

花前葉底貢聲新夢斷昭華玉殿塵
記得雲間歌第一貞元朝士已無人

不堪叢鬢舞曹婆紅豆東風涕淚多
月落黑山南國夢一聲河滿奈君何

桃李芳年掌上輕綢繆人影月中行
春宵記否腰支在畫閣丁東十六聲

宮牆擲笛月波明天樂重聞似渭城莫唱連州怨
淪落舊人誰識米嘉榮

雲衣月扇學吳姬手把菱花黯自疑白髮青春餘
一笑風流十五上頭時

珠簾烏榜夢華餘十里金閭畫不如紅袖乞詩殘
醉泥江南狂煞老尚書

蹴鞠和座主東海公韻

齊市流傳三國風羽林鬪捷日華東董君門下丸
毛疾漢帝宮前蹋戲雄蹲沓豈離肩背上轉旋終
在股肱中幽州年少推棊局倒卷球衣學望空

廣陵禹生王會圖歌并序

康熙丙寅丁卯間朝鮮安南琉球賀蘭西
洋土魯番暹羅喇嘛阿羅斯喀爾凱凡十
國其國王李侗等各遣使入貢故事大鴻
臚引使臣見朝畢賜宴禮部時東海公
方官禮部侍郎公之客廣陵禹生之鼎善
人物公陪宴日輒命生囊筆以隨生從旁
端視疊小方紙粗寫大概退而圖之絹素
凡其衣冠劍履毛髮神骨之屬無不畢肖
圖成公取汲冢周書王會篇之義命曰王

西齋集 卷之二
會圖唐貞觀三年東蠻謝元深入朝中書
侍郎顏師古援周武王事請圖寫貽後彰
服遠之德乃命尚書閻立本圖之即東坡
詩所題職貢圖是也禹生天才雋妙無媿
古人今官鴻臚序班方充琉球伴使銜
命入閩他日以翰墨見知如唐太宗與侍
臣學士泛舟春苑池中召立本寫圖故事
此卷當與右相遺墨並馳譽丹青矣余爲
書長歌附其後時戊辰之夏五三日

武王西歸定西土諸侯八百朝宗周衣冠玉帛來

萬國石砮白雉歌懷柔貞觀天子英武姿珍禽瑰
產填神州故府丹青職貢圖東蠻竒服鬢耆留禹
生粉本追右相梯山橫海宣嘉猷折風大袖箕子
國晉唐人物端門遊玉具金丸西上詠碧壺春酒
雍容疇佛跡山前銅鼓客繡面墨齒檳榔投鬪鏤
樹下落滌船賓燧火毳衣裳脩西洋使相繪金碧
賀蘭貴主彈箜篌火州黑裘蒲類種蔥嶺黃帽浮
屠流緩耳雕脚金葉表太平織錦工新謳水草畜
牧玉門域秋風獻樂殘邊愁南北二庭盡請吏陸
地十國皆傳郵天闕千門射白氍名王萬里衣

綠鞵拜跪間曹効鳳舞刀七小宴嘗瓊羞甲乙帳
陳曼衍戲戍已官屬博望侯明珠文甲充內庫山
經水志編羣酋誰遣道子貌面目如聞鳥語中鈎
翰閭家兄弟舊墨蹟功臣學士毫端適凌煙一卷
秦府傳故國灰燼銅駝秋禹生禹生真好手風雨
下筆吞瀛洲錄名同上都護府伴使直押中山舟
尚書載筆紀正冊導揚盛事前無儔

詠腐四首呈座主楊翰林

十年京國比盤空頗馱饌花壓玉紅退食詞林無
箇事獨餘麤糲舊家風

淮南遺法食單稽穆賞風流漫品題天遣山厨滋
味好不教小宋負黃虀

北路魚家夜點菹安成美食恐難如門生鮓議無
須上好附周顛食菜書

故鄉風味性常耽却愧將軍腹未諳不負波稜有
知已葦章詩好憶渠南

草木子載元人程渠南葦章詩云祇宜豆腐與波稜

題禹尚基卜居圖卷三首

煙水三吳舊往還野人踪跡閉松關憑將一幅瀟
湘意買取寒江數點山

碧潮初定綠楊村黃篾船侵白草痕招手溪山欲

歸去釣竿影裏置柴門
屋外簷簷千萬箇門前鷗鷺兩三羣深籬東角野
花落卧數過溪明滅雲

斷硯歌和西溟

玉堂新樣波工製碧天照水涵星麗鳳味龍尾絕
妙姿隨身散草長安第文章點染忠義磨明窗大
几閒情多恨不春官貢天子錦茵玉匣求餘波硯
乎硯乎瓦礫異壁碎山傾驚墜地角缺空殘耕灌
泥池漏還濡弔秦淚絳川墨骨波磔開于閩青鐵
英靈閉繡嶺雲飛天寶塵鄴臺花斷興和歲柳家

悔發誠懸鐫涪老難忘文叔惠姜君弄硯不置手
三歎臨池失吾友野鷺家雞傳舊脚川媚山輝憐
敝帚十年枕上殘醉醒短檠牆角光青熒越藤妙
遣鍾王筆新詩夜哭陰山靈君不見隴西才子李
元賓曾乞韓公瘞硯銘

題鄒氏采蓴圖四首

圖爲陳仲
醇徵君筆

處士風流谷口招牽絲冉冉滑吳舫連天煙雨南
湖好不隔松江第四橋
傷荷藕白野菱紅更占琉璃萬頃風莫怪浮沉無
見賞由來佳味在泥中

西齋集
黃金羹色壑筵初蜀籍吳菘總不如却笑曹家左
元放銅盤只解致鱸魚

真柑喫罷手餘香盧橘分來齒更涼補入吳中好
風景并成三絕水雲鄉

西齋四首

蘇子文章仙萬劫才不死天地一小技落之詩卷
裏杜韓雖云亡大雅爲復起我嘗讀其書惘然不
能已如求蓬萊人失路常自耻偶覺神明通憐我
嘗小喜褰裳欲從之公平隔弱水公詩題左右一
室由茲始

詩人愛前賢長守遺書老樂天薄世緣靜退聞道
早東坡愛其名出處固了了

蘇公取白傳東坡詩以自號

何爲

涉憂患暮齒不自保古今兩詩翁神交豈草草成
敗偶然耳入世無拙巧吾愛密州詩晨夕置懷抱
長吟日危坐但覺吾廬好獨愁無兩翅異代毫芒
小譬彼說食人聞者何得飽

吾家河內翁嗜書如痼疾家藏數萬卷與身并爲

一可憐九朝後流落無故物一編舊目在過眼雲

煙失

唐吳兢有西齋書目

子生少也孤環堵唯四壁破籬付

子孫卷軸未放失江湖二頃田猶可具紙筆詩書

理宿好至老庶可必

讀書初上口酸鹹辨五味五千滿貯腹膏腴得清
氣俛仰百代上往往雜涇渭古人自有師善學乃
可貴長日掩卷卧花木課灌溉得時萬物變風雨
亦可畏生意固自有顏色天所乞

閒居約客爲投壺之戲漫書四絕句

袁粲門庭斷雜賓小闌花韻席橫陳温公新格輕
時輩天笑何須郭舍人

夕陽樹影置銀瓶風月持籌問醉醒閒話水天徵
往事祭家軍帳石家屏

花間竹矢入閒情玉女清傳隔院聲誰似鄴臺烽
火夜本初談笑黑山兵

銀燭前頭月滿庭擣菹局底聽撩零疎頑合頌邯
鄲賦不用人間五木經

過王太常東郊四首

喬木東郊墅風流自一區田園詩主客水竹畫工
夫逸叟曾呼漫遺溪尚識愚疑來北窗下小展輜

川圖

故相行春宅傳家有賜書門惟五世舊樹數九朝
餘綠柳藏孤釣蒼苔過小車老成吾尚及杖屨撰

西廬

通門先子舊心跡野雲間詩卷相招隱平生共愛
山兩家惟卜築萬事只柴關誰向溪堂上春風記
往還

林泉嗟共廢偷賞及餘春流水斜無恙殘山立有
神高松如避世野鶴媿逢人好與東岡約歸吳就
隱淪

崑山石歌

并序

石在太倉雙鳳里周氏家廟玲瓏絕秀相
傳四百餘年物也嘉靖甲寅倭寇入吳周

氏圖書第宅並燬于火而此石獨存潮州
別駕芝山先生具衣冠拜其下為詩紀之
其後子孫之貧者至以石質錢既廼還置
廟下至今其宗中遺老為余道芝山遺事
未嘗不流涕余恐周氏之久而忘是石也
為作歌以貽其子孫

鳳凰井上安東宅楊柳春風盛朱鳥寒瓊手采碧
山英衛公醒酒牛公癖玉女窗開湖口明高麗盆
藉仇池清南朝秩配司空位東第陰鐫甲部名昇
平二八歌鐘息海天忽竄卑奴賊萬里戈船邪馬

臺三吳烽埃蝦夷國采帽蒙衝下里閭海東墟落
燒田廬囊衣豈有焦頭賞竈鬼紛傳失火書伯仁
甲第荆榛滿中郎圖籍煙雲散子房歸見穀城山
元超流涕弘文館霹靂磻邊記昔年蜻蛉水畔仍
歸然銅盤脩供隨坡老袍笏相看拜米顛雷斧傳
觀尤物偶雪浪頻驚畫師走不逢射虎李將軍長
傍輕舟陸太守東城豈意改繁華零落珊瑚玉砌
花西平汗斷昭陵馬織女機空博望槎賜書舊宅
生葵葛折檻前朝墓碑沒竒僵淮水到公輸宛轉
瀛洲晉卿奪子弟荆山淚浣衣官道輸金倒載歸
洛郊鞞迹視黯淡蜀桐鼓韻聲依稀龜蒙吳郡鬱
林第還見巍峩遠祖意故家紙白蔡黃門遺廟盤
龍陶太尉吳塘鏡水白沙春玉峰五色高嶙峋珍
重衣冠四百載碧蘚摩抄祠下人

西齋集卷第三

詩七十五首

庚午辛未往來
洞庭東山作

和東海尚書公山居三首 并序

康熙二十九年三月東海公陳乞歸吳

詔以書局自隨如唐張文貞宋司馬文正

故事公以是年六月開局洞庭之東山書

史之暇間及觴詠公首賦山居詩三章傳

示賓客因次本韻

東觀西垣按部居牙籤萬軸載牛車集賢手筆詞
頭重元祐文章叢目初白髮乞湖新道士青山思

穎老尚書閉門碧草閑秋色獨把遺編恣獵漁
玉殿風流講席重故山歸去拂塵容門生爲致荒
厨菜禪客同尋舊院松夢後莊周從笑鷄書成揚
子解嘲龍歐陽筋力猶強健不羨扶携手一筇
著書不復爲窮愁獨樂園林散百憂人乍拋殘塵
海夢天教管領太湖秋槎形東第竒章石釣具南
江魯望舟從此終身巢許穩風光真擬洛濱遊

浮香堂夜話二首

文章格律事窮探風月閒情助笑談賓客蘇門還
得四

時唐實君沈昭嗣呂山
劉三同年同在書局

湖山蔣徑又開三西

山白雨跳珠亂東閣紅蓮中酒酣和叔秋來才思
好劔南佳句落江南

是夜山濶
詩先成

冉冉浮香颭淺波東軒清夢夕陽過螢將草質爲
光燄蛛擬人情布網羅心望大山真隱少歌傳小
海舊名多新詩安得如翻水倒卷波瀾瀉鵲河

書局閒坐寫懷疊前韻二首

五湖蝦菜好幽探來往休將世事談浪與琴書惟

配六

用歐陽公
六一語

不須影月定成三

時同寓
客三人門吞秋

水心偏遠筆戰青山興自酣十五年中媿劉范共
携才調在河南

仙治神居印碧波三吳載酒重相過鄭公不置山
中驛翟尉休題門外羅小閣芸香驅蠹少

宋梅堯臣有唐

書局中得芸香一本詩

後堂酒盞破愁多叢殘萬卷衝牛斗

直恐文昌接絳河

陪東海公汎舟龍頭山觀荷四首

青翰朱簾四面風
艣聲遙指玉池紅
玻璃十頃荷三頃
更入南湖水鏡中

山樓水寺畫沈沈
一葉如鷗近綠陰
却憶風流唐太守
畫船五宿太湖心

夕陽煙景好盤桓
詩句留題上畫闌
風月橋頭看

風月始知風月屬閒官

東山有風月橋

身退山林夢亦閒
歸田小錄記朝賢
風情祇說休官去
屋下春流屋上山

湖上送沈昭嗣同年歸杭州

太湖秋水碧如油
寶帶南連一帶愁
曉月西溪歌歎乃
新涼東閣聽颼颼
羣斜綠草今衰矣
眉淺青

山好在不在

白詩草綠羣腰一道斜蘇詩雲山已作歌眉淺並杭州佳句

料得中

秋小兒女杭州筵上說蘇州

慰查夏重下第

浪從時世鬪愁眉
科目聲名兩不宜
休泥人情嫌

中酒須知天意要昌詩風流尚占紅蓮幕詞翰猶
虛白玉墀若見雲英定相笑不如人處却因誰

陪東海公同書局諸同年登莫釐峰二首

靈湖漫漭斷山愁指點裁書謝白鷗上下天光浮
萬頃東南水氣壑三州怒龍碧蹴曾潭浪閃蜩紅
翻古殿秋斟酌何年從范蠡長綃帆席是歸休
浮天無岸數歸雲越浪齋鐘上界聞碧蘚自題前
進士青山不改故將軍吳縣圖經云相傳隋將軍莫釐居此故名銀房
縹緲仙都隔犀甲銷沉戰壘分金管玉杯空往事
千村煙水入斜曛

余舉第二子信至將東歸呂山瀏同年贈詩

二章即次其韻

歸帆無恙水煙中祖德詩成舊夢空餘蔭敢望垂
七葉伏雌何意舉雙雄已防官地呼長史漸愧家
人號阿翁自分終遭鄧禹笑浪將豚犬祝槐楓
充閭那得有榮光門戶無心計燠涼將相公侯徒
碌碌聰明愚魯尚茫茫已三年後身猶白余登第三年尚
不得第二雛生口正黃半臂祇愁無易處滿堂空
笑弄麀忙

題夏重放鴨圖四首

西齋集 卷之三
疎葦寒沙遠思迷輕舸戲鴨任東西閒情好付杭
州絹淡綠山臨水墨溪

骨格襜褕不自卑一村殘柳出闌時是中應著黃
山谷吟得秋江睡鴨詩

不與家雞浪鬪名柴門小陣下陂行蘆花梢底清
溪面似聽啾啾屈屈聲

小巧東風約畧天衆雛呼母避行船詩人莫打歌
相惜打破春波實可憐

讀中州集周迂齋箸詩同唐實君同年各賦

十四韻

老饕功第一大嚼用無方誰許朱門臭長分綺席
香職宜高俎豆位必列壺觴眠起難爲主貪廉不
自量截肪多熟徑擇肉有微長豈復逃葵蓼時猶
及稻粱納承脣吻便決助齒牙強送眼明如鶻將
心狡似狼失來常戰粟投處每披猖不待門生議
還先竈婦嘗鯽憑分鱠玉蟹與拌將糖枝剥唯充
口低昂總汗腸萬錢無下處十產被君傷獨惜黏
殘汁爲人替入臍

贈織屨翁四首 并序

吾友溪南朱易以名家子善書畫縱浪詩

酒間余與實君招之偕遊東山嘗據案作
山水寫生數紙立就間賦小詩亦饒理致
實君為取唐書朱桃椎傳語字之曰織屨
翁余系以詩贈焉并邀實君同作

十屨風流居士家被裘曳索料桑麻品量祭酒成
都隱尚少徐熙落墨花

歛乃吳歛蕪若新西風寒雪榜船人買繒歸路扶
新醉記取南山隱士薪
詩筆溪南辛敬之遺山遊好十年遲他時評泊三
知己老子吟窗屬阿誰

水雲醉墨落花山人在宣和書畫間蕭寺獨看黃
卧具何如煖老一紅顏

戲之

翁無家寄居水雲禪院實君嘗勸其買妾故有落句

酬夏重夜坐有懷

好山如嘉客日夕可不速卧擁一樓書兩眼爛于

燭風月雜夢寐微吟想前躅憶昨小軒下泉聲伴

幽獨飛來翠峰色亂我鬚眉綠詩翁得竒句落紙

千兔秃無人畫湖光清影在庭木東歸念故友相

思重撥觸西齋桐雨夜吟魂夢來熟依稀秋景山

岸上張融屋

時夏重與張洪瞻同居翁氏山樓

效范文穆城西道中詩十二首 并序

余讀石湖居士集有城西道中詩一卷風
流杖屨選勝湖山未嘗不歎有宋士大夫
家居無事得從容燕賞於登臨文酒之間
為吾郡嘉話也庚午十月扁舟赴東山道
出城西想昇平之故事弔往喆之遺踪綴
學小詩聊資感慨

伍相廟

麋鹿蘇臺故國春荒村社鼓舊吳民五湖惟有濤
聲在夜哭浮江廟裏神

胥口

胥口載周必
大遊山錄

兩點青螺鎖夕煙水光占斷綠蘋天益公好補遊
山錄萬頃蒼茫一釣船

香山

吳郡志山下
有采香徑

珠帳金釵異代哀采香遺徑長莓苔可憐滿地紅
心草人向梧桐宮外來

橫塘

風戰菰蔣碧浪麤石橋朱堦暮啼鳥畫船若問當
時路綠柳江南送客圖

越城

吳郡志吳王在姑蘇臺越築
此城逼之城堞髣髴俱在

西齋集
卷之三
雉堞金楣跡已微
吳宮越戍摠依稀
寶釵鐵鏃行人得
歌舞荒臺對落暉

石湖

濃借臨邛眉上色
淺疑鮑照賦中蕪
行春居士風流盡
清夢空來達此湖

楞伽山

山有淫祠為睢州湯公撫吳時所毀

碧琳泉冷舊花宮
寂寂空山放鶴風
遺愛梁公新墮淚
山名應與號司空

越來溪

霸畧銷沉戰壘哀
花煙竹雨一帆開
白蓮波面菱

歌動尚有吳娃小艇來

翠峰寺

范注云雪竇顯老道場山半有悟道井庭下大羅漢木兩株甚奇古今井存木摧矣

初飲軍持悟道泉
空庭枯木返諸天
寶書飛蓋無前夢
却愧東坡雪竇禪

柳毅井

在東山橋社

龍宮樂闋轆轤餘
橋社蕭條玉女居
風雨至今秋水
上碧波如拆柳郎書

武山

吳王虎圍避唐諱改今名

游臺馳獵獸如雲
觸戰終驅狡兔羣
長頸君臣自

遺患三千何用水犀軍

雞山

花冠芥羽強分明鷲鳥藏形孰可爭
一去黃池歌舞斷五湖歸夢亂軍聲

大雪用東坡聚星堂雪韻并序

庚午十二月六日暴寒大雪江河皆冰道
路阻絕者二十餘晝夜父老驚歎以爲數
十年未有也閒窗無事憶東坡在潁州聚
星堂做歐陽公雪中約客賦詩禁體物語
喜而效之

十日頑雲凍寒葉天公手試江東雪居人瑟縮不
出門對宇隔籬都斷絕千里傳聞河腹堅陸行百
貨走脛折室盡功曹卧疑死迹似尼山過隨滅呵
毫噤口鼠鬚僵檢詩龜手犀籤掣小枝紛積長新
腫人面忽點皺微纈父老心驚目眩搖共詫碧城
鋸霏屑數十年中似此無卷沒衢填纔一瞥茅齋
壑斜四壁壞獨抱杯鐺向誰說呼童火急煎魚眼
汲水打冰如鑿鐵

辛未二月八日循東山脚至豐圻看梅同遊
顧抱山詩先成遂用其韻

詩人困殘債思苦句未吐梅花仗春風迫我整旗
鼓十人上湖濬東山露左股清光亂瑤臺吳姬面
誰數練悅投盧仝異香乞賈午天地會奢華萬堆
雪一塢老人汗如濯病客氣同縷夢清冰作魂香
沁玉為腑箕踞松下石拍手歌梁父銀濤似掌平
萬頃貼不舞野谷饒風光無計相買取唯看數人
家引筒灌春圃

登抱山所居小閣見衆花爛然一老獨坐輒
用前韻贈之

春山十日前花口噤不吐一夜雨肥萼爛漫催羯

鼓如入玉皇家香御列釵股連天詫紛紜舉手更
僕數織綃綴瑣碎夢蝶起蠶午黃綠有春風吹遞
東西塢杏蘂分錦纈柳條刻金縷異藹兼四方衆
香雜六腑倚窗無俗韻出牆笑傖父不能文字飲
豈解紅裙舞拋此萬花叢一老獨占取小樓春雨
中惜花卸空圃

是夕枕上不寐復用前韻簡實君山瀏

饑腸索秀句絲盡蠶無吐況見大敵怯曹劇竭三
鼓小如蟾使臂眇若螽動股平生古人書盆下銜
窶數吟情媿兩賢縱橫錯旁午文場互致師詩壇

爭立塢點筆隨步趨千鈞繫一縷誰借雲漢水倒
流出肺腑空悲逐日景失計齊夸父難將短後衣
學彼長袖舞文章有別裁萬象恣規取願從季重
言休息篇章圃

山澗肺疾四用前韻

君病豈傷春詩酒不如吐喊呀過風雨清餓腹如
鼓手中萬卷書長夜猶刺股詩人例病肺杜蘇屈
指數宛邱帶寬落飯顆笠卓午流傳吾窮交肺喘
卧金塢曉夢繫花魂春愁殘線縷喉間作轉聲爲
君鍊靈腑何時東海濱問訊孔巢父拔劍賀病瘳

壽君徐起舞有人乞酒錢一醉稱義取獨惜柳下

別此地即樊圃

時余將
東歸

東山雜題十絕句

千巖夢遶澗丁冬曾上東山巖上峰緩步寺門尋
落句不知吟過翠峰松

漁家蓑笠水雲空銅斗歌中理釣筒六幅銀帆一
枝槳湖船慣使白蘋風

將軍宅廢橘花明太守船空蔓草生一曲霓裳銷
不盡水聲猶是珮環聲

瓊漿珠顆已成塵十里溪翁買作薪書尾浪題三

百顆西風思煞洞庭春

冬寒積雪兩山之橋皆推為薪

百雉如城勢入天雕闌香草碧芊芊西河牛馬邯

鄲鐵盡起高樓大道邊

水如春夢鎮東流十二紅樓鐵笛愁最憶玉人相

並望碧窗纖手點來舟

東山朱氏十二樓事見先公詩集

簾旌芳氣結氤氳銅玉尊壘秘闈分水抵文章山

抵畫風流小閣是湘雲

湘雲翁氏閣顏也閣制窮極工麗

尚書八餅越甌春悟道清泉水遶新文定尚餘茗

戰帖盧仝媿飲洛陽塵

吾郡吳文定公飲東山悟道泉詩云洛陽城裏多車

馬却笑盧仝半飲塵

小寺紅蓮出水低花宮芳草夕陽迷文殊眉淺邀

誰畫法喜由來本是妻

愛山擬作看山客縱酒從為貰酒春寄語太湖知

我不添渠春色是詩人

水閣遣懷呈書局諸同年二首

春風草草水東流貪看溪雲且共留避世豈容歌

五噫買山真合號三休湖中互占千間屋江左平

分數斛愁預為後時添好夢熟梅天氣在蘇州

五尺匡牀六枳關畫船燈火夜深還滿湖堆浪如

狂虎到閣歸雲似壞山已覺身忘魚鳥外尚嫌名

在市朝間何時夢訪靈威老醉讀黃庭一卷閑
石湖歸舟遇大風雨野宿湖口望城西諸山

漫書五絕句

白雨漫漫小艇孤舟人吹火向菰蘆煙波斜卷吳
城暮望裏殘山忽有無

清謳窈窕水天歸一幅輕帆浪四圍頭白周郎橫

笛罷湖雲不敢近船飛

是日顧生歌曲周老吹笛皆吳中國工也

偶尋溪口住漁村曾見斜橋繫纜痕小市買魚無
貴賤不知楊柳幾籬門

翻鞞菴邊步屨行詩人何處覓詩情百年野老忘

閒事誰記君王賜水名

宋范文穆公故宅有翻鞞菴在石湖之濱孝宗曾親

書石湖二字以賜

遠峰隱隱樹重重樵牧人家報下春不見城西蕭
寺影忽傳煙際四山鐘

題宋處士龍洲道人劉改之墓

先生宋室飄零客灌莽東齋斷碣存空對青山流
老淚未埋白骨在中原才名誰補遺民錄草色猶
疑處士門莫話蘭亭嗚咽水六陵寒食并孤魂

送實君之京師

醉翁門下老門生兩載湖山硯席清何事班彪今

北去亦知賈虎為西行亭窺淶水當時夢淶水亭乃京師
適館之所閣憶黃綿異日情實君所居有黃綿閣寄語唐衢休善
哭恐教滿座感公卿

辛未十二月二十日謁東海尚書公于里第
尚書銜 恩感舊涕泗盈尊侍坐徘徊愴然
成句凡十二首

臨軒 天子問銜寃下榜朝堂萬口喧綠野全生
悲世事白衣流涕亦 君恩收回噩夢心猶悸閱
破前塵淚并吞酒美金舳須復勸休將面目歎邱

園李衛公述夢詩云誰復勸金舳東坡已未聞
赦詩云已無面目見邱園落句合用兩事

出處 恩私許獨偏敢將放逐比前賢文犀好謝
中朝謗瓦器終邀 聖主憐去國心情同棧馬杜
門聲跡等寒蟬琴書詩酒休官去猶有開成洛社
年

黃繖西清日脚曛 天門望斷玉河東十年樹木
空為計一掌堙河豈有功新覆燕巢看破卵未乾
薦墨見彎弓何人不負楊臨賀西笑相看弋冥鴻
邇英侍立重儒英 御墨驪珠出袖驚臺閣文章
光萬丈 君臣恩禮契三生饌分法酒臣心醉餅
賜頭綱講舌清他日若尋起草院細書方紙正

縱橫

絳騶赤棒入臺初
冰署雲司拜玉除
班列平參三獨坐
聲名長在六尚書
焚餘諫草曾投匭
嗅賸衙香舊襲裾
退老歸田歐氏錄
閒將朝事示樵漁
風雅商量伴直時
玉堂舊事不勝悲
子瞻落筆添詩案
君實書名冠黨碑
官到遷除同去草
夢回廊廟比殘棋
獨餘綸閣多情客
腸斷揚州紅藥詩

元王

之廣陵芍藥詩云
感傷綸閣多情客

越角吳根千里長
扁舟蝦菜影茫茫
南江刀剪如惶恐
西塞芒尖似太行
命酒故人疎宴賞
移居殘

客卷篇章

君王莫賜江南好
回首孤臣總斷腸

百里驚風谷水翻
回霜收電變春温
彦弘直感一門事
叔向猶蒙十世恩
誰道中賢復中聖
又容為鶴與為猿
先生春睡宵來美
無復萑苻夜打門

追咎深灾豈有因
酒杯如夢筆如神
雀羅莫訝門無客
箕斗猶看國有人
龍戰已知休曠野
鷹猜應不到閒身
祇宜雜誦東坡句
聖主如天萬物春
風心湖海赴佳辰
聖世依然號幸民
病馬懸涎還有顙
溺人雖笑已忘身
萬錢袁淑誰留宿
三至曾參豈殺人
惟看長安棋局裏
吹壘止沸一番新

誰言富貴踐危機，櫻筍尊鱸願未違。官職換將漁
釣逸，俸錢敢比稻梁肥。續思潁上稱居士，重向南
陽悔布衣。四海祇虛陶冶望，先生獨樂一身歸。
澹墨題名鎖院闌，榜開八百盡孤寒。門生誰許傳
衣鉢，妻子從教笑竹竿。身世熟經稱漫叟，姓名閒
讀數餘官。尊前爲說毛欽事，共擬明廷載半看。
後漢

毛欽事見張儉傳末章蓋自叙而終于美賢令也

西齋集卷第三終

西齋集卷第四

詩七十五首

壬申家居癸酉遊西湖再入京師由大名歸作

書丙寅桃花詩卷後六首 并序

吾州城西南俯婁江，臨江人家門外各穿
一池。池上種桃家各數樹，其中小橋流水
芳草疎林，花時具扁舟泛江而東，未嘗不
豔爲勝遊也。丙寅二月，余與里門舊好兄
弟羣從十有四人，共遊花下，命姪雯圖一
長卷與會者各賦詩紀事。是年五月，余即
入京師，而座上諸君亦聚散無常，賞心不

再壬申二月東歸復爲城南之遊感今追昔言念存沒吟成絕句六首仍書于舊圖之後

柳市遊絲罨畫船平隄如帶水如天春來誰染寒江色十里微波是蜀牋

轉漕東吳海上州雲帆低亞女牆幽繁華三月斜陽水曾照元朝歌舞樓

莫愁艇子有愁時陌上花開第幾枝江畔湔裙修禊女棹歌猶唱獻之詞

馬上殘紅汗雒塵六年光景與愁新門前今日崔

郎到不笑春風却笑人

燕麥青青野渡頭淡煙斜日爲誰留階前玉樹空

銷歇風雨清明哭未休

謂亡弟中麗

惆悵煙波跡已陳流光欺客恨欺春相逢祇有東風舊點檢圖中十四人

檢亡弟中麗手錄詩卷二首

西齋蕭瑟雨空聞一榻紅塵哭卯君跌宕心情皆斷夢風流手跡是遺文仲常舊學江梅落

虞伯生哭弟仲

常詩有江梅之句好古殘篇夜月分

元裕之錄其兄好古中秋望月詩謂其得

年不要寫南窓傳百本開槭清淚已紛紛

玉樹凋傷安所之一雙遺我最驕兒指看松竹猶
難主付與琴書尚不知芳榭有塵封故網錦囊無
色裹新詩他年風雨湘州舍官紙叢殘孝緒悲

觀棋有感六絕句

東山八面賭贏輸王子紋楸小窟殊誰道西南風
死勢覆舟只是覆吳圖

兩制分題侍北扉四圍翻勢賜携歸人間對面常
千里商洛春風淚滿衣

坐隱孤燈簇簇花親傳奕指向班家劫深殘局難
爭道應悔當時下子差

棋局長安舊要津柿林院裏一枰新叔文諱說山
陰譜盡罷貞元待詔人

蓋局袍邊算劫真孔家巢毀共傷神饒他媪婦中
宵話屬耳難防王積薪

到公斂板石新移淮水齋前責送遲低睡風槌休
漫笑君恩難忘是飛棋

虞山翁司空奉座主東海公從山北破山寺

登劍門觀拂水紀事二首

平泉草木碧羅天共舉籃輿入寺便花雨虛無飛
似練珠簾零落散如煙尋春到處雲山媚投老終

思湖海偏徙倚石牀誰得句蒼苔手拂寄高眠
雲衣山帶影徐徐宦海波濤夢已除寺俯高僧殘
碣外湖分尚父釣竿餘外朝接武存遺老幽徑連
茵看小車誰似荒原拜春草門生門下兩尚書

公以是日率司空公及余同年四人拜故房考邵公墓下

題汲古閣四首

招隱南湖舊社存西窗篝火宿煤痕眼中萬卷如
修綆不改韓家兩版門

文山凋喪疊山哀遺筆淒涼未忍開異代桐江朱
味恨東軒殘淚哭西臺

毛黼季藏予先公讀謝
臯羽西臺慟哭記詩卷

流傳趙宋擅銅鏤善本尚書萬軸收何事祖龍相
厄甚六丁偏取絳雲樓
秘閣文淵劫火賒綠囊觸手重咨嗟西齋妙本唐
朝物誰記王孫是我家

送毛魯公之揚州六絕句

楊柳隋隄卧水聲何郎官閣從諸生小毛公自傳
詩學弟子誰為貫長卿

推蓬瓜步對煙鬟硯匣斜安筆格間癡絕過江船
裏客捲簾敝學潤州山

煙月文章咏玉鉤竹西水調咽邗溝煩君一紙蕪

西齋集
城賦題破江南文選樓

鬪雞春草舊繁華
載酒江湖夢未賒
亭子無雙樓第一
沸天歌吹譜瓊花

傷春小杜酒船空
紅袖烏絲舐筆工
草隸共看追伯武
醉中時拂素屏風

西京南國水雲愁
兄弟因人並遠遊
好好珠簾明月句
秦州唱罷唱揚州

兄亦史工詩
近遊秦州歸

送余不遠歸將樂二首

四海無家三癖翁
十年來往遍吳中
門前祇見逃安道
廡下何人繼伯通
香積厨空難乞米
木棉裘

破不禁風南朝詞客皆蕭瑟
莫歎江關吾道窮

折角方袍禮法疎
嘲花咏石老相於
清泉偶過思

光宅草聖爭傳子美書
蘇子美善草書傳于吳中見本傳
潘令未

曾為娶婦戴公誰
解與營居不堪流
落中村老暮

齒思歸氣盡除
不遠自號中村布衣

雪夜讀唐書偶題紙尾六絕句

張宋開元並拜官
賦詩都省御書殘
陳情養疾東都第
猶得君王藥餌看

視草宗臣下集賢
首蓬面垢主恩憐
朝廷手筆無人敵
獨掌文章三十年

金鏡天長動御容中朝風度孰如公但教羽扇秋
風在終始君恩感篋中
申冤匭閉獄頻仍羅織經成好吏能四海宿囚驚
鑿空可容新淚哭昭陵
起草精思舊夢邊玉杯金盞宅空傳會昌一品繡
遺集好記窮愁志一編
裴令風流袂禊辰柳橋沙路幾閒身祇今想像昇
平樂賓客題詩滿洛濱

西湖雜感十六首

西湖佳麗舊神州塞草平蕪媿昔遊山似林逋長

偃蹇柳無蘇小不風流文章點筆論青史煙月供
愁問白鷗格是三吳憔悴客春衫無那更登樓
水剪吳刀兩碧環興亡餘跡黍離斑玉津夢斷葫
蘆井葛嶺春荒蟋蟀山香輦三宮五國外冬青雙
匣六陵間木棉宰相今何在杜宇臯亭恨半閒
鶴怨鷓啼不忍聞英雄遺傳事紛紜銀濤似哭伍
員廟宰木如號鄂國墳西岸朱旗晴弄影半江白
馬夜呼羣扣舷莫奏湖州曲愁煞南朝汪水雲
表忠遺觀草芊眠廟食錢王東夏偏十四軍州歸
宋室三千名馬並孫權錦衣樹入還鄉曲玉冊樓

疑寶正年父老至今羅刹岸銀潮鐵弩話江天
湖山文字帶芳鮮蘇白杭州太守篇五馬風流六
百日兩公踪跡二三年白詩皇恩只許住三年蘇詩得向西湖兩過春綠
蘋黯淡無歌扇紅藕飄零絕妓船蕪漫忽驚沙萬
丈蒼煙老葑作名田

金閨閣筆校量時花鳥江南例入詩吳國遊麋同
北宋蘇家鬪草敵西施破愁梅雨黃金縷買笑春
風白紵詞若比館娃宮外路兩州楊柳問腰支
南園淒斷北山塵不見風光故國春誰爲河山思
將帥每因花柳憶君臣樊籬何處尋殘客燈火相

從話宿因只有許閒堂下草帚腰還學四夫人
無數峰青遶郭斜傷春遠目送天涯道人不識山
中栢野女還歌陌上花亂後晉公誰有子生前謝
客已無家蕭疎小堰門頭路樹色難藏接翅鴉
松栢蕭蕭夕照中白頭東澗哭東風青袍才子成
猿鶴紅豆哀歌賦蓼蟲玉匣夢思唐義士銅駝路
指宋行宮蘇隄寂寞魚羹婦誰識開元鶴髮翁
西陵油壁窗無期誰唱鹽瓏絕妙辭車馬門無秋
水景風塵腸斷雪衣詩繡囊明鏡餘芳草玉笛銀
環賸柳枝舊事憶收齋閣句春潮疊紙入相思

草衣門巷斷橋東歌水嘲風翰墨工秋夢詩殘粘
絮恨春愁人憶鬪茶風玉鈎漫署薜蘿賦畫閣閒
調鸚鵡籠誰共宣和寫名筆孤山病榻落花中

麗句西泠鬪淑真

西泠閨咏見先公詩集

三吳楊柳六朝春

玉臺花落書唐韻金屋香銷寫洛神擁髻內家歌
白雪點螺嬌女效青脣闌干賸有棠梨夢愁裏春
山陌上塵

菱花鏡裏路淒淒十里跳珠響鷓鴣細雨斜風秋
水觀小桃煙柳白沙隄孤舟浙瀝迷詩眼團扇蕭
條送馬蹄不是殘妝有濃淡可知湖水舊名西

冷泉亭子好煙巒更愛韜光路屈盤四面金蓮兼
沼湧千尋翠竹鎖雲寒茶鐺舊社依然在書甕前
生似省看不見香山老居士海榴月桂夢闌珊

草木幽然十咏初休文齋閣正郊居人才漫綴先

賢傳

南史周興嗣著錢塘先賢傳五卷

風土曾縉府帥書

宋府帥周滂撰

臨安志

雌霓連蜷撫掌外通天零落夢華餘厓山舊

事中箱在心史叢殘老蠹魚

探花筵上舊同儔紫陌尋春控紫騮宿草故人哀

陸續

冠周青山才子思湯休

西厓詩筒莫忘東西郡

元白

官浙東西嘗有詩筒往來余與同年語次每約修其故事

畫檝空來風雨州

唐彦

西齋集 卷之四
猷杭州詩山雨霏微不滿
空又云一榻無塵四面風
何事伯恭辜舊約延緣

不見葦間舟
山濶期湖
上不至

舟泊吳江垂虹橋用蘇韻二首

雲起遙天望不窮
山光影落美人虹
漁歌春郭三更酒
煙竹清江一笛風
張翰精靈當我笑
杜秋幽恨許誰同
就船更買鱸鄉味
醉看霜鱗滿箸紅
文章江左歎交窮
夢筆誰知賦彩虹
古岸自明緣淡月
孤帆不健為雌風
殘碑修竹清齋沒
范至能吳江主簿廳記云讀書之齋修竹繞圍
好句船窗白鷺同
王禹偁詩惟有鷺鷥知我意時對船窗
獨立畫闌看萬頃
帽簷微側插斜紅

遊西山歸馬上雜書兩日所見十絕句

靜明園

園在玉泉山下秋柳雙隄紅亭如鏡見鷺鷥瀟瀟游泳其間誠勝境也園中有望京樓

柳似疎煙水似霞
雙隄瀟瀟立銀沙
望京樓外鐘聲動
飛過紅亭萬樹花

玉泉寺浴

時山月初上浴罷散步松林與輪公捫碑閣話人影茶煙一時

粥鼓諸山出晚林
香臺孤月下松陰
竹房半榻茶煙語
洗盡人間榮辱心
東坡女國寺浴詩兼以洗榮辱

碧雲寺

寺後有明大璫于經祠魏忠賢衣冠墓墓前組豆羊虎翁仲皆以西

山白石爲之
雕鏤工巧

松竹蕭蕭古寺秋百年石椁總山邱諸陵風雨無人問故老猶能說五侯

退翁亭

亭在隆教寺前面
亭有流觴曲水

林泉幽趣野人知閒處能消到處詩好是休休亭
下路一川紅樹夕陽時

金朝松

隆教寺西嶺有古松一株相傳
章宗時物其地即看花臺故址

老龍倒卧入溪來一片山分一片苔只有青天孤
鶴影斜陽猶下看花臺

循澗路尋圓通廣泉諸寺

相傳金章宗清
水院即其地

兩山門作一山登流水殘花管廢興黃葉夢尋清
水院白頭僧守半龕燈

卧佛寺娑羅樹

霜皮如玉葉如煙風寫清吟入暮天最愛十方閑
草木山禽鬪語講堂前

晚坐香山寺來青軒

軒額明慈
聖太后書

寺影蕭蕭破夕陽半軒如袖拂松篁春雲秋雨無
窮思并作山中一夜涼

虞集香山圖詩春
雲秋雨不勝題

歸宿洪光南院二首

白雲歸盡四山開猶及空堂暮鼓來松色滿闌花

西齋集
滿院月明人語落蒼苔

小庭野鶴似相嗔不記風流看竹人明日歸鞍問
流水出山泉是出山塵

題玉泉寺壁贈輪公二首

竹比長身石比頑破瓢斜笠白雲間詩情不出長
松寺世味真慚小草山上異花臺外見門前流
水定中還人間誰似紅樓院御柳秋風鶴唳閒

翰墨傳家待詔孫煙霞風味至今存相逢共話三

生石他日重期一笑軒寺西小碑云舊有一笑軒碑拂蒼苔晴

有跡杖過黃葉靜無痕憑公舊識嵇中散野鶴風

流我媿論

端表堂歌呈大名觀察陳公并序

康熙癸酉仲冬大名觀察海昌陳公到官

之三載仗鉞餘閒戟門多暇三州春色畫

舫重新十部霜花晚香如故江東名士繼

柳惲之風流河北諸侯視荀郎之年少頃

者紅蓮幕下燕寢香殘練雀袍邊簿書案

罷銀缸畫燭小會賓僚圖史壺觴止論風

月奚囊綵几出秘閣之丹青玉軸牙籤列

永宣之人物相與斜展衍波橫看倒薤得

鄭家之三絕辨顧氏之八分疊嶂小圖青
山落手疎林短幅綠樹隨身春苑殘縑閒
窮題識益州舊錄默數年華王將軍著色
之山今空見畫陸處士無痕之水我似曾
遊又若庾信狂花能生客慧鄭玄幽草似
得人憐紫蝶黃蜂共拂桐間之雨鳴鳩乳
燕疑穿柳下之風韓偓捲簾猶逢昔夢劉
郎看卷更覓餘春於是東閣參軍金閨諸
彥水天閒話花思俱新湖海佳辰主賓既
醉說兩京之舊事問五鹿之遺墟白啖紅

消效風情于河朔珠簾明月等幕府于淮
西分曹則醉送舩船隔座則橫飛拇陣簾
衣隔露匝地攪瑜腰鼓凝風兩牀絲竹留
連失日劇飲聯宵孟公之轄長投仲舉之
榻時下阮孝緒雜書官紙楊遵彥共食銅
盤麗句清詞彩毫齊吐酒經詩帳絳燼平
銷某一日看花曾依馬帳三年賦別重造
韓門雜食堂中謬作安昌之客沉碑會裏
收從峴首之游敢序滕王聊題曲水庶他
日追歡洛社附劉白之美談閒說滁山並

歐蘇之軼事云爾

魏州十月霜天美晚香亭畔沙如水河朔風流渤海公卧護北門花月裏弭節三年幕府開畫戟金魚手握砥三郡追思魏侍中兩河想見歐學士銅壺閣影畫參差點筆文書日上祀柏蔭高春了官事端表堂前數花藥方紋帶緩滑臺綾小詩醉拂昭陵紙手開東閣集賓僚玳簪十二交朱履翰墨幽情出秘藏古香錯落堆文几銀鉤漫漶大觀碑五禮詞頭尋舊壘白馬前津寢殿荒澶淵將相遺名氏錦囊玉軸品第分尚書收弄親臨啓好古流

傳王謝家天涯更索膠東市丹青已暗色微茫江左良工梅雨洗妙迹居然壑三館蠹毀何須曝青李家雞野鶩盡知名春矧秋蛇各自喜玉堂畫掩看青山平遠秋江八千里對之便欲理篙櫓黃葉村南只如耳滕王蛺蝶生欲飛趙昌花木鮮防委平章風月辨欵識德父梅山兩相似吳中文董遺良書一字直與千緡比西田泉石南田花過眼紛綸得畫理黃家煖翠奉粉本徐熙落墨存葉底滿堂詞客共傳觀方叔肩吾寃終始節堂曲宴轉華燈三寸金釭照清醴公年方壯光浮頰真率雄談

薄紈綺投籤鈴下報三更射覆藏鉤喧不止後堂
絲竹醉彭宣欲舞尊前插花起授簡分題紅燭詞
致師無力良自恥吳門學士今浩然鳳起蛟騰思
清媿海昌主人歎絕倒側帽無能置臧否風流屬
吏安袖觀筆陣千軍窺壁壘虎頭後人笑不言一
卷南宮發塵匭銀幡斜插兩阿咸廣川舊跋紛難
紀墨池瑣事賓退錄家法誰傳山水肯好做宣和
兩譜條續作元章一家史

是日吾郡孟翰林端士
俞元城大文海寧顧紫

函公之從子震修
履仁同與斯讌

遊大名雜題絕句十首 并序

癸酉十一月漫遊大名苦寒風雪中指直
筆枯不能作詩間有得句亦不成章歲暮
渡江東歸結夢故人舊遊在目一時詩酒
追隨賓朋離合之雅未可闕然遂追葺遺
忘得小絕十首寫爲一卷以貽同遊者

別西山

小閣鉤簾盡日閒荒煙寒雪最相關祇憐車馬東
華客只戀紅塵不戀山

楊忠烈公祠堂

松栝蕭蕭背郭聲楊公遺廟至今清當時休笑朱

雲小曾記依稀宰相名

滹沱河

草草寒林黯黯津一燈傳舍兩閒身渡頭爲報當

門者不是將軍是故人

時將訪陳子
文于深澤

漳水

袁家賓從渡河來薄落津邊襖飲開惆悵英雄曾
誓水空流寒影過叢臺

邯鄲二首

趙臺風月定誰分兩道青蛾一鬢雲失步樓頭從
汝笑而今國士不如君

酒不消愁筆不神客眠無著話前塵夢棺夢穢今
無夢猶道黃梁是幸人

戲簡俞元城

吾家季重風流在不分棲遲與昔同莫道長愁兼
酒病多情何事負春風

五禮碑

草徑荒寒淡客魂一天風絮雪中村金銅門外黃
昏月十丈殘碑卧燒痕

西郊觀河北婦人走馬戲

踏破紅塵似浪紋輕于春柳疾于雲長隄翻沒花

驄影唯見西風與畫屏

留別同遊諸君

趙女悲歌宋女愁
新翻紅豆入涼州
煩君更寫陽關譜
第四聲中記此遊

西齋集卷第四終

西齋集卷第五

詩六十首

甲戌里居乙亥入京師作

送陶子師同年之官昌化

千載逐臣地文字憂患餘
陶生初宦遊乃落非人

居

東坡云昌化非人所居

答策固不堪何至從鷄鷓前身豈

逸之萬里親鰐魚宿世或子瞻五日嘲花豬隨俗
薦蝦蟆聞名嘔蛆蛆尺書乏烏觜一飽惟綠諸階
下鳥言吏生梗同猿狙蕭閒少官事愁君非簿書
所憂在妻子荼苦還共茹茫茫向大荒揮手謝鄉
閭吾悲眉山老苦憶歸田廬晚節媿淵明抗懷咏

二疏誰知小陶令微官亦超超斜川若有知異代
當歎歎人皆惜君才君獨長軒渠扁舟下江海慷
慨無躊躇軒轅聞奏樂竒思遭爬梳何須五柳下
區區把耰耜

東海公挽辭四首

海內無歐子風流失鄭君天難遺一老道欲喪斯
文兩制追謨誥三朝寄典墳獨餘青史恨朱墨尚

紛紜公撰明史宋元通鑑未成

兄弟登朝貴功名憂患中是非千載共出處半生
同白日浮雲改青山世事空九京才一日不見赦

孤忠屬續之次日即有恩命而公不及見矣

江東來會哭豪傑念平生共道瘁邦國直嗟無老

成十年隨謝傅三月服方平東坡為座主張安道齊衰三月不忍

過東閣西風廣廈傾

文章稱弟子終不忘韓門公為先公弟子湜籍傳遺譜歐

蘇請世婚吳興夢苕霅太白話蘋蘩公嘗言與先公相從湖州

同拜孫太白山人祠下零落山邱淚空存故舊恩

送陸士迪同年之官新建

滕閣文章宰蕭然為政閒但酬新簿領莫負好江
山兩夢長千里三同抵四般唐李贄贈李敏詩契分四般同余與士迪

同里同學同他年雞黍約里社待君還
年竊謂三同

題徐太僕遺像

金璫禍國歎荆榛只為鬚蒼不計身四海清流真
直節五朝舊德老遺民獨先元禮彈常侍共幸林
宗免黨人畫像吳中前事在團溪好寫白紗巾

世傳

吳中先賢
畫像一卷

題韓學士寒碧齋

高懷如水氣如秋門館蕭閒足勝流人共一杯消
晝夜家藏萬卷傲公侯幽居自作林園主才子終
為山澤游最憶洞庭春色暮神仙同上李膺舟

客歲

公嘗與余
同遊東山

過何此瞻

花影籬園勝泉聲學舍存三高餘舊隱萬卷共誰
論有酒常澆冢無人只閉門曾申拜親禮海內重
何蕃

吳門送唐實君同年王次谷表兄同入京師
二首

水北村南幾斷髭江東芳草惜差池溪山十載供
詩帳風月三生作笑資君似相如人道渴我憐方
朔自言饑風流異日成來往猿鶴相依未是遲

舊家人物舊堂槐四世論親正我儕窮老難安小
隱士清狂猶剩左風懷漫思配食劉伶廟次谷嗜酒有詩
云劉伶如有廟配食更何人且共焚香韋守齋實君喜焚香默坐誰使
春江變春酒綠波千里釀長淮

醉後題牡丹 并序

順治丁酉先大夫歸耕江上買故家牡丹
數本植之庭中三十餘年來風雨飄零不
復舊觀矣乙亥春余將以除官入都數日
之內花叢盛開憑闌獨酌繁豔可愛流連
不足繼以詠歌懼余為東西奔走之人而

與此花相見者又不知幾何年矣詩成遂
墨於齋壁

池館風流西夕斜伴吟猶護一闌花文章誰寫歐
陽記父老還稱魏相家題罷自憐同隱約功成端
不負穠華祇愁書寄朝雲去綵筆天涯驛夢賒

城南歸泛舟後園小池

吾家面城南幽意日自領野色秀門闌花氣清市
井數家流水陰一門修竹影我生厭車馬却埽閑
舊隱喧囂耳不聞書卷眼終靜小榻雜花圍雙扉
如冰冷吾曹三四輩詩酒日遊騁風月惜春歸散

步入畦畛叩門野翁家疎籬亦清整人面笑殘桃
玉版參新筍中有灌園老花下食桑甚回頭語遊
人生理君未審種菜吾家業老圃今五稔但得酒
數升不致米一困手把種樹書蕭然就石枕吾聞
蹉然喜斯言發深省詠歸到水北菰蒲進小艇雙
溪印斜陽林火光耿耿水軒理杯酌紅燭荒村秉
興罷發三歎百年徒鼎鼎塵土本惡緣泉石仍美
疾薄宦驅出門俗情良可憫相期互投老一醉天
地冥西鄰日過酒東家呼食餅有時風雨夕誓不
出關楯有時溪壑間隨意帶苓箬小摘故山好此

計亦非倖終思穎上歸不待鑑湖請芳草逸興生
落花歸意猛規作招隱堂閒雲爲笑肯

別山詩八首呈里中一二知己

西風分手小東籬自信明時稱位卑五畝未成招
隱計一官空賦別山詩南史何允有別山詩留賓有母知名

早減產無兄薄宦遲逋客好看文酒社夢魂不忘
草堂碑

命薄才慵鬢未殘三休宜作二休看司空圖量才

之用余獨未髦曠耳難拋詩卷他生味却畏風塵本分官芳

草青袍閑處改文章白苧句中酸王官亦有林亭

在貧到書生出處難

風雅追思最賞中故人何處哭歐公相看前輩三

年盡玉峯司寇相國兄弟相繼淪沒也識都門萬事空東坡詩再入都門萬

事東閣賓朋如過夢北山絲竹似飄風荒莊無補

閑閑老諱日長教恨未窮元好問座主閑閑公諱日詩門生白首渾無補

陸氏莊荒又一年

淪落天涯夢酒卮玉堂遺恨舊花枝西州每媿稱

殘客北海今誰數大兒書卷風情銷未盡形容塵

土悔難醫常山相國空門巷攬涕尊前有所思余廷

試時為真定梁相國所知

後門猶記謁朝賢曾預吟流几杖前酒價每當司

業乞今司寇翁公時方為國子先生綈袍最得鄭公憐長洲相國有通門之

舊最為身名跼蹐慚知己耆舊風流逝昔年何日

從容憶談笑見聞閑錄比歸田

聞道中朝紙價高占將風月在春曹五家文戰降

誰受四海詞鋒氣孰豪好擬樂天編唱和定同子

美涉風騷請君整頓條侯壁江左偏師已屬橐實君

書來言近與西溟元龍夏重西厓共為文酒之會甚樂

浣花野老數交窮來占華陽版籍中白首窮經仍

杜癖墨池狂草似楊風高門半感年華變遺事潛

隨市井空唯有江頭舊桃李當春點注發深紅雲間

杜讓水為先公老門生近買宅婁江過從頗數

蕭齋座上各能文詩酒相從張一軍巷北風光三

徑共城南春色四鄰分狂歌舊跡溪山見投老閑

談花草聞此別數君常在念漁竿誓不負吳雲謂振

西兄弟及大復同學諸君

潤州二首

風流招隱鶴林間魚鳥何須怨不還歸夢定經劉

尹宅塵容媿見戴公山江知人為無田去月見僧

歸有艇閒花底鶯聲猶未老酒樓相送尚綿蠻

前度傷春攬二毛夕陽人影又勞勞不堪車馬隨

卿輩豈有才名媿爾曹吳榜閒情停桂楫淮魚風

味出銀刀只憐丁卯橋邊水還照窮愁草似袍

四月十日過江野宿揚州用前韻二首

煙水蕭蕭竹葦間卧吹鐵笛暮潮還天迷白鷺飛

斜浦地送紅霞入斷山十里珠簾千里夢二分

月一分開是夕雨後得月春歸吾愛官隄柳賸得腰支鬪

小蠻

功名真數九牛毛每歎孤飛似伯勞猶有文章存

李杜從來刀筆鄙蕭曹穿楊舊夢思調箭濁酒殘

宵看佩刀篋底自翻名士傳竹西西笑一綈袍

淮上復用前韻寄西厓二首

長淮好在十年間元是詩人舊往還楚水也知非
故國吳兒猶是愛殘山家連雲海今空見筆借風
濤未肯閒東坡淮上詩隔淮雲海暗人家但向春
明思酒盞升沉不校觸兼蠻

池上凋殘舊鳳毛自甘浮世涉塵勞李膺不歎無

師友鄧禹何妨作椽曹樗散敢期當二妙飛騰已

見夢三刀時同年得郡符者已三人五陵風月詩千首留取何

人得錦袍

過淮寄少融弟二首

江北夏雲濛江南梅雨細帆影入長淮孤舟託天

際真成三往來踪跡參差記東坡詩好在長淮水

載中三過此水前年歌銅鞮四海兩兄弟癸酉偕少融入京師今年

問行路獨漬看花淚春草夢家山曉來日頻嚏嗟

余本恨人掩卷廢棠棣仲也哭卯君人與筆俱逝

爾我似形影楮持門戶替漏天憂老屋負郭逋殘

稅黽勉求一官淒涼缺家祭十口累高堂祿薄難

為計出處兩茫然思之媿壯歲

與子少孤貧春風長野哭荒江喬木第門外無車

轂比長走四方稍稍遭品目而今廿年事殘淚在
松竹述德懷先公平生樂巖谷琴書愁付人中歲
艱似續恨不見諸孫眉翠間頭玉眼中八男子差
勝兩家鼓最喜小於菟興宗預可卜姪邈生丙寅歲聰慧喜書
余比之蘇家虎兒更看千里駒方及三日浴時少融舉風
流洗帚履家法有所屬門庭戒雜賓娛戲絕蹴踘
文章還照世鄙尚良已足此行酸冷別萬事聯榮
辱念子素謹愿阿奴且碌碌萬勿似阿兄疎狂作
家督

沂州屋壁見查夏重昆弟與翁康飴同年倡

和小詩戲書三絕於後

陸居非屋水非舟書卷招要小市留忽見殘桃隔
年句故人風雨入沂州

青山四面繞吟身腹有詩書筆有神嗟爾天涯老
兄弟風流同作過淮人

可憐天氣可憐花春入翁郎小筆斜今日牆陰見
漂泊絮飛如客兩無家薛間詩有觀翁康飴畫柳一絕

送胡嘉言歸竟陵四首

騎驢西笑一儒冠蕭寺誰憐白髮寒千里故人何
寂寞十年吾道更艱難風流但見張韓老嗔笑無

求顏謝官煙水白鷗仍浩蕩楚天辭我去持竿

輟耕著論漢陰翁應許文章號史通尊公石莊先生棄官不仕

閑戶著述誰采遺書貽十吏不堪徒步揖三公奉囊我自慚

門地抱甕君真有父風記取菊潭尋伯始白

雲茅屋舊江東

卜鄰嚴助好交遊並占閑坊慰旅愁真歎王城藏

似海不辭學舍小如舟一家樹并幽窗色數局棋

銷隔院秋尚有論文殘首着相呼過酒滿牆頭孝感

通家嚴彥和與余卜鄰甚歡

臨江門第各淒然舊事蕭條孰與傳留井但知公

子宅還家誰似孝廉船春風盤馬悲三陌秋水過

扉夢百川莫歎東坡窮丙子李生腰笛是明年余先

公丙子主楚試嘉言亦丙子生

食蟹次實君韻

京師尚肉食四方羅海錯東搜巨壑魚南致野田

雀直愁七澤枯兼恐三江涸秋來客俎空西風入

帷簿烝鵝失鬼警烹雌厭家索展轉飢腸焚中抱

不息爨廣陌賣尖團鐵色壑螭臃但憂萬錢案攫

取充脾臆吾曹左手虛不得一大噓共徵酒食資

門如社錢掠買歸置甕盎殘沫猶噴薄兩螯斫霜

雪周防遭急縛蜀薑敵寒味蠻榼佐狂藥蝮蚌輸

半殼東坡蝮蚌詩半殼含黃宜點酒章舉媿八脚韓公南食詩注

吳兒善枝剝觸手似椎鑿多足斷橫行厚脂富空

索雌黃雖在口戈甲笑隔膜宋江文蔚蟹賦有口裏雌黃胸中戈甲之

語豈誤渡江吐還救入關瘡君輩雖老饕何如主

人惡堆盤美無馱誰復量豐約如人取卿相妄意

恣饒嚼山谷詩看人取卿相妄意亦饒嚼吳興小如錢對此應驚

愕蘇詩溪邊石蟹小如錢淮南藏阜莢歐老方法各見歐公歸田錄

今日偶相覓得此一餉樂只憂貫鼎味不可盈谿

壑殷勤語次公有酒毋多酌相期持百錢他日重

合醪

題項霜田讀書秋樹根圖

人生讀書如種樹根本不茂枝不附文章膏腴散

古史千載芳華開竹素項生磊落遊儒林宿讀生

平妙才悟楓子桐孫名譽早少年走馬長楸路落

葉空吟歸去來上林獻賦悲不遇孫敬新編柳簡

經陶潛自著荆扉句釣竿長欲拂珊瑚人間詩卷

淒涼具興酣挾策據梧歎百尺蕭疎飽霜露撼撼

秋空輪囷竒託根不怕虬蟬聚温室無言笑孔光

雄辨高談快風雨獨惜庭楸五步間不得南山鳳

凰乳蒿艾無端紛滿眼花草柔靡何足數盈川病
梨竟已矣江潭搖落非如故飄零爲語漢將軍斫
樹悲歌方日暮君是東陽殷仲文子山愁絕風流
賦

題王野航同年竹深荷淨圖即用杜句爲韻
賦得六言十首

蕭郎絕筆兩叢與可寒稍半幅丹青只此二君難
寫人間是竹
天竺寺前雨洗孤山閣畔苔侵十載江東鶴影風
煙盡日情深

白雨半篙野水紅橋幾點春舟料理西湖歸夢多
情何必句留

東山柳絮心情西渚梅花行迹我真湖海陳人君
亦溪山熟客

此間夢裡曾遊歎乃聲聲歸去笑看流水前頭或
是投竿舊處

鬪草人間惆悵采茶陌上蹉跎未必年如衰柳不
堪衣似殘荷

擅場老手吳生粉本名家閻令鶯溪淡墨生綃天
色水容都淨

斜陽不岸烏巾清坐閑披白袷銷磨花氣離離領
畧溪光納納

名士舊傳羽扇貧家只設藜牀彷彿白蓮莊上鷗
波笑語初涼

綠到六橋芳草紅歸三徑花枝櫻筍他年鄉味尋
君把酒何時

王給事麓臺爲余作倪黃小景圖成報以長

歌二百八十字

黃癡倪迂兩畫聖獨向江山得清淑筆墨挽回五
百年人間油素殘膏馥江東好事王謝家百金一

紙收奩軸吾州之豪老奉常妙繪浮嵐真面目風
雅流傳給事孫嘉陵粉本相追逐退朝花底梧省
閒小窗斜埽冰綃幅青山一筆雲容淡蘆花十日
煙波足從君欲乞草堂懸此願廿年中所蓄偶然
市得宣宗紙瑩膩純堅敵寒玉請君下筆寫吳山
洗我江南愁萬斛離離短幅合癡迂窈窕眉峰間
修竹此中如見一峰老提壺徙倚虞山麓又疑身
入淨名菴圖書清悶雙桐綠蕭齋風雨恐飛去煙
霞變幻山靈哭真成平地家居仙結亭置我王官
谷三吳夏潦水半扉喬木爲薪具饘粥夢想當時

釣遊處白鷗滅沒荒江宿吾曹終是林泉人野性
惟當友麋鹿髣髴龍眠舊宅圖幽棲會向衡門卜
李伯時畫其弟亮功舊宅圖君不見東郊零落賁園荒拋擲雲

山兩茅屋

東郊奉常別墅賁園余故山也

九日高江村苑西 賜第即事四首

手枕銀鈎萬卷眠小闌花鎖苑西煙東籬有信無
官事翰墨閒評四百年

數騎連翩側帽賓九秋風物共平津詩人入座誰

龍虎追數黃樓三十人

東坡九日黃樓之會座客三十餘人多知名士

御府新收玳瑁裘華亭筆法未凋亡憑誰四海求

遺跡白髮論書老遂良

玉關長閑許誰窺談笑西戎又一時好草尺書招

贊普袖中新得紫薇詩

蘇詩自注邇英賜御書之日奏夏賊數十萬人遁去

近亦有西方之役

芝巖詩 并序

鹽官曹子希文好奇博古生平蓄一異石

高僅五六寸迴旋盤互宛狀如芝相傳米

海岳寶晉齋中舊物也請余賦之

米老煙霞人平生好奇石風流海嶽菴高下第品
格流傳硯山圖秀氣驚座客遂令出袖風成一元

祐癖蘇公愛仇池到處煩一役李家蓄玲瓏百金
價乃易嗟此山骨微幸得名賢惜至今千載後古
香嗅手澤何意小芝巖乃落曹侯席飛如出岫雲
幽意散窗隙秀如在山草影近招隱宅曹侯生好
事蕭閑鄙羶屐手摩元章識深刻若矛戟殘缺雖
半亡尚可以意逆更請善畫手貌此一拳壁嗟哉
米老後風雅久絕跡空齋玉蟾蜍百年淚長滴人
間嗜好變玩弄此何益多君重石交還與數晨夕
傳觀示友朋顛倒落巾幘

送項霜田歸錢塘四首

江左文章河朔姿見君標格見君詩可憐今日風
騷盡不得平生水部知

玉斗縱橫後閣賓每於驚座看長身江東書劍終
何用詩酒猶堪敵萬人

低頭未肯逐時趨獨拂花驄謝九衢猶惜吳鞋踏
塵土一年風月負西湖

野艇柴門暮雨中山村秉燭候兒童紬書指點何
家舅諧笑還傳草上風

何農部同年
君之妻弟

戲和朝雲詩并序

予觀樂天集所載侍兒小字蠻素而下尚

有紅紫二綃之名然不能忘情吟獨依戀
柳枝不忍決去東坡亦稱家有數妾惟朝
雲追隨遷宦尤所愛憐蓋二人之風流婉
約自有得於兩公也乙亥十二月獨居京
師閉門風雪中讀東坡集因援和一章即
用本韻

風雪淒清歲暮天綠窗殘夢更思玄巫山滄海空
修道絲鬢茶煙不離禪歸思江湖存舊約閒情書
卷共前緣曾看宋玉高唐賦只在人間不是仙
乙亥除夕前一日西溟文饒西厓友鹿偶過

實君考功小飲明日友鹿即事戲成一篇示
余因次其韻

四海幾窮交相見喜折屐遂令長安市所至號歡
伯食忘塵甑空飲笑漏卮劇閒官如寓公風流每
借宅終年索米憂晨夕掛胃膈不知好事誰中庭
無愈迹况于卒歲謀腹上指空畫瓶罄少旨蓄衣
敝裂裳帛考功吾管鮑交味等濃醪曹閒惜君貧
金盡知我厄入門嘗呼黍主婦亟走役共歎北堂
賢膳服戚疎適韓詩主婦治北值茲休沐暇偶然
逃簿責開門舊雨來空幃風策策前榮具盤殮半

臂入市易媿爾咄嗟主辦此倉卒客孟公自驚座
仲孺誰膝席終憐郇不與莫謂楚弗逆是日子以
事不得往
酒直惜老驄飮筵想乾腊新年人事始東風犬嘗
麥大呼吾鄉友妍辭婉青白殷勤趁梨花愛此野
馬隙更期藉草遊數騎穿綺陌升沉縱殊塗終樂
數晨夕莫笑孟下窮緣善脈脈羨君門巷間羣
鳥集府栢

西齋集卷第五終

西齋集卷第六

詩七十三首

丙子丁丑
在京師作



丙子正月十一日西厓編修席上同用昌黎
醉贈張秘書韻

愛君官職冷人事百不聞愛君同巷住一日數見
君近坊六七子結託于斯文性情淡若水心跡懶
如雲問其平生交臭味投蘭芬人皆謂吾輩不與
世俗羣夫豈尚幽獨實乃嗜好分敢矜萬人敵亦
足成一軍新年踏燈市春動百草醺朱門酒肉氣
九陌騰氛氲十載感衰盛舊事吾能云歡華等傳

舍逐此萬象紛五侯三相家零落春盤葷當筵奏
故伎碧草餘舞席富貴不滿眼如雨消飛蚊豈似
吾徒樂一笑披南薰茫茫思故人半成宿草墳何
時歸去來買田耦耕耘試看文字外何物爲功勳
相期理書籤庶不辜隙曛

十三日寶君考功齋小飲同用東坡岐亭韻
唐君不好飲所過設茗汁而余見杯杓流涎輒口
濕飲伴只宮生相要兩相得下馬點銀瓶索此應
策急多君出斗酒七箸佐鶩鴨愛我知我好飲噐
潔布冪朱顏一笑紅滿座發頰赤不能持勸君酒

此人面白夕陽花氣亂隱几墮冠幘泠泠洛下詠
唧唧瓶壘泣還恐風月辜不令新詩缺嗟余固狂
奴卿輩自惡客獨恨失宮生匆匆趨內集

是日友
鹿以家

宴離
席去

同西厓再用前韻送王雄飛之陽山

才人豈長貧老去逐米汁苦辭冀北塵不避海南
濕憶君菊花時妙語欣未得送君楊柳風搖鞭去
何急行矣到江湖畫闌看鬪鴨放眼入山川席帽
無遮冪野渚鱖魚肥沙岸蘆芽赤當壚無越女夢
想天下白慎勿留三年顛倒從事憤君念欲別情

春風雜歌泣從茲樽俎間但覺談笑缺及早謝書
記仍作將軍客雄飛向客于畢將軍家煖老買燕玉生兒字

遙集

元夕同用樂天明月春風三五夜爲韻分得

春字

十年我作天街客當筵三賞元宵春流連風景美
清夜舉酒酌月歌良辰昔年平津舊池館春盤春
日羅芳辛兩牀絲管沸畫閣十丈矍瑜迴錦茵玉
杯南國致竹葉翠釜北路求猩脣米家屏影蔣家
燈歌舞由來動一旬何意風流後堂跡長衫零落

餘長身今年賃屋閑坊住三條小市依靈椿數君
門巷靜如水詩酒冷淡時相親方當玉闕事鞦韆
行人刀箭車鞦鞞東南不熟無笑聲罷燈想見五
州民吾曹何事復歡宴奈此花月新年新六街到
處競繁吹五陵門外殘香塵紅樓不數東華市看
場還鬧城南闥今燈市在城南靈佑觀旁衣香月面互恍惚星

橋火樹交紛綸萬家歡笑忘萬事一洗天地無愁
顰媿我短檠高二尺華燈墜倒光難伸何能置酒
邀重客惟當祭竈請比鄰精盤不羨豪家饌瓦盆
聊送書生貧論文合我十年交共感平生意氣真

西齋集
卷之六
堂前明月如過夢天上春風似舊人酒闌莫話歡
華事半是當時東閣賓

題高江村所藏丁南羽洛神圖後四絕句

靈風夢雨認明璫空向微波漫品量誰寫閑情入
秋水却疑鄴下舊丁郎

南岡北汜定誰真縹緲非煙若有神可惜風流畫
羅襪陳王不共卷中人

紈扇屏風好體稱一門筆法自相承凋零漫論黃

初賦江左何從問馬澄

陶隱居集載馬澄云右軍洛神賦諸書皆作今體

臨池拂紙玉堂閑大令神明已頓還不用千金傳

石室過江妙迹在人間

江村正書全賦一通于圖末

送王文在同年之官鄴都

木蓮圖上看佳句曾夢東坡花樹間

樂天東坡在忠州

子臺前蕃草細屈原碑下竹枝閑兩行小吏都如

鹿百磴州門半是山今日送君三峽去風流景物

一時還

送錢朗行同年之官茂名兼簡令貽

故人已罷東山吏君去仍尋舊綠莎花下相迎看

換印日邊重與話登科雲霄昔夢傷髭頰塵土勞

生事袴靴好浼弱翁煩問信爲言豪氣總蹉跎

西齋集 卷之六 四
送錢石城之官洛陽六首

野草青青芍藥紅
帝鄉景物似江東
共看才子花驄影
相伴春風入洛中

青山門巷數株斜
種植流傳十萬家
吟過天津橋下路
春耕野老獻名花

履道池塘暮色開
永豐楊柳記誰栽
滿城流水煙雲在
曾識風流耆舊來

春水花邊坐嘯天
綠莎廳冷印牀前
文書繙取長鬚狀
破屋須防有玉川

公卿第宅有無間
十九名園斷碣閑
盛跡恐成林

澗媿休教蕪沒在空山

縞帚練帨過紛綸
桃李飄零洛下春
爲問明年領

張徹連天花月訪何人

湄亭詩二十八韻爲趙文饒作

江東春水生幽意
落野渚煙波有令姿
風物淡可取
吾家婁江南
括括多散浦
相望黃姑廟
喚渡雜田父
中有趙君宅
清溪影修阻
野航恰兩三人家
只四五楊柳
不知門松竹
各健舉蕭疎
簾箔間破屋
過風雨
小亭牛宮西
亭制亞而古
曲闌俯平隄
長共水雲語
寒碧上圖書
綠淨延庭戶
池盡麥場

開間以花木補時過蓑笠影人跡清可數五年捨
 家出徒步踏塵土自言老書生失脚陷機罟臨溪
 別妻子束身入官府何殊忽作魚頃刻遊鼎俎恐
 為溝中斷清濁難自吐鄉園三徑蕪泥塗混儕伍
 淒涼相牛經零落種菊譜夢亦畏風波不敢思故
 處老懷獨未忘此是吟嘯所依稀記流水連娟似
 眉嫵殷勤遠行時寒葦霜月苦中夜間啼泣溪聲
 有時怒魂歸白鶴村隱隱荒江樹何年商量灣破
 袴弄柔櫓商量灣在嘉定一笑立滄洲終作雲溪
 主

書崑山相國感蝗賦後二絕句

誰謂秋田螟螾微西來煙陣助炎威何年故岸春
 魚子也解漫天蔽日飛

食心豈復顧民艱蝨賊何曾遺草菅元老憂時仍
 涕淚不因明主放還山東坡捕蝗詩云不願君為孟浩然却遭明主放

山還

寄陶子師

四面煙波瘴色漫天南何事落風瀾人間不用方
 頭客海外猶容強項官曉市騎牛孤島靜秋池剪
 韭一家寒溪山自有南還興笑指當途瀧吏看

聞沈昭嗣辭監利令歸杭州

拂衣投劾下吳天謝病江山載鶴船陶令官纔八

十日温公史續一千年

昭嗣熟精史學

東臯詩酒知無恙

陸渾風流可並傳教授閉門長奉母種花白日草

堂眠

秋夜讀白詩寄西厓八絕句

并序

余兩載來與西厓實君兩同年為友朋文
酒之會談笑歡宴忽忽不自知樂也丙子
四月送西厓之黔六月復送實君之越故
人雲散塊焉獨處每當秋夕遶階微吟樂

天詩崔在吳興元在越出門騎馬覓何人
之句遂爾黯然無寐因念古人膠漆之義
或出處殊塗或天涯遠道而詩篇往復夢
寐相尋多至數千百言未有過于元白者
遂作八絕句寄西厓亦望西厓見而和之
以郵致實君為他日會合佳話也

三人遊處一參差長夢花陰跋馬時楊柳萬條從
此去竹枝聲裏出新詩

漏天半雨水煙秋相見坡前寂寞州料得風流舊
心性滿身瘴色掉吟頭

才名李杜愁難並交分元劉訝許同新為樂天徵

故事寫君詩作小屏風樂天在江州日寫微之小詩作詩屏風

誰當短李與迂辛詩酒楊木查重夏跡最親每話涪

翁夢天際黔州詩筆定如神宋人云山谷黔州以後句法尤奇

梅根治上棹船回清絕當年屈宋才萼菜吳中長

假滿楊枝好並過江來

堅約休官遞往還畫船相就五湖間瓊林花草思

前語夢罷吳山夢越山西厓每約他日為五湖煙水之遊越主吳賓遞相往

絕來不

翰林風月嗟無主吏部文章孰敢先光景文昌留

絕唱人間萬口定喧傳已下兼東實君

蓬島官居把酒來三條燭下舊徘徊煎茶小院追

遺事文字江山不放迴

醉歌贈畢將軍

淮南之豪真將種生小黃鬚萬夫勇長身結束兩

當衫快馬如龍獵荒茸自言十六願封侯登城殺

賊東南州四十至尊親召見射戟特詔長

楊留前年北破花門將馬上移書開虎帳歸來偏

反無人知百戰功成不受賞今年天子親臨邊

共許將軍致力年可憐官馬送還官行路蹉跎不

得前據鞍顧盼長髀肉但願天山破賊速萬里行
空青海驄一箭射殺陰山鹿六石弓開霹靂聲雄
心孤峭感平生丈夫老矣不如人何日還君白馬
津嗟君棄置不世用僕姑生塵甲裂縫李陵臺暗
黃沙月趙信城迷黑河夢小庭花影拂寒蕪窓下
雲晴驪陣圖歎息當今文武才顏色慘淡無時無
窮卷蕭閑射鵰手只許東鄰共持酒會看生擒贊
普來相就吾家飲一斗

彭直上同年五十生子余為誦東坡我亦從
來識英物試教啼看定何如之句直上屬和

其韻

朝來賀客滿門閭為看丹山老鳳雛盡送彭郎江
上喜好傳蔡氏帳中書文章更望十年後湯餅先
容一醉餘寄語風流在頭角愛憐應許似相如

消寒唱和詩十九首 并序

丙子冬卧疾京師進不得與朝士大夫之
列退又不能歸耕田里貧居僻左無以為
樂因結二三故舊為九九消寒之會首於
丙子十一月九日訖丁丑正月二十九日
凡九會賓主十二人既而西溟從津門歸

夏重次也復來自江左遂益為十五人文

章相賞懽宴彌旬得詩凡十九首都為一

編以傳之同好焉時同會者慈溪姜宸英西溟嘉定孫致彌松坪

張雲章漢瞻海寧楊中訥鼎木查慎行夏重楊守知次也海鹽俞兆曾大文錢塘王

丹林野航泰州官鴻歷友鹿江都史申義

蕉飲長洲徐昂發大臨武進錢名世亮功宛平方辰拱樞常熟蔣廷

錫揚孫及余共十五人

雪韭二十四韻

小市求嘉蔬薰蕕性殊別何為百草中羶葷氣相

涉逞味一葉秋入腹因人熱名登處士傳南史周顒傳春

初早花上少師帖楊少師凝式潘郎洛下居後圃

喜微霎潘岳閒居賦菜則葱韭蒜芋沈侯郊外宅寒畦帶雌霓

沈約郊居賦自古風雅人亦不廢采擷况乃宗廟

羞家祭春薦設閑把養老書鬲冷恣饕餐所以山

水間園官手日掇韭有山二種初冬土膏動拳蕨戴殘

雪東坡詩韭芽戴土如拳蕨溝東行兩三舍北科七八並戒日

中剪競向霜後拔就中貴黃苗蒙茸負筐篋京師尤重

韭巧滋梁肉腴碎點涼餅滑功豈等鍾乳唐本草拾遺韭

曰草價不高虎攝東風菜譜中名字鬪瑣屑嗟此

一物微而亦煩調燮吾聞雲臺戍野生沒馬埒金

戎北征錄雲臺戍多野韭沙葱出塞萬騎嘶不足供蹄齧空慚會

窮交堆盤翠重疊青袍互相映玉筍圓共摩臨城
有故人美種不餉盃采摘入詩卷佳味徒為說畿南

非以臨城
種為最佳

鴉二首

限斜陽
二字

招得疎林伴天邊作意斜閑疑城是畫寒就樹為
家過影迷妝鬢啼聲雜塞笳黃塵爭一啄浪得小
喧譁

雪滿甘寧廟風斜宋玉牆起常先曉色歸獨愛殘
陽無食偏多子羣飛未著行亦知林下好極目野
田荒

題狄向濤同年嘯亭

狄君風流生好事塵遺萬物有高致阮籍孫登那
復聞嘯法不傳傳嘯意誅茅宋代趙家園人境蕭
疎無俗喧登臨激越偶自寫胸中豪氣存蘇門清
于鸞鳳入窅渺孤絕一聲蒼山鳥吳中詩石舊題
名自愛茅亭鎮幽悄君乎狂醉神獨清作達何為
多不平曼聲已矣落塵帽回頭笑看東方生西京
雜記

東方生曼聲善
嘯輒塵落帽

妝梅二十韻

得尤
字

玉鏡三生稱香臺一笑留折從蘇小墓買上綠珠

樓最惜傾城貌空憐絕代愁風情看並瘦襟韻肯
終休取次朝雲鬢輕搔小鳳頭全身春窈窕滿面
玉風流吹袖魂先斷飄衫霧未收額黃生有分頭
白竟何由疎密誇微得橫斜問好不忍寒偏早試

玉溪生詩忍寒初欲試梅妝

自愛却多羞已要旁人學還將侍

女尤鴛鴦名竊喜

范成大梅譜有鴛鴦梅

翡翠影相求元稹詩可

憐雙翡翠飛入小梅叢

氣逼芙蓉帶光疑茉莉毬六銖衣黯

澹百葉髻溫柔何粉終誰辨韓香豈用偷十年愁

送老

東坡詩十年花送佳人老

一樹記曾遊圓鑿行長見同心

不易酬

漢宮有同心梅

天涯踪定定南國事悠悠平結黃

昏恨難銷風雨憂綠窗新拜月今夜夢揚州

艤船二首

柳花斜亞卷荷紅

柳花盤卷荷俱酒盞名

小席如波面面通

杜牧阻風當座上知章騎馬入杯中帆隨樺燭千

巡轉頭指銀瓶一棹空夜半酒兵休速去要令春

水笑曹公

誰采東坡藥玉規五年雲夢寫相思最憐寒雨飄

香候

李義山詩雨送酒船香

好稱清江病渴時拽盞郎君充

水手折花錄事作篙師自嗟酒戶年年減却似春

船上瀨遲

西齋集 卷之六 三
骰子二首和揚孫

花下斜拋宛轉紅更添新面看春風誰憐顏色迎

頭打苦恨人情入手空隨處未堪分黑白李翱五木經有

判玄白生來偏只解玲瓏蹉跎選格君休笑一日依

稀到侍中唐房千里骰子選格以侍中為極貴

相思曾向碧油邊碧油堂印見皇甫崧骰子令消息頭盤付少

年漫謔金釵雙鬢落愛看玉骨一生圓迴環踪跡

元無定拋擲風流恨不全賴得中心有紅豆故應

終始得人憐

石球

雪花堆袖風旋面五都市上喧羣兒頑癡尚未解

人事凡百嬉戲靡不為鬪雞城東決勝負牽犬野

外長驅馳蟋蟀花瓠裏衣閑鶴鷄錦袋紅繩縻朝

塗絳采打羊骨暮射鬼箭縫牛皮已上皆都城冬日兒童之戲

一兒佻達弱好弄羣兒跳躍爭逐之天街無塵冰

地裂當門官道平于砥南山犖确石生卵蒼潤盤

骹圓凝脂兩眼睂盱手擲地高尻重足青衫垂一

丸疾去似流水一丸歷碌頻相追大呼逐丸如逐

賊囂然順走溝之湄明季石毬市語云順溝兒拏流賊至今猶然睥睨

共作烏牛跼展轉却笑蜚蝗遲嗟哉此風徧委巷

長雜廁溷沿藩籬吳鞋斜挑學齊市草靴小蹴圍
燕姬韓媽金彈鎮不收潘岳擲果知誰遺帽簷吹
側銀幡墮百籌百罰還不疲過頭萬事那可必石
不中市語紛紛何共權銖錙脚底輸羸偶一中却
於斜直分雄雌君不見董君宅裏丸毛語蜀王宮
中花藥詞毬場春風生野草玉階寂歷無人知何
如羣兒一朝歡笑只跳蕩雙九日月空參差我行
其旁三歎息采掇瑣事裁新詩

剔墨燈二首

月華如水浸樓臺誰乞東坡醉帖來何事翻成飛

白樣玉梅聲裏墨光開

煙波如夢一身閒燈火中流畫舫還最愛西湖好

風景黑雲堆墨小溪山

鼓燈二首

碧落連宵敞畫屏東風簫管不教停紅雲一朵星
橋路天上應無河鼓星
影燈百萬照儲胥誰見將軍樂事初好似彭城笳
鼓裏萬人歸擁醉尚書

鬪雞燈二首

金鳳飛來鷓鴣旋五花斜踏燭花偏橫拖錦綵雙

飛翼絕倒城東舊少年
火色相爭似不平花冠金距鬪分明長鳴不夜雞
人懶莫向深宮報六更

葡萄燈二首

梔子同心照座紅芙蓉小影玉池烘傳呼蠟燭天
街靜各向春風出漢宮
曾將一斗遺長秋好掛春宵酒肆頭莫道熱中因
富貴而今不許換涼州

花塲

玉河西去垂楊路寒煙半散清明雨高梁橋畔廣

塲開絳萼紅跗那能數自入朱門承顧盼戚里平
陽後堂宴枉將顏色鬪尊前不知誰當春風選花
奴白髮歎花枝花事興衰花夢變曾事當年田鄭
家等閒慣識屏山面天厨新賜玉熙宮內人私索
宜春院芍藥光中教豔歌牡丹枝下催宮扇永日
笙歌閉曲闌天斜深色誰容見可憐零落畫堂東
腰鼓初停滿砌紅傳令花奴領花去火養泥封土
室中明年例近送花日依舊東風萬萬叢誰知花
謝煙塵惡落葉無人掃東閣夜半池塘改綠陰玉
鉤反掛鞦韆索廿載王侯甲第新進花猶是舊朝

人相逢今日畫樓主一笑仍關富貴身三月閑人
遊白石踏春藉草紛行跡紅紅白白萬千花風流
不減江南格香塵十隊小朱輪玉女霓裳裹巾幘
金鞭隔袖數春枝軟語輕盈唾衣碧好花莫問落
誰家如此風光真可惜惆悵雞頭池上館依稀王
府街東宅探春無力丁香結愁處逢花花笑客人
間萬事揔如花坐對花場空歎息

第三女晬日戲呈座客二首

江左吳郎寂莫家慰情只此伴天涯西窗雪意渾
無賴醉寫新詩付小茶

元遺山自注唐人
以茶為小女美稱

佳語空聞耳耳傳蔡家書卷謝家篇何如賀客皆
龍虎收取當筵名士錢

題春帆梅信圖後十四韻送向濤歸溧陽

玉堂才子出金閨芳草江南路欲迷六幅蒲裁帆
樣短一船書壓水痕低不因蓴菜求長假亟與梅
花拂舊題西子淡妝浮斷岸吳王香水遶荒隄昔
遊定訪孤山寺歸思先尋罨畫溪拽筵綠楊春市
北施篙紅浪小橋西竹兜橫過煙三舍羅袖斜飄
雨半犁詩牒冗殘同客命偏提寒儉遣人齋病閑
漫稱金釵興買笑應爭玉樹栖側帽好看香案吏

作羹終憶太常妻狄時悼亡十年塵土經時合四面泉
 聲入夢啼滿眼風光渾似海到頭官職賤于泥當
 歸暫種誅山徑小草新成闢藥畦生處春風君不
 負故人只是惜分携

題觀察陳公石湖圖三首

紫塞馳書識鳳麟十年風裁靜邊塵若教持入烏
 蠻市應道中朝第一人公在諫垣曾出使絕塞

雲露新傳釀法工不教杯酒負東風北門遺愛西
 川夢盡付人間緘口翁石湖集載雲露釀法張達夫酒尊名緘口翁

拂袖歸來入畫圖吳山越舫映菰蘆從知千古閑

風月只許詩人住石湖

效元白代書體寄西厓一百韻

故人何濶絕寂莫歲還更蠻雨經年信春風第幾
 程清宵思舊侶旅感入新正憶昔遊銀闕相看滯
 玉京松齋初識面柳墅各輸誠投分因求友論年
 便喚兄狂言劇調笑閑事鬪聰明學忝羣公問詩
 成朝士驚風流齊舉舉雅尚共硜硜文讌追王謝
 歌筵雜戴彭篇章思振拔名姓願崢嶸仙桂分枝
 折宮花並樹榮櫻桃當宴散蛺蝶上衫輕紫陌諸
 郎讓紅箋滿座傾雙參花使位互奪酒監觥玉砌

從容入蓬山次第行金爐承御案銅鶴拱雕甍

殿上詩人袖宮中才子名俱蒙天一笑未被唱

三聲舊制臚傳唱第以三唱為率殿試卷余與西厓已拔置上第次日俱放二甲雲引

方登路輪摧忽陷坑九霄元自下萬事笑無成詞

筆嗟虛擲官資敢抗衡燕彊如病客花落似前生

戊辰五月引見乾清門余與西厓俱在選中余獨見黜落退舍予無利趨朝

爾小亨分張綸閣選乖隔鳳池盟七載歡華變三

秋魂夢并已下叙余戊辰東歸及乙亥京師會合之事丘遲賦巾帶韓

愈詠鷓鴣榮路看新進荒江伴老叟石罌資敗葉

塵甑仰香秔南國親漁釣西京冷酒鎗狂應思阮

籍病獨問劉楨已分林泉老難驅妻子縈豈期隨

省掖祇恐混優伶手板知顛倒頭銜畏使令尚容

求內職聊欲免官評重附雲間鶴仍呼谷畔鶯綠

楊分小弄明月隔雙楹細雨蒿迷宅斜陽鳥啄桁

夾城求翠竹老圃選紅檉鬪帖閑看硯徵歌喚上

箏銀鐙紛卷軸玉局散棊枰暇日惟吟藥通宵只

倒甕醉依曲屏幃香護密苓箐榻常留被西厓為夏

重常置一榻姜餐不割牲西溟不食肉味朝偷吏部甕夜撥翰

林鐙余踪跡日在實君考功及西厓二寓舍疎放憎南學肥鮮厭北

烹杯盤携並過酒饌遣相偵余與西厓每日起必携酒肴相過早起率遣

人探候有無以為賓主交轡三條近聯吟十里清花前衣黯

澹馬上髮鬢鬢席帽歸常失其籌出每盛時方過

寒食節及賜朱櫻已下叙西厓典故試黔中事忽值三

年賦憐為萬里征柳枝低拂馬荷葉亞迎旌草草

裝書劍蕭蕭束篋羸去愁芳草暗別記夕陽平藥

裹交亭長郵籤揖府兵斷橋枯磳黑野店亂峰頽

梅雨文章嶺宋九域志貴州有文章嶺茅煙犵狓城竹王臨水

祭羅鬼攏刀耕打棗當風鼓編蘆跳月笙打棗竿跳月皆

滇黔蠻俗棘人皆裹鐵洞女半垂瓔帶受奢香膩妝臨

葛鏡瑩卉衣蠻服幻木耳鳥言獐驛饌枕榔麪官

厨芍藥羹地卑山足氣天漏日無晴柳酒治諸瘴

鹽煙長亂蟲花名都未識草毒豈宜撻白紵遐方

雋紅袍小國英文昌隨例畫筆力與時撐燭盡煩

三覆花新試一鳴何時下湘水計日向南荆帆傍

琵琶落船喂鸚鵡橫磯頭大姥送江口小姑迎得

得離倉父騰騰見越媼溪亭梅入夢湖寺雪翻雲

園吏供茶串山僧餽筍萌昔遊如乍覺舊事若含

醒青舫應投玉紅樓定倚瓊幾時逢小小何處聘

卿卿野性疑迴篆閒情似散榜思君方布襪媿我

尚塵纓五處移藤篋三冬照鐵檠馬過窗外巷門

對宅南營

余寓居崇西坊南鄰四川營

陸氏窮兄弟韓家老舅

甥恒饑同鼯鼠中酒似啼猩蝙蝠虛齋集伊威破
竈盈蛾兒旋酒盞蟾子落書棚米盡花鈿拆瓶羞
旨蓄屏髻斜通德影環探左家嬰春日愁難忘時
風學未精囊無萬卷賣人直一錢爭客久知窮轍
交疎見俗情同牀分上下鬪草定輸贏荒學三千
袞袞辭十四塋同年宿草之墓已十有四人賦誰憐束皙句偶
學陰鏗城北看調酪牆東漸鬻錫水邊人贈草野
外鹿呼苹光景些些換顛狂事事呈書從隔歲寄
詞憶小年賡潘岳明朝鬢應須白數莖

送張漢瞻歸省嘉定

囊餘萬卷不看錢江縣寒梅又一年種放還山惟
有母蘇君負郭只無田比鄰應怪籬邊客破屋仍
牽岸上船他日于公改門巷莫忘機杼舊三遷

過碧山堂杏花下與西溟感歎舊遊淒然成

詠

闌干閑凭旋閑行暗數殘鶯喚酒聲一樹猶然未
憔悴十年消得幾清明重來松石偏憐影舊識花
枝不問名醉哭東風兩賓客無人知此遶階情

廣濟寺海棠用東坡定惠院韻

天公不愛凡花木長與詩人慰孤獨三年得得背
江南顏狀逢人盡卑俗惟餘魂夢尚風流一笑相
尋向幽谷偶聞古寺有名花絕代天姿閉金屋急
借東家駿馬來不惜銀鞍磨髀肉玉膚醉倚可憐
風花氣如天看不足始知人世有西子妙筆誰能
畫温淑殘脂半拂玉臺頭碎錦平填石鼎腹祇宜
繞樹得微吟豈必鋪筵置絲竹從今絕倒薛尚書
泛硯飄碁空品目只教紅粉笑狂言風雅何曾盡
在蜀已上並見薛能海棠詩序不如吾輩別花人獨立春風幾
黃鵠長歌月下紫桐詩寺有紫桐一株冠絕都下更誦尊前柳

枝曲落紅有恨亦深愁故舊相看兩撥觸

閏三月十四日宋工部堅齋招同萬柳堂送

春二首

水部愛詩兼愛客為憐春去只須臾尚遲芍藥連
天賞已見櫻桃掃地無金谷好風猶小住平泉遺
跡未全蕪堂為故馮相國別墅今歸石氏煩君堂背濃陰下醉寫
城東序飲圖

到來忽得江南意盡日顛狂弄水涯斜郭數行名

墅柳小山一道夾城花看雲客自移舟檝鬪酒人

爭中戟牙是日賓主皆以射飲為樂携手東風問歸所不知何

西齋集 卷之六
處是君家

題史耕巖學士下直讀書圖

蓬萊宮殿雲生棟玉藥風輕鈴索動金坡學士被
宣草朱衣小吏青絲鞵綠煙深影拂屏風黃麻熟
狀東頭送末直秋雲亭下歸梧陰退食資嘲弄人
間風月不到處天上紫薇和露種碧闌干壓水花
香玉堂主人斷清夢有客門前求醉帖一笑詩成
天宇空宮袍痕上散流香賜茗鐐邊開小鳳南唐
佳紙墨相發西京妙筆書應中錦段長題行樂詞
花箋半擬河清頌紫窄金鷗半臂紅銀井牀頭聽

鳴甕萬卷頻抽插架書不知硯北松花凍玉晨鐘
韻曉參差猶自吟窗作孤諷君年正少登華省君
才萬口爭喧誦風流直欲獵揚馬年輩還堪揖沈
宋他日置君廊廟間大幹當須有強用西掖今居
第一官知君不媿文章重種竹相傳談笑餘今之
作手誰伯仲

夏夜與劉西谷同年論詩有贈三首

畫燭諸郎舊比肩文昌光景共相憐殿中取第仍
同價花下聯名並賜錢一月差如公瑾小十年終
媿照鄰前

西谷長余一月余與西谷兩試並聯名
取第皆忝在西谷上故用公瑾照鄰事

而今空憶元和老詔寫丹青在集賢

樂天年三十六時詔圖像

於集賢閣

兩地家江隔歲分吳中詩酒斷知聞人間鈍拙偏
敦我天下文章定屬君鄭氏谷邊吟夜月白公渠
上醉斜曛何當公幹携才筆乞與幽齋定小文

年少篇章聞健時樂天風雅足吾師一生只對雲
間客百世休論帳下兒冷宦局閒須自惜騷人道
在豈終衰君家大有穿楊手孝綽文章夢得詩

西谷

為余言白詩間健是趁健之義乃秦中方言言如此今改為鬪健者非是

次韻答西谷

三日不見叔度鄙舉扇西風面常泚下車誤謁尚
書家入門造席都非是不如却掃紅塵中歸來乾
死蠹魚裏自恨平生愛鉛槧開卷還如風過耳連
朝秋雨消百憂忽見門前枉雙鯉火急催詩畏友
朋懶惰幼安方晏起還君遺我千瓊瑰何以報君
只糠粃讀書萬卷想前輩一事不知足深耻君今
文章當日進慚媿與君同甲子

豆花圖二絕句東野航

與君閑坐說江東秋實遮門氣味同最好豆花棚
下月一叢輕送短籬風

插竹成陰每數家
鴨闌雞柵影橫斜
小園秋雨新
過後獨立中庭數
白花

酬西谷戲贈

小技文章得失知
平生點竄豈容絲
吟殘只可營
堅壁才退終難用
曲師笑我旌旗仍
未變任君巾
幘竟相遺白家格
律休偷取慚媿風
流下筆時

每被老元偷格律西谷每以斯道相推故戲答是語

長歌贈王山人石谷

三吳例出能畫手
大雅百年不復作
華亭尚書王
奉常二老風流去
猶昨山人妙得流
傳秘筆力江

山破餘地追摹直
亂宋元間四海公
卿走書贄殿
上承恩宋供奉妙
藝林泉亦飛動尚
方 詔寫南
巡圖好手紛紜聚
賓從江東特致山
人來筆端造化生
面開玉帳牙檣自
天下春風柳陌千
龍媒潑墨煙雲十
二圖一幅青山盈
十丈道旁觀者百
萬人指點鬚眉皆
在掌廿載聲名達
閤門 至尊玉
几親咨賞白衣更
入承光宮妙翰喧
傳鶴禁東布襪青
鞋拜賜歸蕭散不
失山人風長安姓
氏滿華閣爭致黃
金換邱壑廳前老
筆將軍乞月中官
扇才人索一水直
十縑一石直萬錢
長年閉戶謝賓

客篝燈風雨揮雲煙東絹家家送一匹雜請終南
兼少室古鼎竒花價頓輕只言願得山人筆萬卷
峰巒散幽思今人無敵古人避誰看曹霸丹青引
不數中興名畫記嗟哉同是天涯人翰墨如君可
逐貧嚴徐揚馬若無遇不及溪山筆有神

題曹渭符采菊圖

曹善八分以
書學供奉

小籬叢菊小山雲書破花前白練帚不使中郎筆
憔悴還成元亮酒知聞詩懷淡蕩張三影人物蕭
疎顧八分誰似高歌苑西宅黃花滿把醉斜曛

寄題許不棄竒逸堂

丈夫重家聲各自愛門第所貴君子居風流每數
世子孫別賢愚誰作百年計京師得許郎孔李敦
舊契家山閩城曲荆榛草廬弊不知何代樹落葉
殘荒砌干戈人事更門戶嗟中替近年復茅堂髣
髴歸舊制修竹廢泉斷叢桂小山閉蒼苔拂詩石
手澤猶未瘞不待花木成野肴設家祭九京告先
人淒涼數年歲余本孤筦子南向爲雪涕寄詩刻
祠堂留以示後裔

西齋集卷第六終

西齋集卷第七

詩八十一首

戊寅巳卯庚辰
辛巳官戶部作

初除戶部呈一二寮友

畫省墻東初拜時十年姓氏畏人知未妨嘯咏同

中散敢道文章在左司

戶部舊以廣東為右司

簿領署

名餘故紙風流得句有宗師

澤州陳公新城王公
一代宗工並居曹長

休嗟水部吟聲絕今日郎官解愛詩

城南八絕句和西厓

韋杜人家春事幽謝公小墅沈郎樓十年題竹詩

塵在歷歷城南數舊遊

煙帶青山柳帶城花間信馬暫閑行野人不識金
閨客十里驚聞遞唱聲微之詩自序與樂天馬上
遞唱豔詩十餘里不絕

小雨溪亭野水開朱門院院閉青苔楊花莫道無
才思慣上紅闌拂袖來

愛酒憐詩踏襪新東風曾賞兩殘春五陵池上侯

家雨知是長年偷釣人杜牧詩偷釣
侯家池上雨

畫廳退食好風光金帶叢中鬪酒場煙雨不迷丞

相閣綠楊遙辨午橋莊

金元文物草連空廉趙園林指點中才子郊居空

作賦水南留與賣花翁

芳草郊原盤馬時玉鞭衫袖折花枝分明小市長

陵路悵望閑吟芍藥詩

夕陽吟住入門初遠道驚傳枉鯉魚醉倚小桃臨

水讀馬支山下手封書是日得友人
馬支道中書

遊旃檀寺三十韻

唐代淤泥寺承平光景佳天衣千載佛春社八關

齋寶相來香土花趺坐玉階文殊清似鶴摩詰瘦

于柴設供番中饌應時海外牌杖携江水影泥采

雪山崖妙頌菩提擅香厨法喜偕梁武帝詔沈約
撰菩提頌大同

四年長干寺設
無礙法喜食本鉞光晻夢華鉢影歲襄講座看

馴象經聲聽怒豺石牀眠敗革藤杖掛枯骸正挈
蓮花侶兼逢芍藥儕水邊遙認馬柳下暗通街何
處聽仙鳥誰家載小娃玉梁冰合蘚銀塔雪銷槐
圓殿芭蕉結荒臺翡翠霾金鰲玉竦橋白塔芭蕉園妝臺皆一時遊歷之所
朱輪從後轉車製以輪之最後者為貴門族紅袖向前又約指
黃金軟盤頭碧玉皆別簪時世搔頭謂之別簪小結
綴珠排繡綻鞦韆袴花裝蹴鞠鞋腰輕羅帶動體
弱錦袍諧書呪家人喜懸幡上首差不防衣露屨
都用手藏懷慣施靈童帽頻抽天女釵然燈依怖
鴿覓偈祝雄鷓鷓鷃之雄曰鷓都城每有此戲轡為相逢緩塵憐

過處理妙雲依席覆寶月掩門闔梳掃從年改風
光即日乖三生終有媿八喜浩無涯幽意凝花雨
春情茁草芽祇憐參法席綺語類優俳

從楊次也乞周兼美人畫

西京才子顧花叢始信人間有畫工顰笑似窺三
載裏短長原在一分中風流敢乞纖纖影心力看
拋眼脈功先與晴窗拂塵土玉鴉叉映小簾紅

送令貽之官銅仁四首

十年仍薄宦憔悴獨斯人江上如遷客天涯似外
臣三生蠻雨足兩地峒花新吾道長流落惟應惜

西齋集
卷之七
三
此身

芳草沅江岸羈縻一小州山深長有氣天漏亦多
愁得性宜開卷銷魂莫上樓夜郎才子地為政自
風流

愛客尚書逝淒涼憶昔時老成今不見身世更何
之臨食應同歎聞歌每共悲唯將舊吟咏留教長
官司

尚有琴書興幽踪數往還我憐歸散署君笑領空
山後會東西判素心湖海閒相思生別夢都在水
煙間

九月六日于禮部章雲招同黃自先孔東塘
劉元歎三僚友小集分賦得元字

主人初罷南宮草風月曹司與細論但指酒壚誇
後乘用黃公酒壚語媿無駟馬過高門用于公事尚餘荷鍤當
時客用劉伶事又見長身幾世孫用東坡贈孔君亮語醉折茱萸

開口笑玉鞭側帽月初昏

燒香曲題野航所藏美女熏香圖

西風吹簾玉丁丁秋燕欲歸語畫屏泥金雙帶小
衫妥狼籍半牀初夢醒綠熊卧席後猊押丁緩薰
爐睡銀鴨美人徙倚未更衣金閨新試燒香法異

香如豆火如花獸燄餘紅流碧紗相思一寸已灰
燼猶愛殘煙數縷斜小插銅瓶倚東牖妙選寒枝
出纖手分明周昉內人圖玉體橫陳委春柳散花
綾覆半篝空髣髴周防芳氣走勸君切莫負香衾
願作熏籠永相守

詠黃刑部自先庭中秋柳二絕句

牆陰清影拂東鄰只受斜陽不受塵却似開元一
株在西風憔悴爲何人
長條盡日惜風流獨掩書牀入暮秋留得黃花應
有意伴他老子上南樓

移居答野航見寄韻

王翰頻年願卜鄰窮交終歎白頭新三生洛下清
吟客十載江陵借宅人結轍虛勞長者問臨池何
用小兒嗔劉夢得詩小兒弄筆不能嗔孟光已有東廂屋紙閣
蘆簾不待春來詩引樂天來春更葺之句見貽故云

再用前韻東戴評事占

戴時同做京江相國里第比鄰而居

踪跡幽棲每擇鄰綠楊明月往還新平分宋玉東

牆徑同作曹參後舍人酣叫不防高士覺歌呼幸

免相公嗔他時祭竈如相問過酒休忘麴米春

張寄亭同年席上詠石花魚得職字

南魚賤如土數斗不論直北魚貴如金萬錢乃敢
食長年綠江魚盈車大可識其次數灤州嘉味鯉
與鯽更聞秦晉間石花美無極玉芝餐入髓紫筍
填滿臆誰與送羹材道遠不易得憶昨十年前方
丈尚書側食案初見之雙眼勤拂拭碎雪落銀絲
脂膏共拆齏前年貴戚家再見詫殊特公子爲余
言異味難自匿 至尊厭常饌夜半降 墨勅密
詔打魚來戒不煩民力宣賜充金盤受之饗人亟
腹腴飽賓客放筋增太息今日張侯案鮭菜羅南
北通印大哉陳槎頭美鮓抑法傳中饋錄烹盡膳

夫職中有天門產贊客皆震及我因論魚味京師
合四國頻年江湖通往往竄名色高價取易售卧
沙雜細肋君偏致遠物鷹窠擘嶢峒朝來設膾成
招友煩子墨新年作新歡便飽張侯德

和元微之醉詩十二首

先醉

花下傳籌未越巡等閑逃席似窮賓飲名諱道年
來敗却說春風易中人

獨醉

風雨貧家客不來
春愁如海病難裁
殘尊猶喜牀

頭在手自封題手自開

宿醉

謝家曉起笑扶行也悔連宵帶薄醒但願常年似
寒食朝朝新點杏花餉

懼醉

蠡杯米椀讓諸郎雜食羞隨到後堂還恐風流餘
習在尊前又放十年狂

羨醉

歌舞堂中倒玉壺滿身珠翠十眉俱南朝風月真
無價私寫韓家夜燕圖

憶醉

花在長筵酒在尊顛狂如夢與誰論旁人未省春
衫泣爲見當時舊酒痕

病醉

擁鼻騰騰遶柱行稍聞花氣覺頭輕今朝若舉飛
觥令祇可閑徵藥草名

擬醉

不應人事不應官上番梅殘二月寒除却判花全
未了好將連擲賭頭盤

勸醉

西齋集 卷之七
朱門靜處看鞦韆下馬文君市肆前忽見書旗誇
酒字提壺又喚小桃邊

任醉

傾缸美酒恰三升何事區分淮與澗天上歡華難
滿眼人間萬事且僂僂

同醉

十年序飲共春宵不省花時不見招袁尹笑他無
酒伴偶來竹下一相要

狂醉

春鉤暗處送卿卿斜撚金釵擲目成紅豆曲闌銀

燭換不知燒盡短長檠

紙衾和次也韻

皺似春冰白似膚夢回魚網起廉隅蔡家杵白傳
新樣姜氏裁縫改舊模不使官奴臨案寫只教小
玉上牀鋪安眠欲向天公問償得書堆宿債無

大理石屏歌

我生羈宦不滿意到眼不見江南山出門逢人看
古畫往往夢落煙霞間于家小屏才徑尺林壑天
然來几席卽潛南省退朝歸擁書萬卷城西宅隱
囊玉局石屏下蘆花坐想江天碧人間空有輞川

圖幽亭斷岫無行跡不如時時開眼雲月明北窗

一笑秋山生恍疑歐公鴉樹在歐公有和張生鴉樹屏詩忽訝

小范風林橫東坡以月石風林屏贈范純父長謠斗酒惜塵土煙

樹窗中列可數一山紫翠忽飛來却恐中庭變風

雨

和野航金水橋咏水禽四絕句

舍人獨出紅蘭署橋柱閑聽白鳥聲寄語散郎須

小立相逢似說故山情

屬玉觀前春水好宜春苑下綠陰多應憐未解金

衣舞不入宮中黃鵠歌

白石螭頭語曉煙珠簾禁殿閉年年羽林大有青

州弩莫更羣飛下弄田

宛轉粟留方得意聰明鸚鵡却當時夜來也近長

生樹偷頌花間羯鼓詩

元祐黨籍碑歌

風雨南山一片石千載猶看餘媿色不作峴山亭

下太傅碑不作征西墓上將軍碣嗚呼斯石何不

幸乃書元祐諸臣之黨籍城東好事王舍人遺余

拓紙字漫滅傳觀三歎紹述初小人復用國柄竊

三吳書畫鬪奇巧百戲青紅亂宮闕父子齊登伊

西齋集 卷之七
呂榮弟兄獵進夔龍席斜封門下擅黃麻墨勅中
書傳白帖九天呼吸蛇霧昏四海一朝變霜雪元
臣耆舊不敢哭門生故吏都遷謫三百九人文德
門書名書爵汗東壁建中靖國元年定黨籍止百
二十人五年重定元符末上
書邪等者合為三百
九人此碑五年書也紙尾何人署大惇賢奸緇涅
羞同列碑尾有章
惇姓氏相傳誣染出私人強葉依稀記
賓客君不見東漢黨人三百人姓氏曾藏王府牒
甘陵二部相詆訶洛蜀兩家分軌轍建中歲月今
幾何白馬清流泣殘魄大石麤沙磨不盡留與書
堂數人傑

次陳侍讀白桃花本韻二首

楊花同占禁煙村天上繁華不並根宋玉墻邊如
斷夢薛濤墳畔與招魂吐來春袖全無跡畫傍朝
雲豈有痕好是水晶簾下見洗紅斜倚小樓門
記否平陽拂面時白人披掩出新姿浣花箋換風
流樣桃葉歌殘黯淡枝但覺多情依小玉可憐無
色比紅兒劉郎去後燕支落惆悵東風第二詩

寄懷西華令徐去矜同年

大河西來疾如箭羣山忽斷通淮汴陳項以東數
十州水田萬頃桑麻賤典農無復鄧士載白雨蒼

煙遺跡變淮北當時二萬人軍持千里忘征戰地
力荒蕪數百年空見徵符嚴郡縣徐侯年少視吏
事鑿水重開柳陂面閑來閉門讀書史乞我新詩
付殘硯自媿中無濟河論傳觀不足驚曹掾方今
海內正無事父老常懷鄉國戀如君落落有數人
伯表餘風何足羨獨嗟爾我漸華髮清夢難追十
年宴相思何處春水深浮雲落日長舒卷

苦熱寄西厓二首

故交還往絕高車堆案何堪束帶餘此日漫嘲徐
散騎相看誰顧李尚書共知溽暑如醒醉

柳詩南
州溽暑

如酒 醉如酒 終歎清風似客疎苦憶江南煙竹裏閑敲茶
臼小園居

姑射誰登避竈難陽眠只是卧琅玕直疑長日無
生意不信人間有冷官還憶南皮沉李樂敢忘玉
井賜冰寒知君未得催詩雨常向闌干徙倚看

題王山人石谷騎牛還山圖

王宰拂衣去獨騎黃犢還秋風虞仲宅落葉子游
山階下當歸長門前小草閑煙霞應有恨傳寫滿
人間

山人以所寫竹趣圖見贈題四絕句報之

西齋集
卷之七
二
小小溪亭水石鄰郡南髣髴第一家存主人但解通
賓客袁尹風流肯到門

憐我平生偏好事蕭郎頭白尚相過江山夢入湘
妃廟惆悵丹青畫竹歌

空庭月落筆無塵醉掃鴛溪百尺新三昧君能兼

老可不知遊戲定何人

東坡題文與可墨
竹詩兼入竹三昧

紙窗晝寢日如年誰買清陰六月天他日草堂看
畫去江東管領好風煙

九日同西溟野航西厓蕉飲登慈仁寺思盧

閣用亭臯木葉下爲韻各賦五首

城西有飛閣百尺凌蒼冥下臨忽無地萬物疑一
形石闌出雲霓千里延郊坳不見雲外山但覺煙
中青百雉隱列剎天風清塔鈴長年送人處夕陽
笑空亭

煙火十萬戶車馬如秋毫中有雙鳳闕勢與諸天
高吾曹百僚底聲名一鴻毛空有遠舉志孤鶴唳
九臯文章本無力難爲知音操學地生隱心不如
守蓬蒿

佛教來中國江左稱老宿維摩亦有言議論九十
六前朝崇象教開林飾珠玉寶相籍閑安天衣光

可掬空中四照花
髣髴鵲山木何時逃
火宅妻子脫屣速

幽并百戰地生士
多任俠盤馬上東門
秋風縱郊獵黃沙
萬里平天與窮荒
接燕雲十六州
山河積寒雪白骨
野草埋石田觸畚
鍤銷沉范陽兵
歷世今幾葉

斜日忽西落幽懷
不能寫暝禽歛來
往人語息原野俛
尋萬仞梯拂衣雙
樹下情塵積爲岳
浮生歎不捨得酒
且相覓呼童致菜
把騎驢歸去來莫
遭官長罵

詠野航齋前所蓄白鷺雛

少小煙波掠葦叢
霜衣曾伴杜陵翁
寧貪金闕三霄露
却背江湖萬里風
靜看梳翎添檻碧
有時翹足映花紅
舍人宅裏相憐惜
生長俱同水國中

題喬無功蒹葭書屋圖與西厓夏重同用東坡寄傲軒韻

與子各好飲相見
驚兩禿蕭蕭滿蓬
鬢祇可岸高

屋齊梁間有高屋帽一身違故山
無竹即已俗
況復混塵

土受此束帶辱子
雖不得志良馬未
駕轂風塵傲三公
雲水長四瀆柴門
白田下小艇蒲帆
六徜徉

去湖海魚具辨粗足野蔬僮早擷斗酒婦久蓄一
笑酌青山春波釀寒綠不識謝宣明不署徐干木
日飲真無何只望秫田熟

與西谷誦夏重竹林僧舍用昌黎短燈檠歌
韻之作因各次一篇

我如黃鵠清而長君如白璧溫且光龍鍾各年三
十九眼中閱盡炎與涼叩門只有數游好終朝詩
酒連繩牀浙西才子長安客春官三上蘭成策人
間嫫母偏易嫁越女羞稱天下白新詩逾好應無
前醉讀百回夜不眠老筆凌雲真縱恣團扇清光

奪翡翠與君太息當途人有才如此長淪棄

喜西厓改官給事中

海內才名三十年詩人例作拾遺官蘭臺共喜軒
車聚畫省空傳梧竹寒直道漫焚封事草清時不
用惠文冠祇憐未獻河東賦江左徒留子布看

午亭山村圖歌為澤州尚書陳公賦

公乎愛山買山任花木林泉入煙霧鸞鶴雲霄四
十年清夢長留太行樹午鐸亭東澤水流空郊杉
栝風脩脩山僧手開翠竹寺行人就宿桃花洲楊
柳東頭曠平陸桔槔春水清于玉雲中雞犬喧小

市隴上牛羊散斜谷風流步屨南山村中有獨樂
五畝園野鶴無心自來去青山爲屋松爲門公思
此景歸未得畫圖急遣王生筆百道紅泉天際生
千家綠樹煙中出草堂幽徑古道邊丹山樓閣俱
飄然雲封賜書閉石宇風動垂綸留畫船我從公
游聞公語談笑從容論詞賦家山指點秋毫末此
是平生釣遊處野岸春還枋口花雲林下有朱門
家悄然坐我王屋下眼中籬落開煙霞澗流八丈
峰千尺門外蒼然何代石自是山公有幽意衡霍
近在王侯宅小沁城西翠色新村社雞豚更幾春

青溪紅樹不知遠因公欲問山中人

題顧進士有常雙喜圖

南山靈雀畢逋尾北客咨嗟南客喜五色文章翡翠
衣朝浴銀河夜丹水顧君皎皎鸞鳳姿三入長
安取青紫家人春夜祝燈花早起羅巾上蟾子窗
前雙鵲來報君相對楂楂鳴未已舉頭但媿不能
言似傳姓氏書名紙近銜丹詔下鸞坡遠送泥金
歸鶴市極目煙霄不可量他時一舉君千里好誦
東坡異鵲詩兩兩棲衙從此始

送西谷視鹺津門

海于天地間百川水所宅煙波本無心何事勞煎
迫京東四州境蒞薪伐窮澤萬竈生青煙匝岸浮
霜白五陵卿相家鍾釜食指劇蓮勺供虎形水晶
點行炙長安百萬氓十口算禹筭老男及少女一
月一人籍水國繡衣使門外陳檠戟長年大農帖
捆載連車輓劉郎富才調本是石渠客改官入南
臺摩挲府中柏諫紙未盈箱忽奉鹽官檄紅旌引
驄馬秋老東門陌執手平生交柳下羅燕席酒闌
爲君言行行困乖隔方今太平時少府錢充斥本
富藏四海民力良可惜 聖朝尚寬大屢 詔減

賦額吾曹固文士少小愛風格上體 天子心下
畏僚友責勿學桑大夫胸邴煩計畫勿學張平叔
交手課陽翟贈言以當別願君重圭璧西風帆扁
舟木葉空蕭槭冠蓋忽已分斜日遠水碧

毛生子開歸黔中用昌黎雪後寄崔二十六
丞斯立韻柬令貽

長安浮雲暗天關春風不到南荒山五溪三澗足
卑濕嗟君兩落蠻獠間萬里一官背妻子簿書堆
案凋朱顏毛生遠來慰我意摳衣翔步雅且閑相
如入室真弟子有才不用如蒯管袖出君詩發異

采峨嶺天際豈易攀春江之水綠蘿合叢竹如愁
誰與刪相悲相失不相見但對木耳垂金環十年
仕宦尚塵土強弓寸寸不可彎蘭臺故人初拜
命時同年中同日一笑已破造化慳期君努力事
課最束帶趁此腰脚頑

酬陳子文員外見寄之作

三載省郎憔悴客也隨花底散朝迴每從衆裏嫌
官職強向生前鬪酒杯李氏舊書誰借與用歐陽公借韓
集柳家新樣許偷來子文只君便是陳驚座何處
相要解愛才工書

題新城王尚書荷鋤圖

謝公愛栖遯心跡循歸路秋山無淺深獨往自成
趣平沙白石淨野水兩迴互老樹一徑斜墟曲數
家聚願作隴畝人手把田家具隨意入溪口悠然
忘日暮風竹隱禽聲空江野色赴柴門忽不見稍
辨煙中樹何處遠山雲散作前村雨

咏燈花二首

十載家人卜夢曾小紅如意上銀燈應憐詩老無

多酌老杜獨酌詩共道先生自此升舊淚銷磨還

戀客殘書檢點不成僧玉堂枉鬪新佳句伴直相

西齋集
呼恐未能

東坡夜直玉堂詩
喜入燈花欲鬥妍

煙滿重簾月滿紗短檠遊戲作鉛華家貧忽有錢
財喜老去偏憐頃刻花東閣棋聲光並落西窗夜
雨影初斜主人無事勞相報空媿風流侯喜家

次韻蕉飲東西厓

黃庭一卷苦未熟萬念皇皇日輾轉閉門著書論
當世下筆欲掃三千牘饑寒雅不問妻子數口低
顏強食粥案堆黃韭庾郎鮭厨烹紫蓼周家菽故
人湯史吾同好不學搔頭事邊幅送老清吟數百
篇疑聽哀聲匣中筑平生祇合守陋巷束帶何堪

作臣僕湯君趨省列諫官青匭時投交午木史郎
十年滯鳳閣仕宦如椎終不速媿余執版詣陳蕃
豈合才名號龍腹只有判花興不忘飲罷中庭月
可掬作歡我笑阮嗣宗白眼終朝為誰哭六十悠
悠一致耳凶吉徒勞問於鵬黃金虛牝莫輕擲空
洞何曾置藿肉勸君慧劍割恩愛兜率須歸老禪
宿他時一唱小山詩叢桂秋風營比屋

楊郎中種白蓼花一本於戶部廳事前幽意
可愛秋來凋落感賦長句

仙郎手種花如雪草木幽香落印牀野色未能逢

柳惲白頭應笑似馮唐坐看風月清如此共有江湖夢未忘怪底秋來無意緒不留吟咏到斜陽

題朱悔人詠王尚書齋居草木詩後

閒看草木愛郊居好繼王郎十詠餘江左諸賢已零落風流最賞沈尚書

高堰行寄戶部侍郎德州田公

淮山青青河水渾漕粟東南二千里水衡日費百萬錢南山銷磨淇竹死天子咨嗟命水工作歌不作宣房宮九官連翩各開府泥行蹈毳如乘風萬夫登登夜版築下窮窟穴蛟龍哭水門股引

六斗泥何用長茭與美玉蓬窗一卷河渠書天公已欲安淮徐兒童拍手父老喜萬古微禹吾其魚高堰之高高百丈堅地湖孺束陂障煙波何處得龍骨白馬金隄正無恙汲鄭當年策亦良桃花春水猶湯湯賜金莫羨王延世空地絕倒關子陽清流分處見淮海公其歸來調鼎冀神沛已知河伯仁使者毋將衛人罪賈郎三策報吾君綠疇畚鍤看如雲而今冷笑龍門令負薪空自從將軍

移居和白傳與元八卜鄰韻東松坪二首

晨夕相依始是親共求閑地寄閑身何愁風雨還

如晦從此年光不負春天上有星歸舊井人間無
價買比鄰只憐才退心情減難示孫郎帳下人
長年悔與簿書親計日收回文酒身一卷花光連
老屋兩家詩句鬪青春賓朋不辨誰為主圖史于
今始有鄰却似靖安坊裏住往還減却送書人
移居靖安坊詩更喜往還
相去近門前減却送書人

題趙松雪畫淵明撫松圖

圖為莊逸羣
同年所藏

長松如高人避世獨無伴落落天地間不受俗情
玩陶公休官歸三徑跡可按愛此偃蹇姿盤桓忘
日晏蒼龍結偃蓋不及南山半悠然西廬側甲子

誰與算流傳鷗波翁放筆為直幹霜皮二千尺風
雨脫手腕笑彼五柳質尚作溝中斷髣髴斜川人
折腰嘗自歎東晉板蕩餘與世若冰炭恐為斧斤
求虬龍充釜爨遺像追淵明斜陽角巾岸蒼顏相
對清一醉落里閑嗟余困微名四載滯冗散遠媿
八十日心似謝公亂偶來南窗下看畫發悽惋草
木尚如此空歌白石爛

酬子文寄題西齋屋壁之作二首

每憶城南修竹連蕭然長日病夫眠閑談共舉江
湖事清夢時尋草木綠羞澀終慚書未聖窮愁却

西齋集 卷之七
笑酒空賢風流我媿膠西守詩卷飄零四十年東坡

年四十知密州西齋詩蓋公密州作也予今年亦四十四矣

詞賦流傳愛左思鄭家奴婢亦吟詩此生應與文章老舊隱何慚猿鶴移三徑止容元亮入百年終有子雲知江田負郭荒蕪甚誰乞東歸陽羨資

唐玉笛歌

笛為孔戶部東塘所藏

崑山黃玉天下稀三星為眼雲作衣何年織手破煙雨珠簾歌斷宮花飛開元天子風流絕李暮老去亡音節吹裂山東二百州至今明月傷離別孔君好古入骨清獨愛人間古樂名忽雷弦雜花奴

鼓與此三物同淙琤

孔君家藏唐小忽雷羯鼓與玉笛皆奇古

夜半牀

頭鬼神泣前身應是江山客桓伊灑淚曲未終石城野水無情碧

十一月二十五日送雲岡歸松江用東坡別

王子立韻

三年做盡黑貂裘獻賦相如未倦游老馬空餘千里志書生難為一身謀江邊畫檝風添腹門外青山雪滿頭莫笑平生嫌戶小歸來新號醉鄉侯

代錢衡送別再用前韻

安得人間萬里裘伴君霜雪故山游但聞歌曲銷

魂別不用文章向野謀四海風流習鑿齒三生書
卷賈長頭明年瓜果清宵會腸斷青陵憶故侯

雪夜和馮留士韻

誰言好物不牢堅且鬪斜風共撲綠窮巷盡如無
事日西窗長似欲明天陸郎舊識斑駁恨江令應
生玉樹憐此夕羨君名士飲兩牀絲竹酒罍邊

西齋集卷第七終

西齋集卷第八

詩五十九首

壬午癸未至甲申
二月官戶部作

新正同松坪耑木蕉飲西厓詠盆中三首

松

蒼龍今幾代留此種時孫白石根初託青雲勢已
尊庭空低蓋舞風動小濤喧詩老成都宅淒涼可
共論

竹

一夜湘江雨春陰翠欲生清霜微有節寒玉尚無
聲好待平安報還來故舊情官奴知秉燭新畫小

西齋集
卷之八
枝成

梅

同是江南客空憐座上春
開宜封北戶飛不到東鄰
煙雨何知恨風流亦有神
未應催我老莫比白頭人

藥酒

酒聖誰傳肘後方醉餘春病入膏肓
將鬚豈有君臣意適口惟聞草木香
夢到橘林疑是國偶逢竹葉即爲鄉
平生禮法常疎放自笑年來日飲狂

紙帳用東坡韻

藜牀猶喜故人連懶卧應嗔邊腹便
才子更誰知錦被用南史劉孝標事詩人自古惜寒檀
梨花有夢疑看雪柳絮如煙不見天
此夕似歸湖海上醉來橫抱白雲眠

題西厓所藏元王孤雲畫九成宮圖

九成之宮何奢麗丹青不絕傳
今世岐山百里蒼翠開臺樹參差入天際
架楹竦闕鑿羣秀長松怪石分竒勢
憶昔開皇締造初山河帶礪猶綿絕
空看陳宮三閣圖殷鑒誰爲太平計
力役煩寃新鬼哭百萬翻教賞才藝
後王煙水愛揚州王殿陰陰

綠苔閉東都無人問仁壽朝開西院空流涕晉陽
龍起白麟來風雨興衰凡幾歲楊公斷手魏公銘
百步清泉夕陽逝唐家太平暫臨幸置官居守煩
宿衛更聞避暑借岐王天書一紙娛兄弟杜陵詩
老仰嗟歎貽謀未善由文帝君藏此圖作詩史風
漸箴規若龜筮

和人詠筆牀

碌碌毛生倦豈知卧如山積復如錐桂枝曾入吳
均賦梁吳均有仙物空懷曹植詩見梁元帝謝東
宮賜白牙鏤管未許道人先作冢長看子弟欲臨池玉臺不敢

輕離手好伴珊瑚架筆時

題汪悔齋太常觀海圖遺像二首

海外文章絕代才天輪地軸筆端開流傳不數立
虛賦何止橫吞雲夢來

五雨天風萬里長黃支船小入微茫人間畫像如
傳去風貌猶驚可老羊琉球國王名可
老羊見北史

七夕澤州陳公召飲邸第即事二首

東第微涼玉露清不須烏鵲報新晴曝書聊復庭
中事賜扇空餘篋裏情洛下才名求八顧關西人
物壑三明問公欲乞天孫錦許向絲綸閣下行

西齋集 卷之八
神仙才子下蓬萊玉匣清吟暮景開千里明河橫
几席萬家秋色聚樓臺褚淵自欲携琴至謝傳驚
聞弄笛來此夕北堂涼似水新詩好借拂塵埃

登澤州公宅晚晴臺限晚字

西山如駿馬逸足犇長坂高臺招之來空翠竟不
返尚書退食暇庭戶花竹偃詩地興有餘文章識
微婉朱闌過疎雨秋氣卷雲燼始知君子心登眺
獨閒遠三載趨省墻晨夕陪車幘時於百僚上誦
句憐鴛蹇收爲杖屨遊飲食荷繾綣明月照綺席
高論抉文苑仰窺鄴侯書陋若飲河龜空慚沈范

賞從公嗟已晚

遊城西南三首

呂仙祠

天風吹客衣飄然仰高閣入門綠樹靜階下野花
落汲井泉味清疎畦灌藜藿悵望雲中君神仙邈
難作

黑龍潭

清溪片雲起寒山忽已夕飛雨過城西返照一潭
黑何年海氣來蛟人卜茲宅默禱願年豐哀我田
野厄

陶然亭

秋水延遠目孤亭得天趣殘鐘古寺煙野氣前山
樹魚鳥並忘機悠然平渚聚誰人安釣艇好泊蘋
花住

同夏重詠白杜鵑花

越州殘夢報開初一曲新樓月影疎李紳在浙西
有杜鵑樓

苦憶西川杜詩老獨依南澗白尚書驛中淺紫煙

消後元微之有青山
驛紫躑躅詩堂下深紅色退餘東坡有菩
提寺南漪

堂杜鵑
花詩試問玉京天上客春心相託定何如

贈東海公孫于朝兼簡師魯

崢嶸頭角見諸郎萬事淒涼夢後堂鄭氏小同傳
舊學到家少蓋有文章人間將種生無敵海內恩
門老未忘從此公侯應許復青春雛鳳好風光

水匱歌并序

世傳西洋水匱為救火之具其製以木為
匱銅為筩中可貯水數斛筩之下機軸連
環用人力擠之水便上射東西高下隨手
所向遠至數十步外邇來閩人亦能為之
余因作歌以紀其異

歷山山下千年銅化作人間百丈之神龍口噴白

雨如撒菽天瓢倒勺蛟人宮我求于龍寘火所水
妃騎龍入融風大龍小龍各來鬪羣雌不敢當其
雄東門舊客歎神力仰視屋瓦飛相從祝融告休
玄冥笑擘山翻海龍之功我從父老問其製海客
虬鬚傳近世八閩國工竊天巧轉機削軸若符契
十夫之力遠可將貯泉百斛憑水遞長疑上帝賜
九河天跳地蹕不爲厲君不見天漢西頭火氣昏
鄭災不用裨竈言權竿玉瓚穰無用恨不移置司
宮門又不見成都市上酒如注喫來餘臭爨巴雨
神仙之術亦偶爾水龍今在復何懼爲語西京劉

子駿龍乎龍乎亦雨具

壬午十二月二十九日 召入 保和殿

賜 御書 臣曠得唐祖詠詩闌前花覆地竹

外鳥窺人十字即事紀 恩有作

天門初日照蓬壺俯視西山似畫圖雲裏曾遊三
玉殿袖中新得十驪珠子孫競喜傳家好鄰舍驚
看燭夜殊他日林泉買花竹可知雨露到江湖

咏白丁香二首次子文韻

細膩風光意未厭小齋幽思爲誰添長迷畫閣低
雲角欲近書窗鬪兔尖漫許飄搖同約素縱教刻

畫笑無鹽水妃一覺東風夢獨倚人間丁字簾

鏤雪雕冰滿地温淡煙斜月入黄昏馮唐羞對滄

浪髮宋玉難招寂寞魂帶結少年愁洛里用玉溪生柳枝

詩花疎詩老詠江村用老杜江頭五咏事多生自有春條恨

暗雨芭蕉共掩門

題徐虞門都諫宣沙視牧圖

雲州雄鎮天險絕九月寒風利如鐵鷓鴣堡西秋

草肥渥洼萬騎長蹄齧徐卿豪氣天下無驅使官

奴憐汗血短衣匹馬看射虎一夜踏盡陰山雪君

不見天子之馬十二閑飛龍紫燕三花斑千金駿

骨不易得徒令高價留人間漢家當時玉關閉輪

臺逸足空山斃可憐開元四十三萬匹碌碌都隨

張萬歲前年將帥出征西清秋落日聽鼓鞞黃塵

無光黑川渡蕭蕭夜半驕長嘶大小青山插天起

平沙萬里駝秋水地上何人賞神駿只為三軍託

生死嗚呼劉公的盧不可追温侯赤兔徒爾為平

生一顧遇伯樂橫門報恩亦有時徐卿戟髯仰天

笑慷慨為賦從軍詩

二月九日過子文隱綠齋看花小飲次韻

白馬翩翩老季常風流五字敵韋郎題名都用尚

西齋集
卷之二
書筆 召直曾携太一香春至共貪花氣醉興來
惟見草書狂閑曹却笑真多事偏占人間翰墨場
送翁康飴同年督學廣東二首

楊柳東風旌旆催蠻花含笑馬前開此邦再著蘇
夫子今日誰當翟秀才舊社却逢初飲水生衣半
點落殘梅共知海外文章伯携得珊瑚鐵網來

五載同趨直省班羨君去住只蕭閒好將青瑣囊

中筆為寫黃茅瘴後山訪舊梁鴻春白下

謂藥亭
同年

招魂屈子水雲間

謂翁山
山人

龍人蚤戶傳新詠直使

承平景物還

題子文夢墨樓

曹公石墨十萬片三臺一螺送書笥東坡家藏三
十九龍麝還求永寧第二公風流絕代無拂紙羣
鴻共遊戲人間玉玦不易得北海凋亡墨官替燒
松遺法竟誰傳空見徂徠日憔悴陳侯二十愛學
書野鷺朝臨會稽字小窗清夢隨寒鴉萬寸珪璋
堆冷翠覺來下筆忽有神一揮百紙雲烟麗翰墨
磨君四十年天公詭譎聊相試今年 召入蓬萊
宮集賢學士驚絕藝霏霏雲霧繞長身歸來更拜
千金賜諸豪爭致陳孟公姓氏喧傳到童稚尚書

喻麋乞判牒觀君落筆圍羣吏濡髮清詩自寫成
鄭虔三絕君兼二我生愛惜一點漆程邵桑吳貯
盈噐程君房邵格之桑林里吳去塵皆近代墨工薑芽對君難出手應
笑羊書似奴隸元和新樣吾所畏餘子碌碌猶兄
弟君偏假借獨見推草書不暇羞螳臂煩君為文
弔剡藤肥瘦何人識真意海內若無張伯英羅趙
紛紛亦何媿

寄題龔敬立意止齋即送其歸婁東

吳市曾聞梅尉聲謝家祖德舊知名

龔氏自安節先生後世有

隱遺風猶識漢三老

余十五六時曾識其伯氏幼菴先生

物論還同

楚兩生

敬立少與兄義存齊名

宅繞新畝渾舍喜門臨春水

舉家清試栽慈竹高堂下應惜潘郎賦未成

余與敬立

皆有老親而余獨不
得歸故落句及之

送杜讓水之官處州次子文韻

天門舊路昔曾攀供奉當年鬢未斑時論縱教輕
白髮君恩猶許乞青山陽冰遺墨千秋後靈運
風流兩郡間莫道前驅輸五馬古來司馬一官閒

蹇驢

旅食相依三十年朝天路滑不勝鞭面長每被孫
權笑聲惡翻因王粲傳令僕有才何止此怒蹄無

伎亦徒然曜靈殿上如相問也博君王一愛憐

王少傅文靖公挽辭

先帝親臣第一流功名終始鳳池遊
兩朝社稷承遺詔萬里江山預密謀
畫像人傳宋司馬歌詩家說漢共侯
三年絲竹音塵絕獨有彭宣淚未收
從兄條聞訓導望江詩以慰之

吾家九兄弟少小生門闕傳家有賜書
聲譽未汨沒阿兄儒林秀才筆獨自拔
磨丹事鉛槧甲乙忘歲月先公所愛憐
早賞千里骨至今一囊文夜半光燄發
老大才命違天不補黥刑學舍竊微祿
低

頭學干謁書來聊自笑一官忍顛蹶
江行家半西倉卒換巾襪平生畏波濤
夢落蛟龍窟水雲如屋舟秋聲眇林樾
京師老郎潛人事多于髮中年覺哀樂
手足痛存沒淒涼大雷岸草蹙淚已竭
零落阿買書不得繼勲伐

近張氏猶子
邈相繼凋喪

幽懷無可語

吾處若株檠五年從奏事起草空書笏
篋走神仙魚衣藏主簿蝎羈宦尚未歸
躑躅溷隸卒病馬饑渴同誰與芻豢齧
空齋種首蓓一飽歌城闕

詠庭中老樹次趙恒山韻

摩天拔地老風塵雪壑寒枝未肯春
龍虎自成千

尺勢虬蟬難撼百年身東陽太守真知己
穎上將軍是故人我亦平生不材者
卜居為此獨相親杜老

相樹詩誅茅卜居總為此

追和令詒戊寅詩四首

沂州旅夜見寄

春蠶絲盡已無眠回首東風去國年
一紙書題千里月半生官上兩漫天
人情應悔杓當鑿歸夢猶驚矢在弦
莫道東坡真已死天涯子厚為流傳時都

下有傳令詒死問者故來詩有幾望生還存死友之句

三月三日遊城南

一官未達世所輕心如駿馬驕不行
偶離櫪下出城市始知春草還多情
舊遊似夢不可名王郎落筆詩寫成
六年光景一開卷疑有花竹來相迎
我生讀書老眼明插架萬卷連軒楹
時無俗物心適清江河何處浮木罌
為問人間太瘦生百年筆硯徒縱橫
恨君催詩作強敵無日無君剝啄聲

戊寅正月至京師作

才名廿載在朝廷共道中郎有典刑
殘吏空教飛讞篋書生終自抱遺經
黃當漫著貧家賦青草新題陋室銘
寂莫牀頭書萬卷閉門何日弄添丁

近年令詒有
喪子之痛

題西齋詩卷後

清詩天地與長留短李難追是昔遊拔士曾逢許
平輿讀書終媿鄭台州文章敢道輕千首當代誰
居第一流楮葉未成還自笑任他覆瓿為人收

題蕉飲使滇集後四絕句和西厓

使節西南萬里馳才名偏許楚僮知不教夜渡青
蛉水為要先題金馬祠

滇國曾開異姓王椽船銅鼓摠淒涼一從李白空
歸去今日文章到夜郎

四十年中服遠夷馬前羅拜使臣時諸生誰是今
何武遣誦中和樂職詩

程番西去入牂牁風土江山孰較多應記舊時香
案吏三年留得竹枝歌西厓丙子出使黔中

和令詒十月四日 乾清門引 見

甲夜趨嚴刻漏長 天門藥樹鎖寒光百官進退

才三日唐宰相故事入相三日後進退百官兩賦迴翔已五霜唐國史補

云戶部分兩賦玉殿齊班書上考 丹墀布席問戎行

時試武進士於太和殿前何當仲舉分餘論曾識當年老范

滂次日荷澤州相國陳公論薦

和令詒十月七日 召入 乾清門 御試

日射蕭屏午景移 玉階起草敢論思 書生誰定

盧循策前席 慚無賈誼詞 東郡流民悲水國 南方

老將宿舟師 是日積貯策二道 試海寇 紅燈執戟諸郎擁 爭

看中書落筆時

冰魚

霜鬢雪鬣趁殘年 恰稱銀盤入饌鮮 味並桃花流

水美 張志和詞 桃花流水鱖魚肥 影隨脩竹小園傳 庾信小園賦一寸二

寸之魚三竿 兩竿之竹 漫疑白小還論斗 豈比吳餘不取錢 徐陵與王僧辨書同冰魚

獨有江南徐孝穆 殘生相對絕相憐

之不絕

鐵腳

蕭颯金風塞草蕪 蒜頭椒目戲枋榆 未登晉代桃

蟲賦好上宣和稻 雀圖豈有竊脂同 素質不須彈

肉費明珠相看斤 鷄蓬蒿笑得共扶搖 萬里無

題夏重初白菴圖

人間萬事如白髮 百年閱盡終枯槁 蕭蕭鶴鬢亦

風流道人不用黃精掃 查田居士厭行旅 青山誓

共蓬蒿老萬里 歸來初白菴 花竹圖書事幽討 只

思彌勒與同龕 不信浮生有熱惱 縱饒公道三千

西齋集 卷之八
丈賤貴何煩掛懷抱但恐星星媚側室阿翁擲鐻
當絕倒何意流傳子虛賦相如為客知名早公卿
犯嚴出薦口殿中 召視承明草啗以棗脯置華
屋龍馬安能脫櫪卓誅茅舊約不得踐空使歡華
笑肥腦曉夢官梅催白頭故鄉尚有湖山好

恒山冬夜不寐以二詩見示輒用韻和之聊

廣其意

浪說蚊蚋境亦虛寒衾料峭自蘧蘧風聲偏聚三
冬夜酒力全銷萬事餘老去漸憂曹子髮卧來誰
得宋王車華胥有路非難到試讀人間長柳書

誰是非非無想天亡羊臧穀總茫然共憐甲子如
過客漫守庚申欲學仙十載揚州名尚在數峰江

上句誰傳酪奴我亦長為祟不咎前非只醉眠

勲不寐詩酪奴作祟攪
秋眠追咎前非四十年

癸未除夕

生涯爛醉餞流年已到飛騰暮景邊萬事人間無

惡夢一家宿世有前緣

因緣經云千佛過去世時
種何功德常生一處同共

一家愁中那覓還童藥囊底誰餘使鬼錢獨怪兒童
喧櫪馬五更催上九重天

次韻西厓正月二日遊憫忠寺過潛夫別墅

天寒古寺靜無沙喜見兒童采蓼芽
慧業何年始聞道幽居到處每思家
入門曾識新移竹過客還嘗舊賜茶
寄語風流湯給事不妨詩酒送生涯

送徐去矜知永康州

天子大開都護府爨蠻萬國皆臣虜
銅虎新符五寨兵將軍雪夜提桴鼓
湖南昨獻捷書來椎髻干夫頭繫組
白崖開置羈縻州金甲長銷謝典午
是時殿上策賢良文武英姿頌明主
三十九人金馬門忽降天書落南土
浮動山前海氣昏煙非煙兮雨冰雨
龍編朱戴火餘蠻歡笑馬前爭負

弩萬里驚傳賢使君清風已掃黃梅蠱
平生竒絕是茲遊王事何須歎靡盬
監天心原不別要荒要使南交留召杜
聖朝文士安四夷銅柱功名何足數

重送一首

西捲音權北帶漢山川人到南荒別一天
臣節自能輕萬里君恩原只許三年
黃支有市通蠻貨青草無情起瘴煙
莫羨諸公臺閣貴春風載石待君還

正月十一日查夏重蔣揚孫二翰林侍直

暢春苑枉顧宣武寓居輒贈四首

元會千門放仗遲
早傳宣室賦新詩
誰當次仲居重席
猶喜相如並一時
大府同牢常賜食
中官過馬每教騎
東風閣道芙蓉苑
天上頻催載筆隨

絕塞金輿避暑還
翠微宮殿夏雲間
行殘北道

千屯月吟盡西蕃
萬部山射鹿草中紅
旆動釣魚

花下碧流閒
六軍罷獵歸
牙帳爭看蛾眉第一班

癸未五月二翰林侍從口外有詩紀事

玉鏡山泉四面通
小東門外又春風
賜書每共

新元宰

澤州相國

作賦還同老侍中

楊玉符編修

天筆遠

搖煙際翠宮袍偏近日邊紅
遙知小語傳柑夜盡

獻歌詞頌歲豐

似酒殘年不可追
羊求踪跡惜差池
文章當代論

才子

謂夏重

翰墨前身是畫師

謂揚孫

萬卷已看窺秘

閣數篇空復詠
曹司何時下直携
詩本報我蕭齋

風月知

花朝同令詒
寅谷蕉飲詠
西厓齋中梅花水

仙二首

一樹空山雪三間老屋塵
故人皆久客此日獨知

西齋集 卷之八
春絕代詩難詠誰家畫入神何如林處士相對卧湖濱

滄海難為水凌波即是仙數枝當畫障十日養山泉名出離騷後香爭兄弟前西湖有遺廟終借老坡傳

二月十三日

賜朝鮮安南二國鞍馬銀帛

於午門外余與子文曹長見其二國使臣畫

地作詩因命小吏授紙筆令書詩亦清雋可

喜歸次其韻

中朝聲教似風驅四海車書本不殊箕子八條傳

內部越裳三象出天符

安南有天符海門

柳城文物餘冠

履花步山川入版圖借問碧瀾亭下客官名還號

大加無

後漢書注古鄒大加高麗掌賓客之官如今之鴻臚問其二國使臣皆鴻臚官也

附安南鴻臚卿何宗穆贈朝鮮使臣詩

周原萬里共馳驅纔立談間志意殊道理淵源

攸一揆衣冠禮樂却同符畏天各謹侯朝度任

土同歸王會圖流水高山琴載鼓知音世有子

期無

戲代朝鮮使臣答安南贈詩仍用原韻

小邦忠孝效前驅一體唐裝言語殊萬里市書無

舊禁三邊欵塞有新符紫門曾就簾前試宋史朝

坐紫門小殿試貢士謂之簾前重試今使臣自礪山君而下皆朝鮮進士茅徑驚看徼

外圖六十年來太平日日南應道烈風無

西齋集卷第八終

西齋集卷第九

詩七十九首

甲申三月至乙酉五月官給事中作

和令詒三月一日得

旨銓注諫職

黃紙封題出禁門東風携手拜新恩窮魚已

分投枯肆病鶴何緣得敞軒鄰氏一枝應自媿王

家七葉敢同論獨憐壯志非當日猶許清時作正

言

次韻西厓留題王敏行取園

黃閣東偏竹木幽主人醉客只髡留風神獨許追

中令官闕還應號小秋唐人稱吏部郎為小天禮部郎為小儀敏行官刑部

故曲水欲題三日宴蘭庭惟待一觴流送君盡室
云江西去持被何須語不休
時方有江西僉事之命

初入諫院呈諸垣長

玉階清切尚春寒倚柱人稀唱漏殘一夢天涯仍
異客十年門下始同官漫思魚鳥歸山晚獨少金
貂換酒難為約平生輕仕進王郎當作侍中看
南史

王峻與謝覽約官至侍中不復謀仕進

石門少宰兄宅同宗人聚飲相與縱論吳中

山水余因極道洞庭西山風物之美投老思
歸慨然神往明日率成一篇邀少宰同作

我自田間來不歸忽十年故山猶在眼清夜常茫
然人生取將相事業圖凌煙功成買田宅子孫知
誰賢丈夫困微祿窮老難安眠官卑不肯歸枉計
山資錢官高不易歸何止羞無田三吳江湖窟萬
頃清波連具區一明鏡千古浮長天中有兩點山
水上生青蓮白雲倏來往剛氣相連綿西山更絕
秀林屋幽虛傳
九微志云林屋為第九洞天曰左神幽虛之天靈威啓石
室天后乘飛輶白芝不世出寂莫餘隱泉更聞通
五嶽百尺蛟龍淵東窗櫓聲下便闕湖光前草木
盡太古所至疑神仙山中亦何有結屋蒼崖邊長

松自落落翠竹惟娟娟梅籬五尺短橘實千奴駢
溪翁不識字一飽萬慮捐吾生亦老矣安得長終
焉借問鼎鼐味何如邱壑專猿鶴遠相弔早寄招
隱篇拜爵太湖公趣具天隨船全家依水府垂釣
共擊鮮他時比朱陳淳樸成山川相携歸去來永
謝塵區緣

酬令詒同省見贈之作

五月中書待詔餘三人

御筆是親除

宋慶曆中歐陽

脩余靖王素同入諫院時名下贈詩有御筆新除
三諫官之句余與東發令詒二主給事亦出自
中旨不誰傳風裁驚華省從此文章入諫書他日
由銓注

延英容並立同時光德喜連居

唐鄭谷與張補闕
茂樞連居光德見

雲臺

碧天十七年前侶兩掖平分奉屬車

時余同年六人

並在
諫垣

和恒山贈履上人

曾識吳中老宿顏東來為我說無還已空白髮三
千丈不住清風五百間茅屋詩如孤鶴遠竹房心
似野雲閒十年夢覺南華寺踏遍梅花風雨山

久游
嶺外

諫院獨坐

青門眉格已殘春八尺蒼然突兀身潘令久知雙

西齋集 卷之九
鬢改杜陵自分一生貧不慙癡鈍為新進猶喜提
携有故人騎馬鷄栖竟何事滿箱月紙已埃塵唐拾

遺官月給諫紙二百張見樂天集

送劉戶部禹峰出守真定二首

湖海重來興未孤玄都零落舊遊無劉郎風月多

遺恨追寫桃花千樹圖

君居戶部時顏其室曰又來館

天地遽廬夢豈真伯倫落拓醉中身風流太守誰
相識元是高陽市上人

四月八日和西厓

前身占夢本浮屠四十蹉跎見白鬚清夢長時到

疏筍幽期何日飲醍醐思投洛社吟遺句卧想廬
山看舊圖老去慚余方學道宗雷誰許附門徒

四月九日雨中侍直

春水平階上殿時滿衣花露放朝遲但聞湯

禱宜相慶縱笑秦優亦不辭萬國無禾從可望

九重有喜最先知諫書自媿曾何補只詠元和賀

雨詩

送許不棄之官陳留二首

郡國陳留古蕭條風俗衰殘書老父傳蔓草羶生
祠縣小官齋陋河高春岸危驛亭鳴鴈過歸夢石

林期

石林精舍不棄
閩中讀書處

許家能畫竹兩世與傳神

尊人友介以
書畫妙一世

揮灑看遺

法風流識後身不堪勞作吏共惜殫詩人十載虛

能事空餘素壁塵

不棄嘗許余作畫數年
未果相見每以為憾

送張韋存同年出守杭州

兄弟公才世少雙為郎五十典名邦青山郡閣斜

當寺綠柳春城獨枕江南國風光歸竹馬西湖煙

雨落蓬窗此中舊著文章手筆力知君未肯降

寄石泉令朱悔人次夏重韻

孤飛窮鳥影翩翩路入姜家舊涌泉江上竿橋驚

萬丈縣前隴石已千年地無司馬才應盡令有文

翁俗再遷問訊草堂今在否為君吟望向西川

時

人以公事
在成都

次韻令詒贈西厓都諫兼簡師魯

歲月崢嶸未可攀中年相顧惜朱顏何堪名玷揚

劉後

漢揚雄劉向
並居此職

獨喜交同王貢間甲議螭頭隨

左散斜行燕尾押西班

聽政日六科侍立
西陞下班如燕尾

歐公門

下今俱老往事重論淚一潛

送子文出守石阡

宰州古郡無人到天遣才人此索居荒服不堪來

西齋集 卷之九 五
擁傳亂山何處可巾車平生總為一官誤垂老輕
行萬里初流落使君誰愛惜醉中珍重嚇蠻書

道院納涼和夏重

時俞御史扶
九同居院中

少城草木足薪蒸山氣荒荒日夕增小閣長臨三
面水矮牀相對兩窗燈煙迷野渡無人畫雨壓危
闌盡意凭誰識開元房次律此身本是去來僧

甲申七夕席上限瓜字

略略天風淺淺霞銀河無賴已橫斜人間誰識成
都石故國愁通博望槎五月間間吳中大水東省但携青瑣
月西方誰致玉門瓜近年遣使臣於哈密種瓜進御相思欲夢橫

塘水千里清光不可賒

和令詒晨入諫院

城西王給事袞白有英稱道故憐吳質談經並戴
憑時與若都諫為工垣長國風名手異朝典舊儒能入夜新

焚草端居每夙興

晚出右掖和同省諸公韻

鵲立長連記注班寸心垂老任堅頑朝無闕事文
書靜袖有新詩歲月閒一色鴉飛天上樹萬家煙
隔馬前山相期下直琴尊在道直何妨任往還

七月二十六日同詠燭得真字

西窗夜話每相親
燼後蘭膏好自珍
王氏風流誰作鳳
石家豪貴枉為薪
老憐珠翠終無分
狂看臬盧總未真
寄語秋風休見跋
百年長照夜遊人

重表姪支彤九夜過老樹軒與恒山感歎舊
遊賓客都已散去惟恒山獨存次韻二首

長看國手送歸鴻

恒山善琴

豪氣逢君鍊到空
車馬不

來秋雨後名聲猶在故人中
造門久歎無文舉
驚座惟愁揖孟公
祇有感恩殘老淚
平生煙雨荷元

功

是夕與彤九話東海遺事

旗鼓詩壇已仆時
年來自愧不能師
座中苦厭聞

常語世上誰能解
曼辭已見終童投
漢傳更看德祖託
陳思相從細數閑
風月只有淒涼草木知

陶母歌二絕句示駿文柱中兄弟 并引

晉陶侃母湛本傳中止書封鮓截髮二事
遂能成子令名鄱陽范逵歎曰非此母不生
此子余獨以為非此子不傳此母也向使士
行官多遺物門有雜賓不將與乾沒寧馨者
同日而譏乎吾友子師本志不終余固日望
駿文兄弟之成立因書此相勉亦古人箴誨之
義也

西齋集 卷之九
貧賤能傳賢母名魚梁小吏莫相輕可知縱有尋
陽鮓不是遺來鄭國羹

賣髮鄰家有饌兼閉門剉薦手霜鑱若教士行無
佳客風雪誰留范孝廉

和令詒省中聞鵲聲有感

碧雲雙闕影巍巍消息偏傳到諫坡仙樹有枝容
獨立閒門無客漫相過占風方朔空聊爾見月曹
瞞可奈何寄語崑山留片玉莫將輕抵向天河

十月二十八日 召翰林院編修 臣奕清 禮

科給事中 臣銓同 臣暉 入 暢春苑即事恭

紀

蓬萊宮外叩嚴關秋水虹橋萬象閒未向 君前

囊白簡忽從 天上寫青山 是日 上條陳 否 上問 臣暉 曾

四 九章秘奧親聞語 是日 上於 御 三絕風流

敢鬪班 與翰林諸君東 西分班迎送 豈是前身老摩詰故教名

落畫師間

二十九日再紀

丹霞晨啓 九重關温室從容許宴閒日近 龍

顏疑得水風行虎步動如山論詩每聽尚書履

賜食平參宰相班 京江澤州二相國吉水華亭二 尚書同進韻府並在 內苑

西齋集 卷之九
歸去三山繞魂夢分明身在畫圖間

題錢朝采折枝畫四絕句

綠沉玉管埽青紅煙雨從今廢化工彷彿南朝蟬
雀扇流傳江左得遺風

疎淡清勻影半斜東坡曾與比詩家憑君六幅冰
綃上寫我新詞上落花

零落將軍畫一厨前朝金粉看疑無何當妙擅湘
靈手豎倒黃筌沒骨圖

竹石蕭蕭傍水濱夢中商略上林春題名他日驚

重見應記當時種樹人

癸未二月二日夜余夢人送杏花二株與朝采種於

水邊竹畔繁豔異於常花故末章及之

南郊致齋之夕與西厓都諫同宿道院有作
三更敲火遶廊行小院時聞古磬聲同惜中年從
宦學愛尋閑事說歸耕天臨丹闕鐘初動煙鎖瑤
壇月倍明誰似元和元制誥清詩潛詠萬人驚

奉和澤州相國 賜貂紀 恩之作

千金價重拜名裘政事堂中朔氣收漢代公卿輸
蘊藉謝家宰相自風流人如冬日爭相愛 恩比
春溫許獨留慚愧侍中空插帽豐貂犯雪殿西頭
歲暮省中書事二首

西風鳩鵲拂煙霄人物清華列外朝閑向奏抄徵

掌故唐制給事中掌奏抄今詔每從給傳采風

謠予忝吏兵二垣凡文武馬前直合提雙印六科皆有

行印從以殿下猶看衣八貂唐制左散騎與侍中左右

而今則用為常服矣朝罷相逢直學士鳳池初

上九門遙散朝後每與內直諸

五更宮箭漏丁丁長指天邊執法星莫媿張衡居

風議當思汲黯在朝廷諸侯不復懸滕袴小吏還

知用竹刑鑠印日吏來判牒用竹刑二字衆寄語

番官傳制早合符須撼禁門鈴舊制省中有公事

出番官亦唐故事

十二月二十八日拜賜御書歸行太

和殿西見牆外梅花一枝嫣然獨秀感而有

作二首

殿門西角粉牆中雪裏恩光已不同錯認徐熙

乞新樣先將春色上屏風

口脂面藥漫相誇杜老風流迹已賒誰似親書

春帖子城西偏賜諫臣家

除夕和西厓用少陵飛騰暮景斜為韻五首

西山尚殘雪片雲有時歸寒宵一尊酒俛仰誰是

西齋集 卷之九
非故鄉三十口嗷嗷歎恒饑江田收薄黍聊以佐
蕨薇吾廬亦可住十年計偏違惟送關塞雁夕陽
向南飛

少小好志節火氣期上騰昨拜諫議官舉朝想風
稜寧知己衰謝虛名難復憑微尚守靜退還恐悔
吝增殘年索酒券人事殊可憎文史庶銷憂掩卷
昏妄仍蕭然一榻外四壁餘孤燈妻孥不解事絮
語同蚊蠅

吾家江上宅流水臨門注松竹料已長鄰里寧如
故衰親甘旨缺藥餌扶遲暮但願春氣和東牖陽
光駐後園理荒穢蔬甲拆冰沍携持出茅堂車杖
兒孫赴獨怪遊子愚一官悔已屢皇皇竟何爲萬
事生違迂

朱門祀竈餘熒熒燈火炳貧家無黃羊轆釜厨獨
冷子郭呼不來閉戶畢殘景高齋子城曲寒雲暗
諸嶺老樹呼北風默坐神密覩勞生且安眠擾擾
任人境願制學道心毋使六合騁

衛士點漏急庭燎驚宮鴉煙霄聽飛鳴殿閣人無
譁趨朝入常班鐘鼓方傳撾清蹕一聲出風卷旌
旗斜趨蹌陪萬騎明燈玉河涯雲罕鹵簿迴曉氣

西齋集 卷之九
籠天家還聞 九重上書詔宣黃麻三吳巡狩地

盛事父老誇 時方有南巡之命

正月六日喜雪 祈穀前一夕 親書祝版

天題翰墨降齋居已報飄飄雪滿除入地蝗無千
尺種比門粟有七升餘農家預決豐年喜太史應
占上歲書歸踏瓊瑤踪跡上先傳好語到吾廬

十六日澤州相國蒙 恩 賜宴私第招集

點翰堂即席屬賦

大官仙饌溢門閭曲宴相呼拜 賜餘黃紙重封
千釀酒綠江新打百金魚但看元老調羹手不用

門生議食書却笑拾遺無口實春風小摘饜園蔬

西山

太行八百里不斷若門戶連岡走冀北案行無險
阻城西抱京室翠色自太古長天淡如畫黛綠修
眉嫵大山遊神龍小阜卧金虎井陘當臂胛居庸
搯腰脅陰陰羅諸峰兒孫顧其祖吁嗟四朝跡興
亡付平楚三百七十寺芳草同仰頰流傳武清侯
海澱遺別墅喬木十年種異花四方取雙橋架玉
泉銀練寫飛雨前湖泛方舟葭蘆迷遠渚後湖界
文石鳧鷖戲寒淑世亂不復問野老識其處夕陽

挺魚叉煙水無人主
吾君萬幾暇
遊幸樂斯

土離宮三十六屬玉設
清籞規模茅茨制平城

存棟宇肅穆
澹寧居奏記交接武楊柳亞周廬

嚴更衛虎旅讀書兩高齋
天作文章府苑中有淵鑿 佩

文二齋為翰墨清宴之所湖光上玉儿
花氣入畫斧芙蓉在一

曲墨池雲亂吐
清溪有新構幽絕更何許時清溪

書屋初成在東書房之南蚘蟻松百尺
檀欒竹萬部馬卿奏詞

賦劉向校亥魯供奉賞丹青
待詔收格五車馬小

長安雞犬新豐聚外戚
起名園左右儼弼輔野田

捐溝洫別館觀禾黍
舩花間歸桔槔煙外序春

波棹謳發水嬉雜歌舞
期門學角觝中官校弓弩

香草合歡殿飛閣不可數
仙舟集罟網小市通商

賈修隄試騶馱雕檻調鸚鵡
九枝剪新燈火樹然

蓮炬魚龍忽曼延百戲會
堂廡父老驩擊缶公卿

喜 賜酺長年 千秋節報賽
劇干羽尋橦間都

盧考搏煩萬鼓盡言太平樂
天近同鄩杜六月吹

炎風流螢團扇舉虞人整網
城龍廐戒牧圍峯峩

青山口 行殿歷八所邊花生
無名塞鳥閑相語

魚溝豐長林 君王此清暑
近臣從射獵將軍縱

超距烏號連鶩鷁韓盧逐狐鼠
車駕久未歸山

西齋集 卷之九
光日延佇秋色西向橋峰巒列伍伍水花已零落
衰柳縈輕緒清冷高梁水行人照來去

次韻夏重下直偶過令詒西亭

二老風流山澤臞槐陰靜處步廉隅懶乘車馬過
朝士喜寫文章與學徒白髮爲官惟自醉青筇無
病不須扶知君託命煙波上終乞 君王賜鑑湖

閒居雜詠六首和周濂園都諫

小庭無事綠陰時苦竹綠藤課插籬惟有故人過
飲水閉門風雨夜論詩

臘前春酒雨前茶未有風情抵白家但恐丁香易

零落三更把火更看花

老樹長年伴客身草堂顏色稱家貧公卿莫作三
槐記惟取清陰似主人

三月江東春浪生故園野水與門平人生何日山
資足苦說歸田豈不情

低頭作諾與時違萬卷殘篇兩板扉漫學荀郎草
申鑒旁人終笑諫書稀

牆外春流野艇遲夕陽山色最宜詩叩門何處傳
佳句知是相如第一詞

時夏重居城南道院先有和詩相寄

澤州公扈從南行舟次潞河寄詩留別敬次

來韻

萬點紅旌下海城元臣憂國問蒼生杜陵春水孤
吟興謝傅青山異代情霖雨十年占稼穡清流九
曲照冠纓江東野寺題名處好理煙波小艇行

栖飲堂詩四首次西厓韻兼簡夏重

平生一束書閉門手自曝中有故人詩招我歸隱
速默坐思舊山心與魚鳥逐水竹三十畝百年結
溪屋家雖致千金倉皇豈能築如何老不悔塵土
換巖谷即今俛仰間萬事剝未復低頭事冠帶舉
眼羞林麓今年五城市斗米同炊玉折俎已久虛

藜藿常到目吳語翻半忘漸覺四方熟始知此身
累周妻與何肉中夜起自呼作書罵童僕勗哉老
氏言不辱在知足

吾聞妙高義本是迷廬峰天生功德水湧出千芙
蓉風輪忽東轉七寶紛相從影落浙西寺雪山無
舊蹤我曾遊十日靈境一再逢至今清夢出猶繞
澗上松祇應媿湖水恐記當時容君家近靈鷲抱
舍沙重重養禽答樵唱種竹傳煙鐘遺書山中客
誅茅敢辭慵待君乞身去幽興羅一胸此時君爲
雲我亦隨如龍但知少游樂不鄙元卿農筋力及

未衰尺布猶可縫吳江綠瀾渺越花紅蒙茸買鄰
求精廬萬卷窮三冬談笑愜素尚一酌玻璃濃
吾輩固文士垂老踐要地置身諫官中獻替天下
事晨光西陛下八人立如植君強我萎腰不敢稱
二稗木枕質酒家羣笑陽城醉茲春車駕出百
職隨官次君行插貂蟬執筆陪卿寺東歸指鄉縣
前路識亭隧長安雙槩牙啞軋間茄吹清江無恙
在春風一帆遂十年夢空谷寔然足音嗣好山如
雞肋欲食難更置但愁東諸侯摩肩各麋至湖光
彈指間目瞬不暇視終被煙霞朝空抱猿鶴媿舉

手謝山靈日暮還七萃

富貴及早歸古人再三云百年若蒼狗斯須變浮
雲鑑曲如可乞神武謝吾君詩書教子弟傳家
有清芬逍遙載尊酒遠勞田間勤時占課雨書閒
草迎貓文社肉極山味池魚挾溪腥自製隱居服
不須浣中帟蕭然離州府人事何所聞如彼九臯
鶴飲露凌紫氛俯視天地間世路徒糾紛念茲良
歎息麋鹿當呼羣查子吾臭味風格乃一熏百頃
江上田歸來同耦耘不辭斥鷃笑十步翔枋枌君
歸聽斯語酌酒中自欣牀頭理藤篋諫草當盡焚

報我滄江水綠漲已十分

喜少融弟至京師

入門相見集悲歡肥瘦形容一笑看老悔功名投
牒晚夢思風雨對牀難家庭久已知名士門戶何
須寄下官莫學阿兄真薄相十年遊宦尚單寒

賀令詒洗兒歌十首

分題諫紙報交親入手明珠的的新花底散朝無
一事王家共看小麒麟

天生河嶽付英靈江左風華尚典刑異代文章當
有種抱來應是識風丁

三人首掉直言旗小諫聲名海內知濃笑東家書

本字作歌誰數杜唐兒

蓮洲都諫字
之曰本郎

蹉跎官職暮年成六十生兒萬事輕莫學阿爺名
位老願他年少到公卿

硤硤頭玉見瑤光賀客歌呼笑滿堂盡為仲宣書

籍喜外家原屬蔡中郎

東歸江水恨無田豈為揚雄老未遷知爾殷勤謝

賓吏洗兒不用水衡錢

閉門書史伴清娛對鏡星星摘白鬚莫訝海中生
果晚要將門戶託文殊

才子非熊夢未賒呼兒谷鳥足深嗟天公定爲吟
情苦故遣重生顧況家

啼笑懷中奪阜囊家風生小愛文章門前正對梧
桐樹好采紅珠結鳳凰

清江花竹接煙墟萬卷家藏舊賜書待汝他年讀
雌霓老夫歸去築郊居

四月二十三日晚出右安門留宿王文靖公

芍藥花野六首

草橋遊跡好隨意得花村流水欺官道青山赴郭
門問人循舊路立馬數名園碧樹不知遠但聞雞

犬喧

平泉絲竹地詩酒是前塵清絕三朝樹風流二曲
人門生餘白髮野老信青春寂莫揚州宴空驚客

淚新

古井何年甃茶香此復同花間雙軸轉柳外萬畦
通階長有情碧闌開無賴紅不堪留宿處二十徧

芳叢

予自丙寅遊此屈
指已二十年矣

四面山風合空堂鳥雀哀黑雲穿徑密白雨過墻
來燈火重鋪席龍蛇亂入杯天公應有意火急遣

花開

是夕大
雷雨

初日憐生意臨風一笑微漸垂金帶重忽訝玉盤
肥清露流團扇紅霞上夾衣穠華雖自得終要借
光輝

草綠迴香廟春陰夢雨祠科頭從步屨洗眼好題

詩

碧霞夫人祠
有洗眼水

田父勤千畝閑人把一枝寄聲劉

侍御驄馬去何遲

西谷次日於
道左相遇

振西姪至話舊二首

遠來重話竹林眠京洛論文慰眼前猶識舊聲憐
去日尚餘豪氣數當年才遲時命慚吾老家復公
侯賴汝賢別夢相招疎懶叔桂叢長負小山篇

獨抱遺經卧海濱百僚衆口誦清新誰能世並家
門集莫歎朝無強近親諸到才名歸後進二疏風
節擬閑人詞場好試穿揚手萬卷文章定有神

對鏡

憔悴忽如此清光奈爾何老將壯心去閒覺道根
多落拓一官在悲涼萬事過杜陵殊未達勲業恨
蹉跎

西齋集卷第九終

西齋集卷第十

詩五十九首

乙酉五月至丙戌三月留京師作

一官

一官放廢合踈頑不計君平身世間
三宿本無他日戀半生猶得退居閒
布帆欲下從秋水清夢先歸報故山
祇有恩門風義在合歡花謝未東還

五月二十日寓止夢綠草堂諸君携酒過慰

即用夢綠二字分賦二首

我笑班孟堅著書重三夢
詭祥不由人造物或愚弄
前年脫手板殿下陪法從黽池始奮翼密勿事

諫諷寧知故人書汎濫法家訟波濤忽揚沸雷霆
增震恐通侯案三府平署混喧闕八口正啼饑晨
炊斷官俸小兒拾諫紙大兒廢雜誦暮投陳君榻
濁醪倒鳴甕頗抱學道心投石不知痛碌碌何氣
炎世豈忌無用雖乏良田宅願學仲長統知已酒
數杯榮比傾朝送

江東荻葦村家在江一曲妻孥報書來風雨頽破
屋清流舊溪水抱舍千章木此歸亦偶然投老計
早熟人間得喪空糾纏齊禍福長年慚仗馬轅下
效局趣從茲免謗譏枯槁自甘足僮奴頓失志相

視或舉哭深咎諫書釁歸怨御史獄主人誤射策
辭連竟莫贖始知據職好若輩爲梁肉我醉耳不
聞談笑薄官族十日下西掖帶急寬腰腹徘徊起
長吟愛此小庭綠

送王雲衢之官新津

小縣名偏古西川官最幽遠山裴迪寺春水杜公
樓花柳應神助琴書且滯留莫吟秋葉句江檻足
離憂

七月二日有感二首

解印閒居日晏如五升不盜太倉餘東西還汎河

中木物我真同濠上魚田舍當官翻漸狹賓寮無
病也教疎永興偶奏劉君策慚媿張成弟子書
先生拂袖賦歸來何事觚稜夢却回朝市不宜身
再隱丹青偏與老相催李陵已歎無生氣田甲馬
知有死灰延閣諸公高議在摩挲萬卷眼初開

自嘲二首用前韻

憂患年來自笑頑此生常在吉凶間五窮故鬼終
難遣三黜微名未許閒誰道孔融輕去國空思賀
監乞歸山兩京百口如絲命日指征帆望我還
道心匪石却同頑顛倒先生虎鼠間賈傳負才還

俟罪何公任遇敢投閒枯魚無用偏懸肆小草多
情不在山淒寂可憐青瑣客早朝曾點末班還

次和西厓送別令詒二首

報 主功名薄全生憂患餘李膺惟直道潘岳且
閒居黃口依中婦青箱託小胥傷心趨走地猶有
未焚書

湖海無家客蒼茫問故園羣鳥驚並散一鶚獨孤
騫垂白求生理窮愁著法言中流常失劍莫視刻
舟痕

西厓復用前韻見貽酬答二首

生死論心友差池諫諍餘迂疎才共濟清要地難
居別緒憐蘇李離憂感屈胥多君中發憤爲草絕
交書

掖垣花影散寂寞似文園不道棲鸞列還容病鶴
騫王維餘宿習劉向校羣言長誦青蠅句空留白
壁痕

謝澤州相國贈馬

曾向長楊侍 至尊滿身猶散五花痕霜蹄獨立
心應老龍性難馴骨尚存豈得養來如故主不知
騎出向誰門繞朝若贈西風策伯樂終酬一顧恩

哭野航

平生難斷轉茫然身後文章定孰傳五絕才名悲
作達一門家世本無年半人獨得詩人病新鬼翻
爲路鬼緣海內知音君已失此身將老更誰憐

題澤州公河上集後五首

淮南續續海雲生入眼桑麻見太平盡說相公提
造化喜聞父老頌河清

草樹荒宮老眼看六朝殘夢好煙巒長思沈范芙
蕖賞江左風流薄謝安

財賦東南數郡雄白頭詩筆補天工誰將辛苦盤

中白傳寫三吳繼國風

公寄宋中丞詩極論東吳財賦之苦

坐來天上與春還
畫舫青簾萬卷閑
踏遍南朝煙雨寺
白公遺閣陸機山

午涯清夢十年新
真作江東釣艇身
極目玉溪流
水曲中條山色老
詩人

公數三晉詩人獨眷懷天章屢有篇什而天章惜已

物逝矣

滄浪亭歌用歐陽公韻寄宋中丞

吳中故人招我隱
西風已草歸來篇
何為罷官翻不歸
海山兜率皆茫然
秋聲滿地非吾土
仰看缺月如刀環
寒燈開卷古人在
江湖舊夢爭餘妍
十

年別我南禪寺
晨鐘覺後憎塵喧
門前流水在何處
但望故國空蒼煙
蘇君自是洛陽客
棲遲偏得吳山緣
人間放逐亦不惡
扁舟獨往追神仙
我愁歲路將白首
風月豈得長無邊
三吳流傳足春水
寒潮影沒城東田
滄浪小亭忽如舊
紅菱白藕交清漣
謝公遊遨有幽意
一笑時乞山僧錢
長安貧病老給事
不材已棄人還憐
憂患依稀似子美
平生生出處
終由天倦鳥當知返
幽谷縱魚未許逃
深淵吾生有命獨
涼薄輸與野老煙
波眠白雲在天
不可見南園水竹
愁年年新詩終恐
猿鶴笑煩公

西齋集 卷之一
莫向山靈傳

聖安寺觀蔣樹存繡谷圖題四絕句

蕭寺無人到齋鐘出遠林前生業白客來往得初
心

靜看茅屋趣茶罷欲題詩廢殿何年樹垂陰覆古
碑

小閣水精域斜陽淡欲無呼童拂殘硯留客看新
圖

家在桃花曲人棲祇樹中故山修竹影清夢落西
風

下直後簡兩殿諸公二首

高齋諸學士典校日華西宿學人爭許遺書家並
携永明傳舊體秘閣奏新題自歎周顥老宮商半
已迷

天上清涼地 行宮六月寒感 恩初 賜扇飽

食共傳餐 扇 上於行宮 御書 賜編校諸臣 詩筆從教采圖經

借與看周廬嚴出入不問寫書官

八月十二夜憶家有作

草堂伏枕夢初殘庭樹西風小作寒已覺安心無
別藥不知送老是何官萬金間阻恩書遠八口倉

皇活計難自笑三塗終有累楞嚴案上嬾重看

題宋翰林山言學詩圖二首

骨骼飛騰三十餘眼看公相府中居韓家應笑符
郎嬾秋雨城南始讀書

秘室從容錄奏時共驚談笑却熊羆文章曹志波
瀾舊袖手休輕將種詩

與西谷

白公四十四遠貶江州吏水上聞琵琶始有遷謫
意蘇公四十四責授黃州使婦女罵焚書長幼皆
發悸嗟哉兩天人瓌瑋生間氣立朝尚大節得失

賤名位遭時非不達方正或倒植寧乏當途憐才
高道所忌兩州落楚國千古離憂地屈賈齊一悲
倉卒罹文致平生出處似踪跡猶可記何為同歲
月造化亦遊戲始知萬物數禍福不能避吾曹遇
聖明白筆列近侍東省職五諫西臺掌三刺黽
勉懼曠官罔敢靳勞勩偶然軒輊間年與二公類
才小慚昔賢文章邈難嗣相顧各自笑駑馬解兩
鞮老瘦頭未斑憔悴增餘媿深灾長默責惟輕自
天賜讀書勿永歎得酒且一醉

乙酉九月十五日

上從

行宮避暑回

臣

曠同武英翰林諸臣迎拜於新屯道左放斥
餘生自分長離 法從猥蒙 異數再覩

天顏因念自立 朝以來首尾八載感陳迹

叙 新恩得詩凡十有二首謹於二十日伏

暢春苑小東門外恭 上

瀚海西風萬里清百蠻歡送過興平花間屢宿秋

山殿天外新歸細柳營 賦就金蓮傳競寫上於行宮

製金蓮花賦進來龍馬看先行孤臣亦是蓬萊客夢逐

紅旌似再生

昔陪朝謁建章宮名玷尚書牋奏中九賦版圖忘

帝力三農雨露出 天工遇非顏駟功名老官

比王筠品秩同曾拜驪珠萬金 賜至今懷袖拂

春風官戶部日蒙恩召入御書唐詩

紅雲影護紫薇天鳥雀呆愚語曉煙班列長隨華

省後姓名首達 御牀前垂衣遇 主真千載書

笏為郎已七年忽奉 九重親下問殊榮萬口已

爭傳記癸未十月四日召入乾清門引見事

殿下書生橐筆時 臨軒清問閭閻私甲科曾踐

登朝跡乙奏還陳射策辭一戰久慙無壯志萬言

初上得深知小山風雨留叢桂上苑偏栽第一枝

十月七日 乾清門 召試蒙 恩
拔置第一首陳社倉遺法隨見施行

三公啓事聽銅龍 御筆親題出禁中 甲申三月二十日

特旨授吏科給事中 諫府囊携霜簡白近臣班接畫簾紅朝

衣不散金爐氣歸騎長依水殿風祇有感 恩遲

退食 天書夕拜掖門東

玉階趨走並宮僚披拂清風上慶霄碧落雙携供

奉筆青門兩插侍中貂 十月二十日 轉掌兵垣 百身豈足酬

恩遇一字無能補 聖朝深負邱山猶未報洪

爐終自荷甄陶

碧戶紅簾曲水間連朝簪筆侍 龍顏爭圖温室

千章樹分寫甘泉四面山占數從容 天語近論

詩清燕侍臣閑玉京粉本誰能畫花外 金輿日

暮還 記十月二十八日蒙 召入 暢春苑事

劍佩千官列 玉除牙籤廿卷拜 恩初共看天

上新垂象不數人間舊賜書風雅重經 聖人手

光華偏照小臣廬從今載詠南風句應道文章未

得如 是日 頒賜在廷諸臣 御製文集各一袞

秘閣無塵翰墨親雲煙落紙盡如神宮中預賜千

門喜闕下先分兩掖春當戶懸時龍勢動自 天

題處墨痕新城西萬丈榮光在傳作臣家百世珍

十二月二十八日 隆宗
門復拜 御書春聯之賜

夢繞 君門別諫坡忽傳 天意轉陽和三褫敢

望還顰帶一面先教解網羅金碧仍來瞻氣象丹

青猶許寫 恩波舊臣恐懼頻流涕惟感矜全

聖澤多 乙酉五月二十日落職六月二十一日復奉 恩命留京效力

縹緗插架擁蘭臺親見燃藜典校來江左四聲經

籍采元和十道驛程開 七月一日入直 武英殿 時翰林諸臣方編校佩文

韻府方輿路 程考略二書 皇天亦自收微物 明主何曾棄不

材遙仰 行宮勤乙覽日邊常捧 詔書回

官途舐觸語相連散質終歸造化權僵燕一生疑

入地枯槎八月更浮天青雲有路餘生在白壁無

辜 聖主憐從此向榮同草木只應長詠太平年

寒孟和澤州公出城感懷韻

四十無成骯髒人年來已歎白鬚頻地偏蕭寺長

宜夜天惜寒林欲放春忠信祇憑 明主舊衰遲

始覺世緣新元臣匡濟蒼生了猶見詩成泣鬼神

甲申十月曾蒙 恩 召入 暢春苑東書

房有即事紀 恩之作休官後已分絕跡今

十月二十日復 中旨被召悲感舊事追用

前韻

夢覺重來謁

帝關綺疏如舊瑣窗閒筠籠蒸出

臨池字

時以竹籠蒸裱工云火焙後

御書西岳廟碑

蠻布楷成

著色山

王麓臺學士論布楷山水法

畫省掃空供奉跡碧霄添

註謫仙班

清溪六曲屏風影都在孤臣涕淚間

是日命畫

清

冬夜寓宿僧寺與麓臺學士夜話

彌勒龕邊佛火明小窗時見墨縱橫山歸老手千

重翠月近閒人十倍清吳質病羸悲昔夢王維詩

畫本前生論文夜半茶煙細卧聽松風萬壑聲

題顧南原所畫東坡像

東坡老人飽憂患萬里無家天所泰與時牴牾晚

乃悔南蠻婦女皆譏訕吾生後公五百年手把殘

篇自童牝夜長清夢或見之彷彿鬚眉相識慣酒

醒月落不可追默向文章別真贗古帖流傳笠屐

圖風雨單衣露兩鬣枕榔菴外負瓢歸田野行歌

忘日晏顧生胸中有詩筆畫工俗氣能鋤剗

蔣君樹存

從古帖中得魏了翁所傳蘇學士像令俗工摹之頗失其真南原山水不解人物乃以意寫之觀

者無不心以公詩寫公貌几案俄然枉清盼焚香

再拜掛著辟典刑具在疑非幻自恨不如黎子雲

載酒堂成意無間對公朝夕願低頭自此浮名薄

遊宦不須更畫樂天真我欲從之具羔雁

陳潛齋學士席上詠菜

嘉蔬小摘舊名存一把長蒙地主恩惡草同生疑
掩色寒風相壓未傷根微時宰相曾投寺老去英
雄學閉門獨歎人間爭食肉山中滋味與誰論

送陳秋田之官荔浦

柳郎才調寄冥搜

秋田工詩餘故以者卿為比

佳吏忽忽更遠

遊長手百篇藏秘篋新添三口入行舟

樂天詩身兼妻子都

三口秋田近有選郎之喜故云

天圍海氣通山穴人和猿聲上驛

樓誰唱長江歌一曲相思水送入昭州

長江礪蟹戶所歌見

唐子西集桂林有相思水見唐書地理志

春旱

上帝惜靈雨三月多恒暘下土萬物盛白日無潛
藏太史上月歷憂將及農桑 天子責羣陰露坐

齋東廂下

詔求直言厥災訪京房公卿盡驚慄

羣議集朝堂生魚享共工水日祠太常聚蛇小壇

下燒豬邑門旁

帝曰吁龍乎何為火所傷天聽

不夢夢萬民失陰陽枯骨本無用愚婦詎可禳三

公毋策免六事予未臧十日輟寢食至誠默相將

是時

萬歲節密雲布水祥西山送急雨草木昏

微茫池中五蝦蟇煙霧籠商羊早魃不急去後者
當爲糧四郊盡歡喜田歌樂相望始知 聖人力
乃使天工忘屏居事舊史臨階喜微涼一庭閑花
草佳氣鬱蒼蒼誰作里人頌庶以歌年康

霖霖二首和龔叔度

花下春衣濕自知身輕偏與病相宜久無神馬煩
占夢誰道名山是國醫漢室賈生應試數周家仍
叔欲陳詩不因 天子開三府難使陰陽萬物滋
樓臺雲氣滿蒼冥父老呼零盡衣青杵白半沾看
尚暴蛟龍小鬪喜初醒誰家春竈供常祭何處天

船過客星從此郊原催布穀不妨顧兔笑無靈

題家藏二草堂畫

王叔明黃鶴草堂

香光居士山中客自寫吳興山色殊野竹開時問
蕭寺水田缺處見明湖董家筆法今能否趙氏風
流酷似無壁上名山日相對不須還作向平圖

董思白盧鴻草堂

林泉掃跡豈前塵每有西風歎隱淪老去雲煙空
見畫近來巖穴且無人介推不解言微祿王霸終
當乞病身誰似東歸盧諫議太平長放作山臣

盧鴻

自稱山臣
見舊唐書

松花石硯歌

天公北鑿長白山巨靈乘風過青海斧柯一夜斲
山骨寒玉如天色不改松花江影綠于竹鴨頭
唼唼生光采江耶石耶不可知但見玉堂匣底蛟龍
在明光宮中無纖塵興搖五岳石有神九門洞開
天祿閣分賜視草金坡臣相如子雲著詞賦小窗
弄筆不可嗔何爲芭蕉夜半潑寒雨秀色亦到支
離人鍾王鮑謝吾何有天上煙雲今落手歸來拂
拭置几案春波一曲疑可取臨川新樣輸匠巧洮

河舊石慙形醜平生未能識竒字敢謂立言期不
朽綠章箋天天不語豈有氣象干牛斗真靈自笑
作頑仙何物鬼神爲我守

贈書局三同舍戲用東坡體三首

顧南原

顧郎游好十年遲卑濕相看盡老時洛下何人能
贈婦吳中無客可稱師蔡邕避怨于吳顧雍古賢
畫壁看都絕小字升堂更不疑江上布帆雖借與
諸侯東去欲干誰

蔣樹存

藏書萬卷校讐新庾信文章賞更真學士一門終

有筆野翁三徑不無人看花漫說溪山主

東坡和
蔣頴叔

詩云瓊林花草聞前
語罨畫溪山指後期

占夢當為社稷臣獨歎吳兢

書

良史絕外家窮老敢論親

唐書蔣又外祖吳兢又
幼時嘗從外家學得其

徐亮直

風流城北舊多情好事傳看劇韻成共說南州見

高士却驚西省得書生人中騏驥應無價天上麒麟

麟定有名未必箕山遂君志公侯我已識徐卿

酬子文洞庭湖見寄二首

水驛微冥九月天孤燈風雨洞庭船清吟若過宜

春口悔不歸耕十畝田

柳家子弟厭家雞起草南宮夢已迷況是中年衰

樂後更無書報庾安西

西齋集後序

吾友吳君獻可奉其先公給諫西齋集十卷來告
曰竊不肖不天四歲而孤不及逮事先君子雖上
有三兄不幸仲叔皆蚤世伯氏一官蹭蹬再起再
躓以是門戶益衰諸事失墜而墓中之銘闕焉今
茲有事於遺詩竊欲附記先君子一生行迹於後
以垂家乘而傳子孫敢以屬子余不獲辭謹按吳
氏之先始自河南固始望爲渤海與延陵異族元
末遠祖遷蘇之崑山傳至儀部大參典客三世仕
宦族以滋大典客仲子號竹臺者贅於琅玕王氏

遂留居太倉即給諫之曾王父也子約叟公是生
梅村先生崇禎辛未會元登鼎甲為海內文宗鼎
革後以親老出就徵居二年歸康熙壬寅始生給
諫公幼穎異讀書過目不忘乙丑拔貢同選者何
此瞻劉大山王雲衢輩多知名士而給諫哀然居
首丁卯舉京兆戊辰成進士從東海司寇編校
皇輿紀程未成中輟久之除戶部廣東司主事旋
升員外郎甲申特授吏科給事中轉掌兵垣次
年以會劾銓司陳某婪贓既訊得實而陳誣以挾
嫌列奏坐免官蒙恩留武英殿修書將復用

丁內艱歸哀毀以卒年四十有六公秉承家學讀
破萬卷為人樂易以友朋為性命自乙亥入都需
次三年官戶曹六年居諫垣年餘校書一年凡四
方造謁者無不倒屣延接倬直之暇把酒論文歡
洽竟日士有一藝之長極口稱譽用是戶外之屨
常滿月俸不足舉息至萬不惜也其好客愛才出
於性生如此使天假之年得行其志豈特以詩著
哉獻可為給諫少子行四原名彥道後改名霽既
幼失怙析產得瘠田六十畝獨隨食生母年甫十
四而生母又亡轉徙流離能刻苦自勵以累不得

志於有司也去而爲客積束脩之所入以葺祭酒
之賁園築西山之丙舍將欲舉百廢而具治之然
輒限於力而志不墮今又開雕給諫公之遺詩并
附述其事迹冀傳於後揆獻可之心蓋無一日偶
忘其親也余故備論之以成其志後有爲公撰誌
銘者盍卽於斯文徵之至公之詩之必傳於世澤
州相國已具言之矣茲不贅乾隆辛卯中秋雲間
後學沈大成述